



GEORGE ORWELL

ANIMAL

ՀԱՆՁ ՕՐՈՒԵԼ

ԱՄԱՆԱՖԵՐԱՄ

FARM

1916.info





GEORGE ORWELL

# ANIMAL FARM

ԱՆԱՄԱԿՖԵՐՄ

ԳՐԱԴԱՐԱՆ

ՀԱՅԱՍՏԱՆԻ

ՀԱՅԱՍՏԱՆԻ

ՀԱՅԱՍՏԱՆԻ

ՀԱՅԱՍՏԱՆԻ



Երևան  
«Անտարես»  
2013

ՀՏԴ 820 – 31 Օրուել  
ԳՄԴ 84.4 անգլ - 44  
Օ 959

Անգլերենից թարգմանեց  
Արտաշես Էմինը  
Խմբագիր՝ Արքմենիկ Նիկողոսյան

Օրուել Զորջ

Օ 959 Անասնաֆերմա: Վիպակ/Զորջ Օրուել;  
անգլերենից թարգմանեց Ա. Էմինը;- Եր.:  
«Անտարես», 2013.- 152 էջ:

«Անասնաֆերմա» վիպակը հրատարակվել է 1945 թվականին: Այն կարելի է համարել երգիծական առակ-այլարանություն, որտեղ Օրուելը պատկերել է 1917 թվականին Ռուսաստանում տեղի ունեցած Հոկտեմբերյան հեղաշրջման հեղափոխական սկզբունքների, գաղափարների ու ծրագրերի հետագա այլասերման ընթացքը, որն ի վերջո հանգեցրեց բոնապետության և տոտախտարիզմի:

ISBN 978-9939-51-520-5



© “The Estate of the late Sonia Brownell Orwell  
Published by arrangement with A.M. Heath & Co.  
Ltd., London”

© Էմին Ա., թարգմանության համար, 2013  
© «Անտարես», 2013

## ԳԼՈՒԽ 1

Գիշերվա դեմ «Մենը» ֆերմայի տեր Զոնզը կող-պեց հավաքները, սակայն չափից դուրս հարբած էր, որ հիշեր գոմերը փակել: Շորորալով, լապտերի լույ-սը դեսուդեն պար տալով, նա հետնամուտքի մոտ դեն շպրտեց սապոգները և, լվացքանյակի տակա-ռից մի վերջին կուժ գարեջուր քաշելով, դիմեց վեր, ուր արդեն խոմփում էր միսիս Զոնզը:

Ննջասենյակի լույսը մարելոն պես՝ ֆերմայի կառույցներով մեկ իրարանցում սկսվեց: Ցերեկով խոսք էր տարածվել, թե ծեր Գնդապետը՝ մրցանա-կակիր ճերմակ կինճը, նախորդ գիշեր արտասովոր մի երազ է տեսել և ուզում է այն պատմել մնացած անասուններին: Որոշվել էր հավաքվել մեծ ամբա-րում, հենց որ միստր Զոնզը բարով խերով քաշվի մի կողմ: Ծեր Գնդապետը (նրան միշտ այդպես էին կո-չում, չնայած նա ցուցադրվում էր ուրիշ անվան տակ՝

Վիլինգդոնյան (Հրաշք) ֆերմայում այնքան մեծ հարգանք էր վայելում, որ ամեն ոք հոժարաբար զոհեց իր մեկ ժամվա քունը՝ նրա ասելիքը լսելու համար:

Ամբարի մի ծայրում՝ հեծանից կախված լապտերի տակ, Գնդապետն արդեն թիկն էր տվել ծղոտին, թեմանման մի հարթակի վրա: Նա տասներկու տարեկան էր և վերջերս գիրացել էր, բայց և այնպես դեռ սքանչելի տպավորություն գործող մի խոզ էր, իմաստուն ու բարյացակամ տեսքով, չնայած այն հանգամանքին, որ իր ժանիքները երբեք չեն կտրվել: Շատ չանցած սկսեցին ժամանել նաև մյուս անասունները և իրենց հարմար ձևով տեղավորվել: Առաջինը երեք շներն էին՝ Զանգակը, Զեսին ու Փինչըրը, ապա՝ խոզերը, որոնք ծղոտին փուլեցին անմիջապես հարթակի կողքին: Հավերը թառեցին պատուհաններին, աղավնիները թևածելով ծվարեցին կտորի շեղ գերաններին, ոչխարներն ու կովերը պառկեցին խոզերի հետևում ու սկսեցին որոճալ: Երկու գրաստները՝ Դմբուզն ու Երեքնուկը, ներս մտան միասին, դանդաղ ու զգուշորեն զցելով իրենց փոչոտ սմբակները, որ հանկարծ հարդի մեջ մի մանր էակի չտրորեն: Երեքնուկը կյանքի կեսը բոլորող պարարտ մի զամբիկ էր, որն իր չորրորդ քուտակից հետո այդպես էլ չէր վերականգնել նախկին կեցվածքը: Դմբուզը հսկա մի

գազան էր, համարյա տասնութ թիզ բարձրությամբ՝ երկու սովորական ծիու ուժի տեր: Քթով իջնող սպիտակ բիծը նրան փոքր-ինչ տխմար տեսք էր տալիս. ինչնէ, նա առաջնակարգ բանականության տեր չէր, սակայն համատարած հարգանք էր վայելում որպես կայուն նկարագրի և անսահման աշխատունակության տեր: Զիերից հետո ներս մտան Մյուրիելը՝ սպիտակ այծը, և Բենիամինը՝ էշը: Բենիամինը ֆերմայի ամենաերկարակյաց անասունն էր և ամենադժվարահաճը: Նա սակավախոս էր, իսկ խոսելիս սովորաբար ցինիկ մի դիտողություն էր անում, օրինակ՝ ասում էր, որ Աստված իրեն պոչ է պարզել ճանճերին քշելու համար, սակայն ինքը կնախընտրեր, որ ոչ պոչը լիներ, ոչ էլ ճանճերը: Նա միակն էր ֆերմայի անասուններից, որը երբեք չէր ծիծաղում: Պատճառը հարցնելիս՝ նա պատասխանում էր, որ ծիծաղելու առիթ չի տեսնում: Բայց և այնպես, առանց բացեիբաց դա ընդունելու, նա նվիրված էր Դմբուզին, և հաճախ երկուաը կիրակիներն անց էին կացնում միասին՝ բուտանի հետևում փոքրիկ ցանկապատած հողամասում կողք կողքի լուս կանգնելով:

Հազիվ էին երկու ծիերը տեղավորվել, երբ ամբար լցվեց մորը կորցրած բաղիկների մի երամ՝ կամացուկ ծվծվալով, նրանք դես ու դեն էին անում, որ ոտքի

տակ չընկնեն: Երեքնուկն իր հսկա ոտքով նրանց պատսպարեց, և բաղիկները տեղնուտեղը պառկեցին ու քուն մտան: Վերջին րոպեին, մի կտոր շաքար բերնին, կոտրատվելով ներս ճեմեց Մոլլին՝ սիրունիկ ու հիմար զամբիկը, որը քաշում էր միատր Զոնզի երկանիվ կառքը: Նա տեղ գրավեց առջևում և սկսեց տարութերել իր ճերմակ բաշը՝ հուալով ուշադրություն հրավիրել մազերին հյուսած կարմիր ժապավենին: Կատուն եկավ ամենավերջում, սովորականի պես նայեց շուրջը՝ ամենատաքուկ տեղը փնտրելով, և վերջապես խցկվեց Դմբուզի և Երեքնուկի միջև, ինքնագոր մոմուալով Գնդապետի ճառի ամբողջ ընթացքում՝ առանց ականջ դնելու վերջինիս և ոչ մի խոսքին: Հիմա արդեն ներկա էին բոլոր անսառները, բացի Մովսեսից՝ ձեռնասուն ագռավից, որը քնում էր հետնամուտքի կողքից ցցին թառած: Համոզվելով, որ բոլորը, հարմար դիրք ընդունած, ուշադիր սպասում են, Գնդապետը կոկորդը մաքրեց և սկսեց.

– Ընկերներ, դուք արդեն լսել եք անցյալ գիշեր իմ տեսած արտասովոր երազի մասին: Սակայն դրան ես կանդրադառնամ ավելի ուշ: Նախքան այդ ես ուրիշ ասելիք ունեմ: Ես չեմ կարծում, ընկերներ, որ դեռ շատ ամիսներ ունեմ ձեզ հետ անցկացնելու, բայց նախքան մեռնելը իմ պարտքն եմ համարում ձեզ

փոխանցել ունեցած-չունեցածս փորձը: Բավական երկար ապրելով՝ ես շատ ժամանակ եմ ունեցել գոմում մենակ պառկած մտածելու և, թերևս, իրավունք ունեմ հավակնելու, որ աշխարհիս կյանքը հասկանում եմ ցանկացած այլ կենդանուց ոչ պակաս: Եվ այդ մասին է ահա, որ այժմ կցանկանայի խոսել ձեզ հետ:

Ուրեմն, ընկերներ, ինչ է իրենից ներկայացնում մեր այս կյանքը: Եկեք ծուռ նստենք, բայց շիտակ խոսենք. մեր կյանքը ողորմելի է, տքնածան և կարճատև: Մենք ծնվում ենք, մեզ մի բուռ լափ են տալիս՝ ինչ է թե շունչներս ջիշենք, նրանց, ովքեր ընդունակ են, անխնա բանեցնում են, քամելով ուժերի վերջին կաթիլը, և այն նույն պահին, երբ մեր պիտանիությունը սպառվում է, մեզ իրեշավոր անգթությամբ մորթում են: Մեկ տարին բոլորած և ո՞չ մի կենդանի Անգլիայում չգիտե, թե ինչ է երջանկությունը կամ հանգիստը: Անգլիայում և ո՞չ մի կենդանի ազատ չէ: Կենդանու կյանքն անցնում է թշվառության և ստրկության մեջ՝ ահա՝ եղելությունը:

Սակայն արդյոք սա՝ է իրերի բնականոն ընթացքը: Մի՛թե մեր այս երկիրն այնքան աղքատիկ է, որ ի վիճակի չէ ապահովել իր բնակիչների պատշաճ կյանքը: Ոչ, ընկերներ, հազար անգամ ոչ: Անգլիայի հողը բերրի է, եղանակը՝ նպաստավոր: Մեր երկիրը

կարող է պարենով լիովի ապահովել իր քնակիչ կենդանիներից բազմապատիկ ավելիին: Հենց միայն մեր ֆերման կկերակրեր տասնյակ ծիերի, քսան կովի, հարյուրավոր ոչսարների և այն է՝ կյանքի այնպիսի հարմարավետ ու արժանավայել պայմաններում, որոնք այժմ գրեթե վեր են մեր երևակայությունից: Ապա ինչո՞ւ է, ուրեմն, շարունակվում մեր այս ողորմելի վիճակը: Որովհետև մեր աշխատանքի համարյա ամբողջ արդյունքը բռնագրավվում է մարդկային ցեղի կողմից: Ահա, ընկերներ, մեր քոլոր հարցերի պատասխանը: Այն ամփոփված է միակ բառի մեջ՝ Մարդ: Մա՛րդն է մեր ունեցած միակ թշնամին: Վերացրեք ասպարեզից մարդուն, և մեր քաղցի ու շահագործման հիմնական պատճառը կչըվի հավիտյան:

Մարդը միակ արարածն է, որը սպառում է առանց արտադրելու: Նա ոչ կաթ է տալիս, ոչ՝ ձու, նա գութան քաշելու ուժ չունի, նա անկարող է անգամ ընկնել նապատակների հետևից: Եվ չնպած դրան, նա քոլոր կենդանիների տերն է: Նա անխնա բանեցնում է կենդանիներին՝ վերադարձնելով նրանց արտադրածի չնչին մի մասնիկը՝ նվազագույնը սովամահ չլինելու համար, և յուրացնում մնացածը: Մեր ջանքերով հողը մշակվում է, մեր թրիքով՝ պարարտացվում, բայց մեզնից և ոչ մեկը չի տիրում ոչնչի, սեփական կաշվից

բացի: Ահա դուք, կովեր, որ նստած եք իմ առջև, քանի՛ հազար սափոր կաթ եք տվել թեկուզ իենց վերջին տարում: Իսկ ի՞նչ եղավ այդ կաթը, որը պիտի ժիր հորթուկներ մներ: Դրա ամեն մի կաթիլ լցվեց մեր թշնամիների կոկորդը: Իսկ դուք, հավեր, քանի՛ ձու եք ածել այս տարում, և քանիսից են երբևէ ճտեր դուրս եկել: Մնացածը տարվեց շուկա, որ Զոնգի ու իր մարդկանց համար փող բերի: Իսկ դու, Երեքնուկ, որտե՛ղ են քո բերած չորս քուտակները, որ ծերության օրոք պիտի քո զորավիզն ու մխիթարությունը լինեին: Նրանցից ամեն մեկը տարին չքոլորած հանվեց վաճառքի՝ դու նրանց էլ երբեք չես տեսնի: Եվ ի՞նչ ես դու ստացել քո քուտակի երկունքի ու չարքաջ աշխատանքի դիմաց՝ ոչի՞նչ, չնչին օրաբաժնից ու գոմից բացի:

Ավելին՝ ողորմելի այս կյանքի բնական տևողությունն իսկ բռնադատվում է: Ես ինձ համար չեմ տրտնջում՝ ես երջանիկ բացառություններից եմ: Ես տասներկու տարեկան եմ և ունեցել եմ չորս հարյուրից ավել զավակներ: Եվ դա՛ է խոզի բնական կյանքը: Սակայն ոչ մի կենդանու չի հաջողվում փրկվել անգութ դանակից: Դուք, ջահել գոճիներ, որ նստած եք իմ առջև, ձեզանից ամեն մեկը մի տարի չանցած վնաստալու է սպանդանոցում: Եվ այդ արհավիրքը վիճակված է բոլորին՝ կովերին, խոզերին, հավերին, ոչխարներին,

բոլորին: Անգամ ձիերն ու շները չեն արժանանա ավելի լավ բախտի: Այ դու, Դմբուզ, այս նույն օրը, երբ քո վկիթսարի մկանները կորցնեն իրենց ուժը, Զոնզը կծախի քեզ քերթողին, որ քեզ կտոր-կտոր անեն ու խաշեն որսաշների համար: Ինչ վերաբերում է շներին՝ երբ ծերությունից նրանց ատամները թափվեն, Զոնզը նրանց վզից աղյուս կկապի ու կխեղդի մոտակա ջրափոսում:

Մի՞թե պարզից էլ պարզ չէ, ուրեմն, ընկերներ, որ մեր կյանքի բոլոր չարիքները մարդու բռնակալության հետևանք են: Վերացրեք մարդուն, և մեր աշխատանքի պտուղները մեզ կմնան: Գրեթե մեկ օրում մենք ազատ ու հարուստ կդառնանք: Ուրեմն ի՞նչ անել: Անշուշտ, գիշեր ու ցերեկ, հոգով ու մարմնով, ջանք չխնայել մարդկային ցեղը տապալելու համար: Ահա իմ պատգամը ձեզ, ընկերներ՝ Ապատամբություն: Ես չգիտեմ, թե երբ կգա Ապատամբությունը, գուցե մի շաբաթից կամ թերևս հարյուր տարուց, բայց ես գիտեմ, նույնքան ստույգ, ինչպես տեսնում եմ ուտքիս տակի հարդը, որ վաղ թե ուշ կհաստատվի արդարությունը: Մի մոռացեք այդ մասին, ընկերներ, ձեր կյանքի չնչին մնացորդների ընթացքում: Եվ, ամենակարևորը, փոխանցեք իմ այս պատգամը ձեզ հաջորդողներին, որպեսզի ապագա սերունդները պայքարը շարունակեն մինչև հաղթանակ:

Հիշեք, ընկերներ, ոչինչ չի կարող սասանել ձեր հաստատակամությունը: Ոչ մի փաստարկ չպետք է ձեզ ուղղություն տանի: Մի լսեք, երբ ձեզ հորդորեն, թե Մարդն ու կենդանիներն ընդհանուր շահեր ունեն, թե մեկի բարգավաճումը նաև մյուսի բարգավաճումն է: Բոլորը սուս է: Մարդն ուրիշ ոչ մի էակի շահ չի հետապնդում, բացի իրենից: Թող և մեր՝ կենդանիներին միջև կատարյալ միասնություն տիրի, կատարյալ ընկերություն հանուն պայքարի: Բոլոր մարդիկ թշնամի են: Բոլոր կենդանիներն ընկեր են:

Այդ պահին իսկական մի իրարանցում սկսվեց: Գնդապետի ճառ ընթացքում չորս մեծ առնետ դուրս էին սողացել իրենց ծակուններից և, հետևի թարթերին նստած, ականջ էին դնում: Շները հանկարծ նկատել էին նրանց, և առնետներին փրկել էր միայն կայծակնային փախուստը: Գնդապետը բարձրացրեց տուժիկը՝ լոռության հրավիրելով:

— Ընկերներ,— ասաց նա,— այդ հարցը պետք է քննել: Արդյոք վայրի էակները, ինչպես օրինակ, առնետներն ու նապաստակները, մեր բարեկամներ են, թե՛ թշնամին: Եկեք քվեարկենք: Ժողովին առաջարկում են հետևյալ հարցը՝ բարեկամ են արդյոք առնետները:

Տեղնուստեղը քվեարկելով՝ ճնշող մեծամասնությամբ որոշվեց, որ առնետները բարեկամ են:

Այլախոհներն ընդամենը չորսն էին՝ երեք շներն ու կատուն, որն, ինչպես պարզվեց հետագայում, երկու կողմից էլ քվեարկել էր: Գնդապետը շարունակեց.

– Ես ուրիշ ասելիք համարյա չունեմ: Պարզապես կրկնում եմ՝ երբեք չմոռանաք մարդու և նրա հետ կապված ամեն ինչի հանդեպ թշնամության պատգամը: Ամեն երկոտանի թշնամի է: Ամեն չոքոտանի կամ թևավոր՝ ընկեր է: Հիշեք նաև, որ Մարդու դեմ պայքարելով՝ մենք չպետք է նմանվենք նրան: Անգամ նրան նվաճելով՝ մի որդեգրեք նրա արատները: Ոչ մի կենդանի երրևէ չպետք է ապրի տան մեջ, կամ քնի անկողնում, հագուստ կրի, գործածի ոգելից խմիչքներ, ծխի, շփվի փողի հետ կամ առևտուր անի: Մարդու բոլոր սովորույթները չարիք են: Եվ ամենից կարևորը՝ ոչ մի կենդանի երրևէ չպետք է բռնանա իր նմանների վրա: Ուժեղ, թե տկար, խելք, թե միամիտ, մենք բոլորս եղբայրներ ենք: Ոչ մի անասուն երրևէ չպետք է սպանի մի ուրիշ անասունի: Բոլոր կենդանիները հավասար են:

Իսկ այժմ, ընկերներ, ես կպատմեմ ձեզ երեկվա իմ երազը: Ես չեմ կարող այն ձեզ նկարագրել: Դա երազ էր այն երկրի մասին, որը կգա, երբ վերանա Մարդը: Այդ երազն ինձ հիշեցրեց վաղուց մոռացված մի բան: Շատ տարիներ առաջ, երբ ես փոքրիկ մի

խոճկոր էի, մայրս և ուրիշ մերունները մի իին երգ էին երգում, որի միայն մեղեղին գիտեին և առաջին երկու բառը: Ես էլ էի սովորել այդ մեղեղին, բայց այն վաղուց արդեն ջնջվել էր իմ հիշողությունից: Բայց և այնպես, անցյալ գիշեր երազում ես նորից այն գտա: Ավելին՝ խոսքերը նույնպես վերադարձան: Վստահ եմ, որ կենդանիներն անհիշելի ժամանակներից են երգել այդ երգը, բայց հետագա սերունդները կորցրել են խոսքերը: Ընկերներ, իմաստ ես ձեզ համար կերգեմ այդ երգը: Ես ծեր եմ և իմ ձայնը՝ խոպոտ, բայց երբ ես մեղեղին ձեզ սովորեցնեմ, դուք ավելի լավ կերգեք: Երգը կոչվում է «Անգլիայի գազանները»:

Ծեր Գնդապետը մաքրեց կոկորդն ու սկսեց երգել: Զայնը, ինչպես և զգուշացրել էր, խոպոտ էր, բայց նա բավական լավ էր երգում, իսկ մեղեղին հուզիչ էր՝ «Clementine»-ի և «La Cucuracha»-ի միջև ընկած մի բան: Ահա բառերը.

*O՛, գազաններ Անգլիայի  
Եվ գազաններ ողջ աշխարհի,  
Ավելին եմ բերել ես ձեզ  
Մեր գալիքի ուկեղարի:*

*Շուպով անդարձ կուսպալի  
Բոնակալ Մարդը չարանենգ,*

Եվ բերդի հողն Անգլիայի  
Մենք, միայն մենք կկոխսկրթենք:

Կընկնի լուծը մեր ուսերից,  
Կժանսգողեն սանձ ու լկամ,  
Կիշրվեն բիրու մեղրակներն  
Ու շղթանեղը աղոկական...

Այդ օրը մերը կլինեն  
Լափն ու կերը ողջ աշխարհի –  
Առվույպ լինի, թարմ ճակնդեղ,  
Շե անհապնում խոր ու զարի...

Ազագության այդ մեծ գունին  
Ջրերն ուրախ կկարկաչեն,  
Լոյսն ավելի վառ կշողա,  
Դաշտ ու արոտ կկանաչեն:

Կովեր, ձիեր, սագ ու հավեր,  
Առաջ հանուն ազագության,  
Եթե անգամ մարդում զոհվենք,  
Զորեսած օրն այդ Փրկության:

Օ՛, զազաններ Անգլիայի  
Եվ զազաններ ողջ աշխարհի,  
Ավելիսն եմ բերում ես ձեզ  
Մեր նոր կյանքի ուկեղարի:

Երգն ալեկոծեց կենդանիներին: Գնդապետը դեռ չէր հասցրել վերջացնել, երբ նրանք սկսեցին երգել: Նույնիսկ ամենից տիսմարներն ընկալել էին մեղեղին և որոշ խոսքերը, իսկ խելացիները՝ ինչպես, օրինակ, խոզերը կամ շները, ամբողջ երգն արդեն անգիր էին արել: Ի վերջո, մի քանի նախնական փորձից հետո, ամբողջ ֆերման միաձայն պողմակաց «Անգլիայի գաղանները»: Կովերն այն բառացում էին, շները՝ կաղկանձում, ոչխարները՝ մայում, ձիերը՝ խրխնջում, բաղերը՝ կոկոսում: Երգն այն աստիճան բոլորի սրտովն էր, որ երգեցին հինգ անգամ անընդմեջ, և թերևս շարունակեին ամբողջ գիշեր, եթե նրանց չընդհատեին: Դժբախտաբար աղմուկն արթնացրել էր միատր Զոնգին, որն անկողնուց վեր էր ցատկել, միանգամայն վստահ, թե բակն աղվես է մտել: Նա ճանկեց ննջարանի անկյունում մշտապես դրված իր հրացանն ու 6 համարի կոտորակը պարպեց մթության մեջ: Գնդակները մխրճվեցին ամբարի պատը, և ժողովը շտապ կարգով ցրվեց: Ամեն մեկը պատսպարվեց իր քննելու տեղում: Ժոշունները ցատկեցին իրենց թառերին, անասունները թաղվեցին հարդի մեջ, և քիչ անց ամբողջ ֆերման խոր քուն մտավ:

## ԳԼՈՒԽ 2

Երեք գիշեր անց ծեր Գնդապետը քնի մեջ խաղաղ վախճանվեց: Նրան թաղեցին բռատանում:

Մարտի սկիզբն էր: Հաջորդ երեք ամիսները լցվեցին ակտիվ ընդհատակյա գործունեությամբ: Գնդապետի ճառը ֆերմայի առավել խելացի անասուններին հիմնովին նոր աշխարհայացք էր պարզեց: Նրանք չգիտեին, թե երբ է գալու Գնդապետի կանխագուշակած Ապստամբությունը և հիմքեր չունեին կարծելու, թե այն պիտի հենց իրենց կյանքի ընթացքում լինի, սակայն պարզ գիտակցում էին այն նախապատրաստելու իրենց պարտքը: Մնացածներին կազմակերպելու և քարոզելու աշխատանքը բնականաբար վիճակվեց խոզերին, որոնք բոլորի կողմից ճանաչված էին որպես անասուններից ամենախելացիները: Խոզերի մեջ ամենից շատ աչքի էին ընկնում երկու երիտասարդ արու՝ Զնագնդին ու Նապոլեոնը, որոնց միստր Զոնզը բուծում էր վաճառքի

հանելու համար: Նապոլեոնը խոշոր, կատաղի տեսքով բերքշիրյան մի կինճ էր, ֆերմայում բերքշիրյան ցեղի միակ նմուշը, սակավախոս, բայց իր ուզածին հասնողի համբավով: Զնագնդին ավելի աշխույժ էր, ավելի պերճախոս և հնարամիտ, սակայն, ըստ ընդհանուր կարծիքի, պակաս կուռ խառնվածքի տեր: Ֆերմայի բոլոր մնացած արու խոզերը մսացու էին: Դրանցից ամենահայտնին Զոանն էր՝ փոքրիկ գիրով մի խոզ, կլոր այտերով, պրապտոն աչքերով, ժիր շարժուձևով և բացառիկ զիջ ձայնով: Նա փայլուն բանախոս էր, և, որևէ խրթին հարց քննելիս, սովորություն ուներ տեղից տեղ ցատկել և պոչը շարժել, որը բավական համոզիչ էր: Զոանի մասին ասում էին, որ նա կարող է սկը սպիտակ դարձնել:

Նրանք երեքով մշակեցին ծեր Գնդապետի ուսմունքը՝ վերածելով մի ավարտոն, բանական համակարգի, որն անվանեցին Անասնիզմ: Շաբաթական մի քանի գիշեր, երբ միստր Զոնզը քոն էր մտնում, նրանք ամբարում գաղտնի ժողովներ էին վարում՝ լուսաբանելով Անասնիզմի հիմունքները: Սկզբում նրանք դեմ առան բացառիկ տխմարության ու անտարբերության: Անասուններից ոմանք վկայակոչում էին միստր Զոնզին հավատարիմ մնալու պարտքը՝ «Տեր» կոչելով վերջինիս, մյուսները

տարրական դիտողություններ էին անում, ինչպես, ասենք. «Միստր Զոնզը կերակրում է մեզ: Եթե նա չինի, մենք սովամահ կլինենք»: Ուրիշներն ասում էին. «Մեր ի՞նչ գործն է, թե մեր մահից հետո ինչ կլինի», կամ հարցնում. «Եթե Ապստամբությունն անխուսափելի է, էլ ինչ տարբերություն, մենք դրա համար կպայքարենք, թե՛ ոչ»: Խոզերից մեծ ջանքեր էր պահանջվում պարզաբանելու համար, որ այդ ամենը հակասում է Անասնիզմի ոգուն: Ամենից տիսմար հարցերը տալիս էր Մոլլին՝ սպիտակ զամբիկը: Զնագնդուն ուղղված նրա առաջին խսկ հարցն էր. «Ապստամբությունից հետո շաքար կլինի»:

– Ոչ, – վճռական ասաց Զնագնդին, – մենք այս ֆերմայում շաքար արտադրելու հնարավորություն չունենք: Բացի այդ, դուք շաքարի կարիք չեք էլ ունենա: Դուք ինչքան հարկն է գարի ու հարդ կունենաք:

– Խսկ ինձ թույլ կտրվի՞ բաշիս մեջ ժապավեններ կրել, – հարցրեց Մոլլին:

– Ընկեր, – ասաց Զնագնդին, – ձեր սրտին այդքան մոտ ժապավենները ստրկության կնիք են: Մի՛թե չեք կարող հասկանալ, որ ազատությունը ժապավեններից թանկ է:

Մոլլին համաձայնվեց, սակայն այնքան էլ համոզված տեսք չուներ:

Խոզերը ստիպված էին ավելի դժվարին պայքար մղել Մովսեսի՝ ձեռնասուն ագռավի տարածած ստերի դեմն առնելու համար: Մովսեսը՝ միստր Զոնզի սիրեցյալը, լրտես էր ու փշան, բայց միևնույն ժամանակ նաև խելացի հոեստոր էր: Նա պնդում էր, որ գիտե խորհրդավոր մի երկրի՝ Շաքարաքլոր Լեռան գոյության մասին, ուր մահից հետո հայտնվում են բոլոր անասունները: Երկիրն այդ գտնվում էր ինչ-որ տեղ երկնքում, ամպերից քիչ վեր, ասում էր Մովսեսը: Շաքարաքլոր Լեռան վրա շաբաթական յոթ օր կիրակի է, կլոր տարի կանաչում է երեքնուկը, իսկ թփերի վրա աճում են կտոր շաքար ու կտավատի սերմերից կերսեր: Անասունները Մովսեսին չեն սիրում, որովհետև նա հեքիաթներ էր պատմում ու չէր աշխատում, բայց ոմանք հավատում էին Շաքարաքլոր Լեռան գոյությանը, և խոզերը ստիպված էին բացատրական ակտիվ աշխատանք տանել համոզելու համար, որ նման վայր գոյություն չունի: Նրանց ամենահավատարիմ աշակերտները երկու լծկան ձիերն էին՝ Դմբուզն ու Երեքնուկը: Այս երկուաշ մեծագույն դժվարությամբ էին սեփական մտքեր ծնում, սակայն, խոզերին ուսուցիչ ընդունելուց հետո, հեշտությամբ ընկալեցին ուսմոնքը և տարրական փաստարկների միջոցով սկսեցին տարածել մնացած անասունների

մեջ: Նրանք անխտիր ներկա էին բոլոր գաղտնի ժողովներին և առաջինն էին սկսում «Անզլիայի գազան-ները», որով միշտ ավարտվում էին այդ ժողովները:

Այնպես ստացվեց, որ Ապստամբությունը գլուխ եկավ շատ ավելի վաղ և դյուրին, քան որևէ մեկը կարող էր ակնկալել: Անցյալում միատր Զոնզը, չնայած իր անխղճությանը, ընդունակ ֆերմեր էր, սակայն վերջերս նրա համար վատ օրեր էին սկսվել: Դատական գործի հետ կապված զգալի գումար կորց-նելով՝ նա թևաթափ էր եղել և սկսել էր խմել ավելին, քան կարող էր տանել: Երբեմն նա օրերով մնում էր խոհանոցի իր աթոռին փոված, լրագրեր կարդա-լով, խմելով և մեկ-մեկ էլ Մովսեսին գարեջրի մեջ թաթախած հացի փշրանքներ տալով: Նրա աշխա-տավորները ծովյլ էին ու խարդախ, դաշտերը՝ մոլա-խոտերով լի, շինությունները՝ նորոգման կարիք էին զգում, ցանկապատերը բարձիթողի վիճակում էին, իսկ անասունները՝ սոված:

Հունիսին հասավ խոտինձի ժամանակը: Շաբաթ օրով միատր Զոնզը գնաց Վիլինգդոն և այնպես հարբեց գինետանը, որ տուն չհասավ մինչև հաջորդ կեսօր: Նրա աշխատավորներն առավոտյան կովե-րին կթել ու թողել-գնացել էին նապաստակ բռնելո՛ առանց անասուններին կերակրելու: Տուն գալուն պես

միստր Զոնզը փովեց հյուրասենյակի թախտին, **Աշ-Խարիի լուրերը** դեմքին խոնմիացնելով, այնպես որ իրիկնամուտին անասուններին դեռևս ոչ ոք չէր կերակրել: Վերջիվերջո, նրանց համբերությունը հատնեց: Կովերից մեկը պողահարեց շտեմարանի դուռը, և անասունները հարձակվեցին պաշարների վրա: Ահա այստեղ էր, որ միստր Զոնզն արթնացավ: Հաջորդ ակնթարթին նա իր աշխատավորների հետ արդեն շտեմարանում էր՝ աճ ու ձախ մտրակելով: Նրան դիմանալը քաղցած անասունների ուժերից վեր էր: Միասնական մի պողքկումով, չնայած նախօրոք ոչ մի նման բան չէր ծրագրված, նրանք նետվեցին իրենց կեղեքիների վրա: Զոնզն ու իր մարդիկ հանկարծ հայտնվեցին քացի տվող ու պողահարող շրջանի կենտրոնում: Նրանք այլս չին տնօրինում իրավիճակը: Անասունների նման վարքագիծ նրանք երբեք չին տեսել և քիչ էր մնում վախից խելքները կորցնեին այն էակների անսպասելի ըմբոստացումից, որոնց մինչ այդ սովոր էին քեֆներն ուզածի պես մտրակել ու քամահրել: Մեկ-երկու պահ չանցած՝ նրանք դադարեցրին պաշտպանվելու ապարդյուն փորձերը և թողեցին-փախան: Հաջորդ րոպեին իինզն էլ լեղապատառ սուրում էին մայրուղի տանող ճանապարհով, իսկ անասունները ցնծագին հետապնդում էին նրանց:

Միսիս Զոնզը, այդ ամենը տեսնելով ննջարանի պատուհանից, հապճեպ մի երկու փալաս հավաքեց և ուրիշ ճանապարհով ֆերմայից դուրս սպրդեց: Մովսեսն իր ցցից վեր թռավ ու հետևեց նրան՝ բարձր կոկոալով: Այդ ընթացքում անասունները Զոնզին ու իր մարդկանց արդեն ֆերմայի սահմաններից դուրս էին քշել՝ նրանց հետևից թրիսկացնելով հնգահեծան դարպասը: Այսպիսով, թեպետ դեռ ոչ ոք չէր հասցրել գիտակցել կատարվածը, Ապստամբությունն ամենայն հաջողությամբ իրագործվեց՝ Զոնզը վոնդված էր, և «Մենը» ֆերման իրենցն էր:

Առաջին րոպեներին անասուններն իրենց բախտին չէին հավատում: Նախ և առաջ նրանք միասին վազքով շրջանցեցին ամբողջ ֆերման, ասես համոզվելու համար, որ ոչ մի մարդ այնտեղ չի ծպտվել, ապա հետ վազեցին շինությունների մոտ, որպեսզի բնաջնջեն Զոնզի ատելի իշխանության վերջին հետքերը: Նրանք ջարդեցին գոմի պահասենյակի դուռը՝ լկամները, քթօղակները, շների շղթաները, անգութ դանակները, որոնցով Զոնզը կոտում էր խոզերին ու գառներին. այդ ամենը նետվեց ջրհորը: Սանձերը, ակնակապերը, նվաստացուցիչ քթապարկերը շպրտվեցին բակում վառվող աղբախարույկի մեջ: Դրանց հետևեցին նաև մտրակները:

Բոլոր անասունները թոշկոտում էին ցնծությունից՝ տեսնելով մտրակները խժող բոցը: Զնազնդին կրակի մեջ գցեց նաև շուկա գնալիս սովորաբար ձիերի բաշերը զարդարող ժապավենները:

– Ժապավենները, – ասաց նա, – համարվելու են հագուստ, իսկ դա մարդու հատկանիշ է: Բոլոր անասունները պետք է մերկ լինեն:

Դա լսելով՝ Դմբուզը բերեց փոքրիկ ծղոտե մի գլխարկ, որն ամուսնը պաշտպանում էր նրա ականջները ճանճերից, և մնացածի հետ այն նետեց խարույկի մեջ:

Շատ չանցած անասունները ոչնչացրին այն ամենը, ինչ հիշեցնում էր միստր Ջոնզի մասին: Դրանից հետո Նապոլեոնը նրանց առաջնորդեց շտեմարան և բոլորին կրկնակի բաժին հացահատիկ բաշխեց, իսկ շներին՝ երկուական բլիթ: Ապա նրանք յոթ անգամ ծայրից ծայր երգեցին «Անգլիայի գագանները», որից հետո պառկեցին և քնեցին այնպես, ինչպես մինչ այդ երբեք չէին քնել:

Սովորականի պես առավոտյան արթնանալով և հանկարծ վերիիշելով փառավոր եղելությունը՝ բոլոր միասին դուրս վազեցին արոտավայր: Դաշտի մեջ մի բլրակ կար, որից երևում էր համարյա ամբողջ ֆերման: Անասունները նետվեցին բլրակի գագաթը

և այգաբացի ջինջ լուսի ներքո սկսեցին չորս կողմ նայել: Այո, այն ամենն, ինչ նրանք տեսնում էին, իրենցն էր: Այդ մտքի պարզևած բերկրանքից նրանք անդադար թռչկոտում էին բրակի շուրջը՝ հսկա ցնծագին ուստյուններով օդ նետվելով: Նրանք թափալվում էին եղյամի մեջ, ամառային քաղցր խոտ ճաշակում, վեր էին նետում սևահողն ու ըմբոշխնում նրա թարմ հոտը: Նրանք ստուգայցով շրջեցին ամբողջ ֆերման՝ անխոս հիացմունքով դիտելով վարելահողը, արոտը, բուստանը, լճակը, անտառուտը, ասես առաջին անգամ տեսնելով և նոյնիսկ այժմ չհավատալով, որ այդ ամենն իրենց է պատկանում:

Ապա նրանք վերադարձան ֆերմայի կառույցների մոտ և կանգ առան տան մուտքի առջև: Տունը նույնպես իրենցն էր, չնայած վախենում էին ներս մտնել: Ինչնէ, հաջորդ պահին Նապոլեոնը և Զնագնդին ուսերով իրեցին դուռը, և անասունները շարքով ներս մտան՝ որևէ բան վնասելու երկյուղից ծայր աստիճան զգույց շարժվելով: Կճղակների ծայրերի վրա նրանք շրջեցին սենյակից սենյակ՝ վախենալով բարձր խոսել, մի տեսակ երկյուղածությամբ դիտելով անհավատալի շքեղությունը՝ փետուրե ներքնակներով անկողինները, հայելիները, բազմոցը, բրյուսելյան խալին, Վիկտորիա

թագուհու վիմագրությունը հյուրասենյակի բուխարու վրա: Նրանք արդեն իջնում էին աստիճաններով, երբ հայտնաբերեցին, որ պակասում է Մոլլին: Ետ վերադառնալով, նրան գտան ննջասենյակում: Միսիս Զոնզի զարդասեղանից մի կապույտ ժապավեն դնելով ուսին՝ նա հայելու մեջ զմայլվում էր իր հիմար արտացոլումով: Մնացածները խստիվ հանդիմանեցին նրան, և բոլորը միասին տնից դուրս եկան: Ճանապարհին վերցրին խոհանոցում կախված ապիստած բդերը և դուրս տարան թաղելու, իսկ Դմբուզը ամբակով ծակեց լվացքասենյակի գարեջրի տակառը: Մնացած ամեն ինչ մնաց անձեռնամուխ: Տեղում միաձայն որոշում ընդունվեց՝ տունը պահպանել որպես թանգարան: Բոլորը համաձայնվեցին, որ ոչ մի անասուն տանը երբեք չպիտի ապրի:

Նախաճաշից հետո Զնագնդին և Նապոլեոնը նորից բոլորին հավաքեցին:

— Ընկերներ,— ասաց Զնագնդին,— դեռևս վեցն անց կես է և առջևում մեզ երկար օր է սպասվում: Այսօր մենք սկսում ենք խոտհունձը: Սակայն մինչ այդ մենք ևս մեկ խնդիր ունենք:

Այստեղ խոզերը բացահայտեցին, որ անցած երեք ամսվա ընթացքում նրանք աղբակույտում գտած Զոնզի երեխաների նախկին այբբենարանով

գրել և կարդալ են սովորել: Նապոլեոնն ուղարկեց սև և սպիտակ ներկ բերելու և բոլորին առաջնորդեց հնգահեծան դարպասի մոտ: Ապա Զնագնդին (քանի որ ամենագրագետը նա էր) վրձինը սեղմեց իր տոտիկի երկու հողերի միջև, դարպասի վերին գերանից ջնջեց «ՄԵՆԸՐ ՖԵՌՄԱ» գրությունը և փոխարենը գրեց. «ԱՆԱՍՆԱՖԵՌՄԱ»: Այդուհետև ֆերման այդպես էր կոչվելու: Դրանից հետո նրանք վերադարձան շինությունների մոտ, ուր Զնագնդին և Նապոլեոնը կարգադրեցին սանդուղք բերել և դեմ տալ ամբարի պատին: Նրանք բացատրեցին, որ անցած երեք ամսվա պրատումներից հետո խոզերին հաջողվել է Անասնիզմի իիմունքները շարադրել Յոթ Պատվիրաններում: Այժմ այդ Յոթ Պատվիրանները պիտի գրանցվեն պատին՝ վերածվելով անխախտ մի օրենքի, որով Անասնաֆերմայի բոլոր անասունները պարտավոր են այսուհետև առաջնորդվել հավիտյան: Որոշ դժվարությամբ (քանի որ խոզի համար հեշտ չէ սանդուղքի վրա հավասարակշռություն պահպանելը) Զնագնդին վեր բարձրացավ և անցավ գործի, մինչ Զուանը փոքր-ինչ ներքև ներկի դույլն էր պահել: Պատվիրանները սև պատի վրա գրվեցին խոշոր սպիտակ տառերով, որոնք կարդացվում էին երեսուն մետրից:

### ՅՈՇ ՊԱՏՎԻՐԱՆՆԵՐ

1. Բողոք երկուդանիները թշնամի են:
2. Բողոք չորքուդանիները կամ թևավորները բարեկամ են:
3. Անաստաֆ երբեք հագուստ չի հազնի:
4. Անաստաֆ երբեք անկողնում չի քնի:
5. Անաստաֆ երբեք ոգելից խմիչք չի գործածի:
6. Անաստաֆ երբեք որիշ անաստանի չի սպանի:
7. Բողոք անաստանները հավասար են:

Ամեն ինչ լավ էր գրված, և, եթե չհաշվենք, որ «բարեկամ»-ը գրված էր «բարիկամ», իսկ «տ»-երից մեկը շուրջ էր տրված, ուղղագրությունն անթերի էր: Զնագնդին բոլորի համար բարձրաձայն կարդաց գրությունը: Բոլոր անաստանները գլխով էին անում ի նշան հավանության, իսկ ամենից խելացիները սկսեցին հենց տեղում անգիր անել Պատվիրանները:

– Իսկ այժմ, ընկերներ, – ասաց Զնագնդին՝ վրձինը ցած նետելով, – դեպի դաշտ: Եկեք մեր պատվի խնդիրը դարձնենք խոտը հնձել ավելի արագ, քան կարող էին քոնզն ու իր մարդիկ:

Սակայն այդ պահին երեք կովերը, որոնք արդեն բավական ժամանակ անհանգիստ էին, սկսեցին բառաչել: Նրանց արդեն քանչորս ժամ չէին կթել, և նրանց կուրծերը քիչ էր մնում պայթեին: Որոշ մտորումներից հետո խոզերն ուղարկեցին դույլեր բերելու

և կովերին բավական հաջող կթեցին՝ նրանց տոտիկ-ներն այդ գործի համար հարմար էին:

- Իսկ կաթն ի՞նչ է լինելու,- հարցրեց ինչ-որ մեկը:
- Զոնզը երբեմն մի քիչ խառնում էր մեր կուտին,- ասաց հավերից մեկը:
- Այժմ էականը կաթը չէ, ընկերներ,- գոռաց Նապոլեոնը՝ դույլերի առջև կանգնելով:- Դրանով կզբաղվեն: Խոտիունն իհմա ավելի կարևոր է: Ընկեր Զնագնդին ձեզ կառաջնորդի: Մի քանի րոպեից ես կմիանամ ձեզ: Առաջ, ընկերներ: Արտը մեզ է սպասում:

Եվ այսպես, անասունները գնացին արտ խոտ-իունն սկսելու, իսկ երբ երեկոյան վերադարձան, կաթն անհետացել էր:

## ԳԼՈՒԽ 3

Պիտի տեսնեիք, թե ինչպես էին նրանք քրտնաջան աշխատում խոտը հնձելու համար: Սակայն նրանց շանքերը լիովին վարձատրվեցին, որովհետև խոտհոնն ավելի հաջող ընթացավ, քան ակնկալվում էր:

Դժվարություններ կային՝ չէ՝ որ գործիքները նախատեսված էին մարդու համար, ոչ թե անսառունների, և այն փաստը, որ նրանցից ոչ մեկն ի վիճակի չեր կանգնել հետևի ոտքերի վրա, մեծ թերություն էր: Բայց խոզերն այնքան խելացի էին, որ ամեն դժվարությունից գտնում էին համապատասխան ելքը: Ինչ վերաբերում է ձիերին, ապա նրանք ճանաչում էին դաշտի ամեն մի թիզը, և, փաստորեն, հնձելու ու դիզելու գործն ավելի լավ գիտեին, քան երբեմն կկարողանային Զոնզն ու իր մարդիկ: Խոզերը որոշակի աշխատանք չէին կատարում, բայց վերահսկում ու դեկավարում էին մնացածներին: Նրանց հարուստ

գիտելիքներով հանդերձ միանգամայն բնական էր, որ հենց իրենք պիտի ստանձնեին ղեկավարությունը: Դմբուզն ու Երեքնուկը լծվում էին հնձանին (լկամի կամ սանձերի կարիք, ինչ խոսք, այդ օրերին չեր զգացվում) ու դոփում դաշտով մեկ: Նրանց հետևից քայլում էր խոզերից մեկն ու ըստ հանգամանքների բացականչում «Ընկեր, չը՞», կամ «Ընկեր, հո՞»: Անաստուններից ամեն մեկը, անգամ ամենից նվաստները, օգնում էին խոտը հնձելուն ու դիզելուն: Նույնիսկ բադերն ու հավերը ամբողջ օրն արևի տակ դես ու դեն էին անում՝ կտուցներում ծղոտներ կրելով: Ի վերջո, նրանք խոտիունն ավարտեցին Զոնզի և իր մարդկանց սովորական ժամկետից երկու օր շուտ: Դեռ ավելին՝ կոտակված հարդն ամենաշատն էր ֆերմայի ամբողջ պատմության ընթացքում: Ոչինչ չեր կորել՝ հավերն ու բադերն իրենց կտուցներով ու սուր աչքերով հավաքել էին վերջին ծղոտն անգամ: Անաստուններից ոչ մեկը կես բերան անգամ չեր յուրացրել:

Ամբողջ ամառ ֆերմայի աշխատանքներն ընթանում էին ժամացույցի ճշտությամբ: Անաստունները երջանիկ էին, իրենց երբեմն երևակայած հնարավորից առավել: Ամեն կերակուր սուր հաճույքի աղբյուր էր՝ այժմ, երբ ամբողջ ուտելիքն իսկապես իրենցն էր, սեփական աշխատանքի արդյունքը, և ոչ թե բաշխվում

Էր տիրոջ դժկամ ձեռքով։ Պորտաբույծ ու անպետք մարդկանց վերանալու հետ ավելացել էր նաև սննդի քանակը։ Ազատ ժամանակը նույնպես շատացել էր, չնայած անասուններն այդ հարցում դեռևս անփորձ էին։ Ավելի ուշ, բերքահավաքին, անասունները բազմաթիվ դժվարությունների առնչվեցին, օրինակ՝ ստիպված եղան հացահատիկը սմբակներով ծեծել և թեփն անջատել փչելով, քանի որ ֆերմայում կալսիչ չկար, բայց խոզերն իրենց խելքով և Դմբուզն իր ամենի մկաններով ամեն անգամ փրկում էին իրադրությունը։ Բոլորը զմայլվում էին Դմբուզով։ Նա լավ աշխատող էր նույնիսկ Զոնզի ժամանակներում, իսկ այժմ կարծես երեք ծի դարձած լիներ՝ պատահում էին օրեր, երբ ֆերմայի ամբողջ աշխատանքը նրա ամուր ուսերին էր։ Առավոտից երեկո նա քաշում էր ու ձգում՝ միշտ հայտնվելով այնտեղ, որ աշխատանքն ամենից ծանրն էր։ Նա պայմանավորվել էր աքլորներից մեկի հետ, որ վերջինս իրեն արթնացնի մնացածներից կես ժամ շուտ, և այդ ընթացքում կամավոր որևէ պիտանի գործ էր անում, նախքան առօրյա աշխատանքը սկսելը։ Ցանկացած հարցի, ամեն դժվարության նա պատասխանում էր մի նախադասությամբ։ «Ես ավելի եռանդուն կաշխատեմ»՝ դարձնելով այն իր անձնական նշանաբանը։

Ամեն մեկն աշխատում էր ուժերի ներածին չափ: Հավերն ու բաղերը, օրինակ, բերքահավաքի ընթացքում թափված հատիկները հավաքելով՝ հինգ բուշել ցորեն խնայեցին: Ոչ ոք չէր գողանում, ոչ ոք իր բաժնի վրա չէր փնտիկնեցում: Հին կյանքի համար բնական գզվուոցն ու նախանձը համարյա վերացել էին: Գլուխ պահողներ չկային կամ գրեթե չկային: Ճիշտ է, Մոլլին լուսաբացին արթնանում էր դժկամությամբ, իսկ աշխատանքից հեռանում էր սովորականից շուտ՝ պատրվակ բռնելով սմբակի միջի քարը: Կատվի վարքագիծը նույնական յուրօրինակ էր: Շուտով նկատեցին, որ գործ լինելու դեպքում նրան ոչ մի կերպ գտնել չէր լինում: Կատուն ժամերով չքվում էր, սակայն միշտ, կարծես թե ոչինչ չի եղել, հայտնվում էր ճաշի կամ հանգստի ժամերին, երբ ամեն ինչ արդեն արված էր լինում: Բայց նա միշտ անթերի պատճառաբանություններ էր ներկայացնում և այնքան սիրալիր էր մոլտում, որ նրա մտադրությունների ազնվությունը կասկածի տակ առնել հնարավոր չէր: Ծեր Բենիամինը՝ ավանակը, թվում էր, թե Ապստամբության օրերից ամենսկին չէր փոխվել: Նա աշխատում էր նոյն համար դանդաղկոտությամբ, ինչ և Զոնզի ժամանակ, առանց գլուխ պահելու, բայց և առանց ավելորդ խանդավառության: Ապստամբության

և նրա արդյունքների մասին նա ոչ մի կարծիք չէր հայտնում: Երբ հարցնում էին, թե արդյոք նա ավելի երջանիկ չէ հիմա, երբ Զոնզը չկա, նա սուկ ասում էր. «Եշերը շատ երկար են ապրում: Ձեզանից ոչ մեկը դեռ սատկած էշ տեսած չկա»: Բոլորը ստիպված էին բավարարվել այդ առեղծվածային պատասխանով:

Կիրակի օրերն աշխատանք չկար: Նախաճաշը մեկ ժամով ուշ էր լինում, որից հետո սկսվում էր անխտիր ամեն շաբաթ անցկացվող արարողությունը: Սկզբում բարձրացվում էր դրոշը: Գոմի պահասենյակում Զնագնդին գտել էր միստր Զոնզի հին կանաչ սփոռոցը և վրան սպիտակ ներկով կճղակ ու պոզ էր նկարել: Ամեն կիրակի առավոտ դրոշը հանդիսավոր կերպով բարձրացվում էր տան հետևի պարտեզում: Դրոշի կանաչ գույնը, բացատրում էր Զնագնդին, մարմնավորում է Անգլիայի արոտները, իսկ կճղակն ու պոզը խորհրդանշում են ապագա Անասնական հանրապետությունը, որը պիտի հաստատվեր մարդկային ցեղի վերջնական տապալումից հետո: Դրոշի արարողությունից հետո բոլոր անասունները լցվում էին մեծ ամբարը ընդհանուր հավաքի, որը կոչվում էր Միտինգ: Այստեղ պլանավորվում էր գալիք շաբաթվա աշխատանքը, առաջարկվում և քննարկվում էին բանաձևերը: Բանաձևերը միշտ խոզերն էին առաջ

քաշում: Մյուս անասունները հասկացել էին քվեարկելու էությունը, բայց իրենք երբեք բանաձև հորինել չէին կարողանում: Չննարկումների ընթացքում ամենամեծ ակտիվությունը ցուցաբերում էին Զնագնդին ու Նապոլեոնը: Ստացվել էր այնպես, որ այս երկուար երբեք համաձայնության չէին գալիս՝ եթե մեկը մի առաջարկ էր անում, մյուսն անպայման դրան հակադրում էր: Երբ որոշվեց (որին ինքնին ոչ ոք չէր կարող հակադրովել) բոստանի հետևի փոքրիկ ցանկապատած տարածքը հատկացնել որպես տարիքն առած անասունների հանգստավայր, անգամ այդ դեպքում փոքրորկուտ բանավեճ բռնկվեց անասունների տարրեր դասերի հանգստի անցնելու ճշգրիտ տարիքների շուրջ: Միտինգները միշտ ավարտվում էին «Անգլիայի գազանները» երգով, և օրվա մնացած մասը նվիրվում էր հանգստին: Պահասենյակը խոզերն առանձնացրին որպես սեփական շտաբ: Այստեղ նրանք երեկոները տնից բերված գրքերով ուսումնասիրում էին դարբնություն, փայտամշակում և այլ անհրաժեշտ արհեստներ: Զնագնդին նաև զբաղվում էր մյուս անասուններին կազմակերպելով իր այսպես կոչված Անասնական Կոմիտեների մեջ՝ երբեք չհոգնելով այդ աշխատանքից: Նա կազմեց Զվաստեղծ Կոմիտե հավերի համար, Մաքուր Պոչերի Միություն՝ կովերի

համար, Վայրի Ընկերների Վերապատրաստման Կոմիտե (վերջինիս նպատակն առնետներին ու նապաստակներին ընտելացնելն էր), Առավել ճերմակ Բրդի Կոմիտե՝ ոչսարների համար և նման շատ ուղիներ, չհաշված գրել-կարդալու դասընթացները: Ընդհանուր առմամբ, սակայն, այդ նախաձեռնությունները հաջողությամբ չպակվեցին: Վայրի ընկերներին ընտելացնելու փորձը ձախողվեց հենց սկզբից: Նրանք իրենց շարունակում էին առաջվա պես պահել՝ պարզապես օգտվելով կոմիտեի առատաձեռնությունից: Կատուն անդամագրվեց Վերապատրաստման Կոմիտեին և որոշ ժամանակ ակտիվ աշխատանք էր ծավալել: Նրան տեսել էին կտորին նստած ծիծեռնակների հետ բացատրական աշխատանք տանելիս: Նա պատմում էր, որ բոլոր կենդանիներն արդեն ընկերներ են, և որպես ապացույց ցանկացած ծիծեռնակ կարող է գալ ու հանգիստ թառել թեկուզ իր թաթին: Ծիծեռնակները նախընտրում էին չմոտենալ:

Ինչևէ, գրել-կարդալու դասընթացները մեծ հաջողություն էին վայելում: Աշնան դեմ համարյա բոլոր անասուններն արդեն քիչ թե շատ գրագետ էին:

Ինչ վերաբերում է խոզերին, ապա նրանք կատարելապես տիրապետել էին գրագիտությանը: Ծները նույնպես բավական լավ էին կարդում, բայց

Յոթ Պատվիրաններից բացի ուրիշ ոչ մի ընթերցանությամբ չէին հետաքրքրվում: Մյուրիել այծը շներից փոքր-ինչ լավ էր կարդում և երբեմն երեկոյան մյուսների համար կարդում էր աղբակույտում գտած լրագրերի պատառները: Բենխամինը խոզերից պակաս գրագետ չէր, սակայն երբեք չէր բանեցնում իր իմացությունը: Որքանով որ ինքը գիտի, ասում էր նա, կարդալու արժանի ոչ մի բան չկա: Երեքնուկն ամբողջ այբուբենը սովորել էր, բայց բառեր կազմել չէր կարողանում: Դմբուզը Դ տառից այն կողմ չէր անցնում: Նա փոշու մեջ իր խոշոր ամբակով գծում էր Ա, Բ, Գ, Դ, ապա, ականջները ցցած՝ հայացքը հառում այդ տառերին, երբեմն թափ տալով բաշը, ամբողջ ուժով ջանալով ու չկարողանալով վերհիշել, թե ինչ է գալիս հետո: Ժեպետ մի քանի անգամ նրան խսկապես հաջողվել էր սովորել Ե, Զ, Է, Ը-ն, բայց նա միշտ հայտնաբերում էր, որ այդ դեպքում արդեն չի հիշում Ա, Բ, Գ և Դ-ն: Վերջապես նա որոշեց բավարարվել առաջին չորս տառով և օրը մեկ-երկու անգամ դրանք գրում էր, որ հիշողությունը թարմացնի: Մոլիխն հրաժարվեց սովորել իր անունը գրելու համար պահանջվող հինգ տառից ավելին: Նա փոքրիկ ճյուղերից խնամքով շարում էր անունը, ապա ծաղիկներով զարդարում ու զմայլվելով պտտվում շուրջը:

Ֆերմայի մնացած անասուններից ոչ մեկը չկարողացավ Ա տառից այն կողմ անցնել: Պարզվեց նաև, որ առավել բթամիտ անասունները, ինչպես, օրինակ, ոչխարները, հավերն ու բաղերը, ի վիճակի չէին Յոթ Պատվիրաններն անգիր անել: Երկար խորհրդածություններից հետո Զնագնդին ազդարարեց, որ Յոթ Պատվիրանները, փաստորեն, կարելի էր հանգեցնել մի ասույթի, մասնավորապես. «Չորս ոտք լավ, երկու ոտք՝ վատ»: Այդ ասույթը, ասաց նա, պարունակում է Անասնիզմի հիմնարար սկզբունքը: Դրան կատարելապես տիրապետողն արդեն ապահով է մարդկային ազդեցություններից: Սկզբում թոշուններն առարկում էին, քանի որ նրանց թվաց, թե իրենք նույնպես երկու ոտք ունեն, սակայն Զնագնդին նրանց ապացուցեց, որ դա այդպես չէ:

– Թոշնի թեսը, ընկերներ, – ասաց նա, – շարժման և ոչ թե գործառության օրգան է: Այդպիսով առկա են բոլոր հիմքերը այն ոտք համարելու: Մարդու որոշիչ հատկանիշը ձեռքն է, չարիք գործելու նրա հարմարանքը:

Թոշունները Զնագնդու ասածից բան չհասկացան, բայց բացատրությունն ընդունեցին, և բոլոր բթամիտ անասունները սկսեցին անգիր անել նոր ասույթը: ՉՈՐՍ ՈՏՔ ԼԱՎ, ԵՐԿՈՒ ՈՏՔ՝ ՎԱՏ գրվեց

ամբարի պատին, Յոթ Պատվիրանների վերևում և ավելի խոշոր տառերով: Անգիր անելով՝ ոչխարները խիստ հավանեցին այդ ասույթը և դաշտում պատկած բոլորը միասին սկսում էին մկկալ. «Չորս ոտք լավ, երկու ոտք՝ վատ, չորս ոտք լավ, երկու ոտք՝ վատ» և այդպես շարունակ, երբեք չհոգնելով:

Նապոլեոնը Զնագնդու կոմիտեներով չէր հետաքրքրվում: Նա ասաց, որ մատաղ սերնդի դաստիարակությունը շատ ավելի կարևոր խնդիր է, քան այն, ինչ կարելի է անել արդեն հասունացածների համար: Այնպես պատահեց, որ բերքահավաքից անմիջապես հետո Զանգակն ու Ջեսին ցնկնեցին, երկուսը միասին ինը ժիր քոթոթ բերելով: Ծծից կտրելուց անմիջապես հետո Նապոլեոնը մայրերից նրանց անջատեց, ասելով, որ նրանց դաստիարակության համար ինքն է պատասխանատու: Նա քոթոթներին տարավ աղավնատուն, որը կարելի էր հասնել միայն պահասենյակից բարձրացող սանդուղքով, և այնտեղ նրանց պահեց այնպիսի մեկուսացման մեջ, որ շուտով ֆերման նրանց գոյության մասին մոռացավ:

Կաթի անհայտանալու առեղծվածը որոշ ժամանակ անց պարզվեց: Այն ամեն օր ավելացնում էին խոզերի լափին: Վաղահաս խնձորներն արդեն լցվել էին, և պարտեզի խոտին ցիրուցան էին եղել քամուց

թափված պտուղները: Անասունները բնականաբար ենթադրեցին, որ դրանք կբաժանվեն իրենց միջև, սակայն մի օր հրահանգ ստացվեց թափված խնձորները հավաքել և տեղափոխել պահասենյակ՝ խոզերի համար: Այստեղ մնացած անասուններից ոմանք մրժմրթացին, բայց ապարդյուն: Տվյալ կետում խոզերը ոչ մի տարածայնություն չունեին, անգամ Զնագնդին ու Նապոլեոնն էին համերաշխ: Զոանին ուղարկեցին մնացածներին անհրաժեշտ բացատրությունները տպլու:

– Ընկերներ, – բացականչեց նա, – հուսով եմ, որ դուք չեք կարծում, թե մենք՝ խոզերս, դա անում ենք եսասիրության ու արտոնվածության ոգով դրդված: Մեզանից շատերն իրականում կաթ և խնձոր չեն սիրում: Ես ինքս դրանք չեմ հավանում: Դրանք վերցնելիս մեր միակ մտահոգությունը մեր առողջության ապահովումն է: Կաթը և խնձորը (դա ապացուցված է գիտության կողմից, ընկերներ) պարունակում են խոզերի բարեկեցության համար վճռականապես անհրաժեշտ նյութեր: Մենք՝ խոզերս, մտքի աշխատավորներ ենք: Ֆերմայի կազմակերպչական և վարչական ամբողջ աշխատանքը մեր ուսերին է: Մենք գիշեր-ցերեկ մտահոգված ենք ձեր բարեկեցությամբ: Մեզ համար չէ, որ խմում ենք կաթն ու

ուստում այդ խնձորները: Գիտեք, թե ինչ կլիներ, եթե խոզերը թերանային իրենց պարտականություններում: Զոնզը կվերադառնար: Այո, Զոնզը կվերադառնար: Անշուշտ, ընկերներ,- համարյա պաղատագին վնգստաց Զոանը, պոչը շարժելով,- ձեր մեջ, իհարկե, չկա մեկը, որը ցանկանար Զոնզի վերադարձը:

Եթե կար մի բան, որում անասունները միանգամայն վստահ էին, դա այն էր, որ Զոնզի վերադարձը ոչ ոք չի ուզում: Երբ հարցը դրվեց այդ կտրվածքով, նրանք այլևս ասելիք չունեին: Խոզերի առողջությունը հոգալու անհրաժեշտությունը չափից ավելի ակնհայտ էր: Եվ այդպիսով, առանց հետագա վիճաբանության որոշվեց, որ կաթը և քամուց թափված խնձորները (ինչպես նաև հասուն խնձորների հիմնական բերքը) առանձնացվելու են միայն խոզերի համար:

## ԳԼՈՒԽ 4

Աշնան դեմ Ասասնաֆերմայի դեպքերի լուրը տարածվեց երկրով մեկ: Ամեն օր Նապոլեոնն ու Զնագնդին աղավնիների երամներ էին ուղարկում, որոնց հանձնարարված էր մերվել հարևան ֆերմաների անասուններին, պատմել նրանց Ապստամբության մասին և սովորեցնել «Անգլիայի գազանները» երգի մեղեդին:

Այդ ընթացքի մեծ մասը միստր Ջոնզը անց էր կացնում Վիլինգդոնի «Կարմիր Առյուծ» գինետանը, լսել ցանկացողներին գանգատվելով զարհուրելի անարդարությունից, որի պատճառով սեփական ֆերմայից վոնդվել էր անքան անասունների ոհմակի կողմից: Մնացած ֆերմերները սկզբունքորեն նրան համակրում էին, բայց տակավին առանձնապես մեծ աջակցություն չդրսենորեցին: Հոգու խորքում ամեն մեկը միտք էր անում, թե ինչպես մի ձև

գտնի Զոնզի դժբախտությունից օգուտ քաղելու: Բարեբախտաբար, Անասնաֆերմային կից երկու տնտեսությունների տերերը վաղուց ի վեր գժտված էին: Դրանցից մեկը՝ Ֆոքսվուտը, մի խոշոր, բարձիթողի վիճակում գտնվող հնառճ ազարակ էր՝ մեծ մասն անտառապատ, անխնամ արոտներով ու խարիսով ցանկապատերով: Դրա տեր միստր Փիլքինգուոնն անհոգ մի ֆերմեր էր, որն իր ժամանակի մեծ մասը նվիրում էր որսորդությանն ու ձկնորսությանը: Մյուս ֆերման, որ կոչվում էր Փինչֆիլդ, ավելի փոքր էր և ավելի բարվոք: Դրա տերը, միստր Ֆրեդրիքը, ճարպիկ ու կամակոր մի մարդ էր, որն անվերջ խառնված էր դատական գործերի մեջ և առուծախի անգերազանցելի գիտակ էր համարվում: Այդ երկուսն այն աստիճան իրար հետ չունեին, որ համաձայնության չէին գա անգամ հանուն իրենց ընդհանուր շահերի պաշտպանության:

Բայց և այնպես, Անասնաֆերմայի ապստամբությունը երկուսին էլ իհմնովին վախեցրել էր, և նրանք աշխատում էին սեփական անասուններին զերծ պահել այդ մասին չափից շատ բան իմանալուց: Սկզբում նրանք ծաղրուծանակի ենթարկեցին այն գաղափարը, թե անասուններն իրենք են տնտեսություն վարելու: Այդ ամենը մի երկու ամիս էլ չի տևի, ասում էին նրանք: Նրանք լուր տարածեցին «Մենքը» ֆերմայի

անասունների մասին («Անասնաֆերմա» անունը չհանդուրժելով՝ նրանք շարունակում էին այն կոչել «Մենքը» ֆերմա), թե իբր վերջիններս անընդհատ գզվոտոցների մեջ են և ուր որ է սովամահ են լինելու։ Որոշ ժամանակ անց, երբ անասուններն ակներևար սովամահ չեղան, Ֆրեդրիքն ու Փիլքինգտոնն իրենց երգը փոխեցին ու սկսեցին պատմել Անասնաֆերմայում տիրող սուկալի այլասերության մասին։ Պարզվեց, որ անասուններն այնտեղ գրաղվում էին կանիբալիզմով, շիկացած պայտերով իրար էին խոշտանգում և էգերից օգտվում էին ընդհանուր հիմունքներով։ Ահա թե ինչ է դուրս գալիս Բնության օրենքների դեմ ապստամբելուց, ասում էին Ֆրեդրիքն ու Փիլքինգտոնը։

Ինչևէ, այդ պատմություններին մինչև վերջ ոչ ոք չէր հավատում։ Շարունակում էին անորոշ ու աղավաղված լուրեր տարածել հեքիաթային մի ֆերմայի մասին, որտեղից մարդիկ արտաքսված էին, և ուր անասուններն իրենք էին իրենց գլխի տերը։ Այդ տարում ամբողջ երկրամասով մեկ խոռվարարության ալիք անցավ։ Նախկինում միշտ հեզ ցովերը հանկարծ կատաղում էին, ոչսարները փլում էին ցանկապատերն ու սրբում երիցուկի դաշտերը, կովերը դույլը շուր էին տալիս, որսաձիերը մեխավում էին

խոչընդոտների առջև՝ տերերին թամբից շպրտելով։ Եվ ամենակարևորը՝ «Անգլիայի գազանների» մեղենին և անգամ բառերը ամենուր հայտնի էին դարձել։ Այս տարածվել էր ապշեցուցիչ արագությամբ։ Մարդիկ անկարող էին զսպել իրենց կատաղությունն այդ երգը լսելիս, սակայն ձևացնում էին, թե այն պարզապես ծիծաղելի է։ Անհասկանալի է, ասում էին նրանք, թե ինչպես նույնիսկ անասունները կարող են իրենց թույլ տալ երգել նման մի անարժան ոչչություն։ Երգելիս բռնված անասունները տեղնուտեղը մտրակահարվում էին։ Բայց և այնպես, այդ երգն անպարտելի էր։ Կեռնեխներն այն ծլվլում էին թփուտներում, աղավնիները սուլում էին ծփիների վրա, այն լսվում էր դարբնոցների աղմուկի մեջ և եկեղեցական զանգերի դողանջում։ Մարդկանց սիրտն այդ երգից ծածուկ դող էր ընկնում՝ նրանք լսում էին իրենց կործանման մարգարեռությունը։

Հոկտեմբերի սկզբին, երբ հացահատիկն արդեն հավաքված ու կապված էր, իսկ որոշ մասը՝ նաև կալված, աղավնիների ծայր աստիճան հուզված մի երամ վայրէջք կատարեց Անասնաֆերմայի բակում։ Զոնզն ու իր աշխատավորները և նրանց հետ Ֆոքսվուդից ու Փինչֆիլդից մի տասնյակ մարդ ներս էին անցել հնգահեծան դարպասից ու այժմ առաջնորդվում էին

*1916. Հունիս*

Փերմայի կողմը: Բոլորը զինված էին փայտերով, բացի Զոնզից, որ, հրացանը ձեռքին, քայլում էր առջևից: Կասկած չկար, որ նրանք մտադիր էին ֆերման հետ գրավել:

Այդ ամենը վաղուց էր ակնկալվում, և անհրաժեշտ պատրաստություններն արված էին: Զնագնդին, որն ուսումնասիրել էր Հովհոս Կեսարի արշավների մասին տանը հայտնաբերված հին գիրքը, դարձավ պաշտպանական միջոցառումների պատասխանատուն: Նա շտապ հրահանգներ արձակեց, և երկու րոպե չանցած ամեն անասուն արդեն իր տեղում էր:

Երբ մարդիկ մոտեցան ֆերմայի շինություններին, Զնագնդին նախաձեռնեց առաջին գրոհը: Բոլոր երեսունչորս աղավնիները սկսեցին դես ու դես անել մարդկանց գլխավերնում և նրանց վրա ծրտել, մինչ թփերում թաքնված սագերը դուրս պղծան ու սկսեցին քինոտ կտցել մարդկանց սրունքները: Բայց և այնպես, դա ընդամենը թեթև մի ընդհարում էր իրարանցում ստեղծելու նպատակով, և մարդիկ սագերին հեշտությամբ քշեցին փայտերով: Այժմ Զնագնդին մարտի կոչեց երկրորդ շարայունը: Մյուրիելը, Բենիամինը և ոչխարները Զնագնդու գլխավորությամբ նետվեցին առաջ և սկսեցին չորս կողմից պոզահարել ու հարվածել մարդկանց, մինչ

Բենիամինը նրանց սմբակներով հետևանց քացի էր տալիս: Սակայն այս անգամ էլ փայտերով ու նալած կոշիկներով մարդիկ ավելի ուժեղ դուրս եկան, և, Զնագնդու կտրուկ վնասատոցին ենթարկվելով, որը նահանջի նշան էր, անասունները շուր եկան ու փախան ֆերմայի բակը:

Մարդիկ ցնծագին աղաղակներ արձակեցին: Նրանց թվաց, թե թշնամին տեղի է տալիս, և անկանոն նետվեցին առաջ: Դա հենց այն էր, ինչ նախատեսել էր Զնագնդին: Հենց որ մարդիկ խորացան բակում, գոմում դարան մտած երեք ձիերը, երեք կովերը և մնացած խոզերը հանկարծակի դուրս պոծան և կտրեցին նահանջի ճանապարհը: Զնագնդին հարձակման նշան տվեց և ինքը նետվեց Զոնզի վրա: Զոնզը բարձրացրեց հրացանն ու կրակեց: Կոտորակը Զնագնդու մեջքին արյունոտ գծեր քաշեց՝ սպանելով ոչխարներից մեկին: Մի պահ անգամ չվարանելով, Զնագնդին իր վեց փթանոց իրանով նետվեց Զոնզի ոտքերին: Վերջինս տապալվեց թրիքի կույտի մեջ՝ հրացանը վայր գցելով: Սակայն ամենից սարսուազդու տեսարանը Դմբուզն էր՝ ծառու ելած, նա խւական հովատակի պես հարվածների տարափ էր հասցնում իր սմբակներով: Առաջին խւարվածը հասավ ֆոքավուդցի մի ջահելի գանգին՝

Նրան անկենդան փոելով ցեխի մեջ: Դա տեսնելուն պես մարդկանցից ոմանք, փայտերը գցելով, փորձեցին փախչել: Նրանք խուճապի մատնվեցին, և կենդանիները սկսեցին բակով մեկ հետապնդել նրանց: Նրանց խփում էին, կծում, քացի տալիս, ոտնահարում: Ֆերմայում չմնաց ոչ մի անասուն, որն իր վրեժը յուրովի ձևով չհաներ: Նույնիսկ կատուն կտորից անսպասելիորեն ցատկեց մեկի ուսերին ու ճանկերը միսրճեց նրա վիզը, որից վերջինս սկսեց սոսկալի աղաղակել: Հարմար պահ ընտրելով՝ մարդիկ բակից դուրս պրծան ու նետվեցին դեպի ճանապարհը: Այդպիսով, ներխուժումից հինգ րոպե չանցած, նրանք իրենց եկած ճամփով մատնվեցին անփառունակ նահանջի, մինչ սագերի երամը, հետևից ընկած, ֆշացնում էր ու կտցում նրանց սրունքները:

Բոլոր մարդիկ գնացին, բացի մեկից: Բակի խորքում Դմբուզը փորձում էր սմբակով շուտ տալ երեսնիվայր ցեխի մեջ փոված ջահելին: Տղան չէր շարժվում:

– Նա մեռած է, – ափսոսանքով ասաց Դմբուզը: – Ես դա անելու մտադրություն չունեի: Ես մոռացել էի, որ սմբակներս պայտած են: Հավատացեք, ես դա դիտմամբ չեմ արել:

– Ոչ մի ավելորդ գլքասրտություն, ընկեր, – բացականչեց Ձնագնդին, որի վերքերից արյուն էր

կաթում:- Պատերազմը պատերազմ է: Հավագոյն մարդը մեռած մարդն է:

- Ես չեմ ուզում ուրիշին կյանքից զրկել: Անգամ՝ մարդուն,- կրկնեց Դմբուզը աչքերը թաց:

- Մոլլին ի՞նչ եղավ,- բացականչեց ինչ-որ մեկը:

Մոլլին չկար: Մի պահ բոլորն իրար անցան այն վախից, թե մարդիկ կարող էին նրան վնասած կամ փախցրած լինել: Սակայն վերջում նրան գտան գոյում թաքնված, գլուխը թաղած մսուրի մեջ: Նա փախուստի էր դիմել կրակոցից անմիջապես հետո: Իսկ երբ վերադարձան նրան փնտրելու գնացած մյուս անասունները, պարզվեց, որ բակի տղան, որը, փաստորեն, միայն շշմած էր, արդեն ուշքի է եկել ու թողել-փախել:

Բոլոր անասունները ծայր աստիճան գրգռված էին, ամեն մեկը բարձրաձայն վերապատմում էր ճակատամարտին ցուցաբերած իր մասնակցությունը: Տեղնուտեղը հանպատրաստից ծագեց հաղթանակին նվիրված տոնակատարություն: Բարձրացնելով դրոշը՝ բոլորը մի քանի անգամ երգեցին «Անգլիայի գազանները», ապա կատարվեց զոհված ոչխարի հանդիսավոր թաղումը: Գերեզմանին ալրճենու թուփ տնկեցին: Զնագնդին փոքրիկ ճառ արտասանեց, շեշտելով, որ բոլոր կենդանիները հարկ եղած դեպքում

պետք է պատրաստ լինեն կյանքները գոհել հանուն Անասնաֆերմայի: Անասունները միաձայն որոշում ընդունեցին սահմանել մարտական շքանշան՝ «Հերոս Անասուն, Առաջին Կարգի», և խկույն ևեթ դրանով պարզեցնեցին Զնագնդուն ու Դմբուզին: Շքանշանը պղնձե մի մեղալ էր (պահասենյակում գտած իին թամբերի զարդերից), որը հարկ էր կրել տոն և կիրակի օրերին: Սահմանվեց նաև երկրորդ կարգի «Հերոս Անասուն», որով հետմահու պարզեցնեց գոհված ոչխարը:

Ապա երկար քննարկում ծավալվեց այն հարցի շուրջ, թե ինչպես կոչել ճակատամարտը: Վերջիվերջո այն կոչվեց Գոմի ճակատամարտ՝ դարանի պատվին: Միստր Զոնզն իր հրացանը թողել էր ցեսի մեջ, հայտնի էր նաև, որ տանը փամփուշտների պաշար կա: Որոշվեց հրացանը թնդանոթի պես ամրացնել դրոշի տակ և տարին երկու անգամ կրակոց արձակել՝ հոկտեմբերի տասներկուամին՝ Գոմի ճակատամարտի օրը, և հունիսի քսանչորսին՝ Ապստամբության հոբելյանին:

## ԳԼՈՒԽ 5

Զմեռվա մոտենալուն պես Մոլին սկսեց անհանգստության ավելի շատ առիթներ տալ: Ամեն օր նա ուշանում էր աշխատանքից, ասելով, թե չէր կարողացել արթնանալ, և գանգատվում էր ինչ-որ խորիրդավոր ցավերից, թեպետ հրաշալի ախորժակ ու տեսք ուներ: Նա աշխատանքից խոսափելու զանազան պատրվակներ էր գտնում և գնում կանգնում էր ջրավազանի ափին, ժամերով հիմարաբար դիտելով սեփական արտացոլումը: Սակայն լուրեր էին շրջում նաև ավելի լուրջ բանի մասին: Մի օր, երբ Մոլին, իր երկար պոչն օրորելով ու մի ծղոտ ծամելով, զվարթ մտավ բակ, Երեքնուկը նրան մի կողմ քաշեց:

– Մոլի,- ասաց նա,- ես քեզ շատ լուրջ ասելիք ունեմ: Այս առավոտ ես տեսա, թե ինչպես էիր դու նայում Անասնաֆերման Ֆոքսվոլից բաժանող ցանկապատից այն կողմ: Մյուս կողմում կանգնած էր

միստր Փիլքինգտոնի մարդկանցից մեկը: Եվ... Ես բավական հեռու էի, բայց համարյա վստահ եմ, որ տեսա, թե ինչպես էր նա քեզ հետ խոսում, իսկ դու թույլ էիր տալիս քիթի շոյել: Սա ի՞նչ է նշանակում, Մոլլի:

– Նա ոչինչ չէր անում: Ես չէի... Սուտ է, – գոռաց Մոլլին խլրտալով ու գետինը դոփելով:

– Մոլլի, նայիր աչքերիս: Կարո՞ղ ես ազնիվ խոսք տալ, որ այդ մարդը քիթի չի շոյել:

– Դա ճիշտ չէ, – կրկնեց Մոլլին, բայց Երեքնուկի աչքերին նայել չկարողացավ ու վարգով փախավ դաշտ:

Երեքնուկի մտքով հանկարծ մի վատ բան անցավ: Առանց մյուսներին որևէ բան ասելու, նա գնաց գոմի Մոլլիի անկյունը և կճղակով հարդը շրջելով՝ շաքարի կտորներ ու մի փունջ գունավոր ժապավեներ գտավ:

Երեք օր անց Մոլլին անհայտացավ: Մի քանի շաբաթ նրա մասին ոչ մի տեղեկություն չկար, բայց հետո աղավնիները հայտնեցին, որ նրան տեսել են Վիլինգդոնից այն կողմ: Նա լծված էր պանդոկի դռանը կանգնած սև ու կարմիր գեղեցիկ մի սայլակի: Վանդակավոր շալվարով, պանդոկապանի նման գիրուկ կարմրաթուշ մի տղամարդ նրան շաքար էր տալիս ու շոյում քիթը: Նա կոկիկ տեսք ուներ և

ճակատին ալ կարմիր ժապավեն էր կապված: Անս-  
տուններից ոչ մեկը էլ երբեք Մոլլիի անոնը չտվեց:

Հունվարին դաժան ցրտեր սկսվեցին: Հողը եր-  
կաթի պես կարծրացավ, և դաշտերում այլս աշխա-  
տել չէր լինում: Միտինգների մեծ մասն անց էր  
կացվում մեծ ամբարում, որ խոզերը զբաղվում էին  
գարնանացանի աշխատանքները ծրագրելով: Բո-  
լորն ընդունում էին, որ խոզերը, բացահայտորեն  
մյուսներից խելացի լինելով, որոշելու են ֆերմայի  
գործունեության հետ կապված բոլոր հարցերը, թեև  
նրանց որոշումներն անպայման պետք է հաստատ-  
վեին մեծամասնության քվեարկությամբ: Նման կար-  
գը բավական արդյունավետ կլիներ, եթե չհաշվենք  
Զնագնդու և Նապոլեոնի միջև անընդհատ ծագող  
տարաձայնությունները: Այդ երկուաը վիճում էին  
ցանկացած կետի շուրջ, որը դրա համար հնարավո-  
րություն էր ընձեռում:

Եթե մեկն առաջարկում էր ավելի շատ գարի ցա-  
նել, մյուսն ավելի շատ վարսակ էր պահանջում, իսկ  
եթե մեկն ասում էր, որ այսինչ դաշտը կաղամբի հա-  
մար շատ հարմար է, մյուսը հայտարարում էր, որ  
պտղարմատներից բացի այն ուրիշ ոչ մի բանի պետք  
չէ: Ամեն մեկն իր հետևորդներն ուներ, և բանը եր-  
բեմն հասնում էր կատաղի վեճերի: Միտինգների

ժամանակ Զնագնդին հաճախ հաղթանակ էր տանում իր փայլուն ելույթներով, առկայն Նապոլեոնն ավելի լավ էր կազմակերպում իր հետևորդներին և մասնավորապես՝ ոչխարներին: Վերջերս ոչխարները սովորություն էին ձեռք բերել տեղի-անտեղի մկան «չորս ոտք լավ, երկու ոտք՝ վատ», երբեմն դրանով ընդհատելով Միտինգը: Նկատվել էր նաև, որ առավել հաճախ նրանք դա անում էին Զնագնդու ճաների ամենից վճռական պահերին: Զնագնդին մանրամասն ուսումնասիրել էր տանը գտնված «Ֆերմեր» հանդեսի իին համարները և լի էր նորամուծությունների ու բարեփոխումների ծրագրերով: Նա գիտուն տեսքով խոսում էր դրենաժի, սիլոսի ու խարամի մասին և խրթին մի սխեմա էր մշակել, ըստ որի բոլոր անասունները պիտի թրքեին ուղղակի դաշտում և ամեն օր տարբեր մի տեղ՝ պարարտացման գործը հեշտացնելու նպատակով: Նապոլեոնն անձամբ ոչ մի սխեմա չէր առաջարկում, հանգիստ ասելով, որ Զնագնդու ծրագրերից ոչինչ դուրս չի գա, և կարծես սպասողական դիրք էր ընդունել: Նրանց ամենից սուր վիճարանությունը ծավալվեց հողմաղացի շուրջը: Շինություններից քիչ հեռու՝ արոտավայրի մեջ, կար փոքրիկ մի բլուր, որը ֆերմայի ամենաբարձր կետն էր: Տեղանքն ուսումնասիրելով՝ Զնագնդին

հայտարարեց, որ դա իսկը հողմաղացի տեղն է, որի աշխատեցրած դինամոն ֆերմային կապահովի էլեկտրականությամբ։ Դա թույլ կտա լուսավորել ու ձմռանը ջերմացնել գոմերը, ինչպես նաև պտտասղոց, կալիչ, ճակնդեղկտրիչ ու կթելու էլեկտրական մեքենա բանեցնել։ Անասունները նման բաների մասին երբեք չեին լսել (ֆերման բավական հետամնաց էր և միայն տարրական մեխանիզմներ ուներ) և ապշահար ականջ էին դնում, իսկ Զնագնդին նորանոր ֆանտաստիկ մեքենաներ էր խոստանում, որոնք պիտի անեին ամբողջ գործը, մինչ անասուններն իրենց քեֆին կարածեին կամ ընթերցանությամբ ու բանախոսություններով կզարգացնեին մտավոր ունակությունները։

Մի քանի շաբաթից Զնագնդու հողմաղացի մանրամասն նախագիծը պատրաստ էր։ Մեխանիկական նրբությունները հիմնականում քաղված էին միստր Զոնզի երեք գրքերից՝ «Տնավարության հազար ու մի պիտանի խորհուրդ», «Ինքնուս որմնադիր» և «Էլեկտրականություն սկսնակների համար»։ Զնագնդին աշխատանոցի էր վերածել նախկին ինկուբատորը և ժամերով փակվում էր այնտեղ. հատակի ողորկ տախտակները շատ հարմար էին վրան գծելու համար։ Բաց գրքերը քարով սեղմած, նա արագ-արագ

հետ ու առաջ էր անում, տոտիկի հողերի միջև բռնած կավիճով գծեր քաշելով ու բավականությունից խոնչալով։ Աստիճանաբար ուրվագծվեց լծակների ու ատամնանիվների խրթին մի կոտակում, որը մնացած անասունների համար բացարձակապես անընթեռնելի էր և միևնույն ժամանակ՝ խիստ տպավորիչ։ Բոլորն օրական առնվազն մեկ անգամ գալիս էին Զնագնդու գծածը նայելու։ Գալիս էին անգամ հավերն ու բաղերը՝ ջանալով չտրորել կավճե գծերը։ Այդ ամենին անմասն էր մնում միայն Նապոլեոնը, որը հենց սկզբից հակադրվել էր հողմաղացի գաղափարին։ Բայց և այնպես մի օր նա անսպասելիորեն եկավ նախագիծն ուսումնասիրելու։ Նա մոայլ հետ ու առաջ արեց ինկուբատորով մեկ, ուշադիր զննեց ամեն մանրամասն, մի երկու տեղ նույնիսկ հոտութեց ու կանգ առավ, աչքի տակից որոշ ժամանակ գնահատելով տեսածը, ապա հանկարծ ոտքը բարձրացրեց և, նախագծի վրա միզելով, առանց որևէ բան ասելու դուրս եկավ։ Հողմաղացի վերաբերյալ ֆերմայի կարծիքները կիսվել էին։ Զնագնդին չէր ժխտում, որ այն կառուցելը հեշտ գործ չէ։ Հարկ էր լինելու քար կտրել, շարել պատերն ու առագաստ կարել, որից հետո գալու էր դինամոյի և հաղորդալարերի հերթը։ (Ժե որտեղից էին դրանք ճարելու,

նա չասաց): Սակայն Զնագնդին պնդում էր, որ այդ ամենն իրագործելի է մեկ տարվա ընթացքում: Որից հետո, ասաց նա, այնքան ժամանակ կիսնայվեր, որ անասունները կաշխատեին շաբաթական ընդամենը երեք օր: Մյուս կողմից՝ Նապոլեոնն առարկում էր, որ ներկայիս իրատապ պահանջը սննդի արտադրության ավելացումն է, իսկ եթե ժամանակը վատնվի հողմաղացի վրա, բոլորը վերջում սովամահ կլինեն: Անասունները բաժանվեցին երկու խմբավորման, հետևյալ նշանաբաններով՝ «Կեցցե Զնագնդին և եռորյա աշխատանքային շաբաթը» և «Կեցցե Նապոլեոնը և լիքը կերակրատաշտը»: Բենիամինը միակ անասունն էր, որը ոչ մի խմբավորման չհարեց: Նա ոչ հավատում էր կերակրի գալիք առատությանը, ոչ էլ նրան, որ հողմաղացն աշխատանք կիսնայի: Հողմաղացով, թե առանց դրա, ասում էր նա, կյանքը կմնա առաջվա պես, այսինքն՝ վատ:

Հողմաղացից զատ ծագել էր նաև ֆերմայի պաշտպանության հարցը: Բոլորը հասկանում էին, որ Գոմի ճակատամարտում պարտություն կրելով հանդերձ, մարդիկ կարող են ֆերման վերագրավելու ու Զոնգին վերադարձնելու մի նոր, ավելի վճռական փորձ ձեռնարկել: Նրանք լուրջ առիթներ ունեին դա անելու, քանի որ մարդկանց պարտության լուրը

տարածվել էր երկրամասով մեկ, և հարևան տնտեսությունների անասունները նախկինից ավելի անհնագանդ էին դարձել: Այդ հարցում, ինչպես միշտ, Զնագնդին ու Նապոլեոնը տարածայնություններ ունեին: Հստ Նապոլեոնի՝ անասունները պետք է հրազեն ճարեին ու վարժվեին այն գործածելուն: Հստ Զնագնդո՛ անհրաժեշտ էր գնալով ավելի շատ աղավնիներ ուղարկել հարևան ֆերմաների անասուններին ապստամբության կոչելու: Մեկի կովանն այն էր, որ եթե անասունները չկարողանան պաշտպանվել, նրանց անխուսափելիորեն նորից կստրկացնեն: Մյուսը պնդում էր, որ եթե ամենուր ապստամբություններ ծագեն, պաշտպանվելու կարիք չի լինի: Անասուններն ականջ էին դնում մեկ Նապոլեոնին, մեկ Զնագնդուն և չին կարողանում որոշել, թե ով է ճիշտը, փաստորեն, նրանք ամեն անգամ համաձայն էին նրա հետ, ով խոսում էր տվյալ պահին:

Վերջապես հասավ այն օրը, երբ Զնագնդուն ախագիծն ավարտված էր: Հաջորդ կիրակի օրվա Միտինգին քվեարկության էր դրվելու հողմադացի աշխատանքները սկսելու անհրաժեշտության հարցը: Երբ անասունները հավաքվեցին ամբարում, Զնագնդին ուտքի կանգնեց և, չնայած տեղտեղ ոչխարների մկնոցին, շարադրեց կառույցի

անհրաժեշտության իր փաստարկները։ Ապա պատասխան խոսքով հանդես եկավ Նապոլեոնը։ Նա շատ հանգիստ ասաց, որ հողմաղացի գաղափարն անհեթեթություն է և, խորհուրդ տալով դրա օգտին չքվեարկել, նատեց իր տեղը։ Նա կես րոպե էլ չխոսեց, և թվում էր, թե գրեթե անտարբեր է իր ասածի թողած տպավորությանը։ Այստեղ Զնագնդին ոտքի ցատկեց և, ոչխարներին լոեցնելով, բոլորին դիմեց բոցաշունչ մի կոչով հօգուտ հողմաղացի։ Մինչ այդ անասունների նախապատվությունները բաշխված էին հավասարապես, բայց Զնագնդու պերճախոսությունը շատ չանցած գրավեց նրանց։ Վառվոուն նախադասություններով նա պատկերեց ֆերմայի կյանքն այն բանից հետո, երբ ծանր աշխատանքի բեռը կընկնի անասունների ուսերից։ Նրա երևակայությունն այս անգամ տարածվեց սղոցներից ու ճակնդեղկտրիչներից շատ ավելի հեռու։ Ելեկտրականությունը, ասաց նա, կարող է աշխատեցնել գութաններ, խոփեր, ճմլիչներ, հնձող ու դիզող մեքենաներ և, բացի այդ, սեփական լույսով, ջերմությամբ և տաք ու սառը ջրով ապահովել ամեն անասունի անկյուն։ Երբ նա ավարտեց իր խոսքը, ոչ մի կասկած այլև չկար, թե ում օգտին կանցնի քվեարկությունը։ Սակայն նոյն այդ պահին ոտքի կանգնեց Նապոլեոնը և, կողքից

տարօրինակ մի հայացք նետելով Զնագնդու վրա, արտասովոր զի մի վնասոց արձակեց, որի նմանը մինչ այդ նրանից ոչ ոք չէր լսել:

Դրսից լսվեց սոսկալի մի հաչոց, և պղնձե վզնոց-ներով ինը ահոելի շուն ներս նետվեցին ամբար: Նրանք հարձակվեցին ուղիղ Զնագնդու վրա, որը ճիշտ ժամանակին վեր թռավ ահարկու երախներից մազապուրծ լինելու համար: Հաջորդ պահին նա արդեն դռնից դուրս նետվեց, շները հետևից: Անխոս զարմանքով ու երկյուղածությամբ՝ անասունները խմբվեցին դռան մոտ, որ նայեն: Զնագնդին արոտի երկայնքով վազում էր դեպի ճանապարհը: Նա սուրում էր միայն խոզին վայել ավյունով, սակայն շները հետ չեն մնում: Մի պահ նա սայլաքեց և թվում էր, թե ուր որ է զոհ կգնա: Թեև նա վեր ցատկեց ու վազեց ավելի արագ, քան երբնէ, շները շուտով կրկին վրա հասան: Նրանցից մեկը քիչ էր մնում երախը փակեր Զնագնդու պոչին, քայց նա վերջին վայրկյանին հազիվիազ հասցրեց պոչը փախցնել: Ապա նոր թափով նետվեց առաջ և, մի երկու մատնաչափի առավելությամբ, դուրս պրծավ ցանկապատի անցքից ու այլս չերևաց:

Լուս ու ահարեկված՝ անասունները գլխիկոր ներս մտան ամբար: Քիչ անց վազքով վերադարձան

նաև շները: Սկզբում ոչ ոք չէր հասկանում, թե դրանք որտեղից են հայտնվել, բայց շուտով պարզվեց, որ Նապոլեոնի կողմից մայրերից խլած և անձամբ դաստիարակած լակոտներն են: Չնայած նրանք դեռ լրիվ հասակ չին առել, բայց ամենի շներ էին՝ գայլերի պես կատաղի տեսքով: Բոլորը նկատեցին, որ նրանք Նապոլեոնից չեն հեռանում և նրան տեսնելուն պես պոչ են խաղացնում, ինչպես մինչ այդ շներն անում էին Զոնզի ներկայությամբ:

Նապոլեոնը շների ուղեկցությամբ բարձրացել էր այն հարթակը, որը ժամանակին իր ճառն էր արտասանել Գնդապետը: Նա ազդարարեց, որ այսուհետև կիրակնօրյա միտինգներ չեն լինի: Դրանք ժամանակի ավելորդ վատնում են, ասաց նա: Առաջիկայում ֆերմայի տնտեսության հետ կապված բոլոր հարցերը կլուծվեն խոզերի հատուկ կոմիտեի կողմից, որի նախագահը լինելու է ինքը: Կոմիտեի դռնփակ նիստերի որոշումները կհաղորդվեն նաև մնացածներին: Անսատներն առաջվա պես կիրակի առավոտյան կիավաքվեն դրոշի արարողությանը՝ «Անգլիայի գազանները» երգելու և շաբաթական հանձնարարություններ ստանալու, սակայն քննարկումներ այլևս չեն լինի: Չնայած Զնագնդու վտարման առաջացրած շփոթությանը՝ անսատներն այդ

հայտարարությունից սրտնեղեցին: Նրանցից ոմանք անգամ կրողոքեին, եթե կարողանային գտնել ճիշտ փաստարկները: Նույնիսկ Դմբուզը աղոտ մի անհանգստություն էր զգում: Նա ականջները հետ տարավ, մի երկու անգամ թափահարեց բաշը և ճգնեց մտքերն ի մի բերել, բայց ի վերջո ոչ մի ասելիք չգտավ: Բայց և այնպես, հենց խոզերից ոմանք ավելի ակտիվ գտնվեցին: Դժգոհության սուր վնասոցներով առաջին շարքից վեր թռան չորս երիտասարդ գոճի և բոլորը միանգամից սկսեցին խոսել: Խսկույն ևել Նապոլեոնի շուրջը նստած շներն անսպասելի բարձր ու սպառնալից գոմոց արձակեցին, և խոզերը սակած նստեցին իրենց տեղները: Դրանից հետո ոչխարները բարձրաձայն պողոթկացին «Չորս ոտք լավ, երկու ոտք՝ վատ», որը շարունակվեց քառորդ ժամից ավել՝ վերջ դնելով որևէ քննարկության հնարավորությանը:

Որոշ ժամանակ անց Զոանին ուղարկեցին մնացածներին բացատրելու նոր կարգը:

– Ընկերներ, – ասաց նա, – հուսով եմ, որ ամեն կենդանի ըստ արժանվույն գնահատեց ընկեր Նապոլեոնի անձնվիրությունը, որով նա իր ուսերին հավելյալ աշխատանք բարդեց: Մի կարծեք, ընկերներ, թե առաջնորդելը հաճույք է: Ընդհակառակը՝

դա ծանր և խորին մի պատասխանատվություն է: Ոչ ոք վստահ չէ ընկեր Նապոլեոնից առավել, որ բոլոր անասունները հավասար են: Նա ավելի քան որպասի կլիներ ձեզ տրամադրել սեփական որոշումներ ընդունելու հնարավորությունը: Բայց երբեմն, ընկերներ, դուք կարող եք նաև սխալ որոշումներ ընդունել՝ պատկերացնելով եք, թե դա մեզ ուր կհասցնի: Ենթադրենք, թե դուք որոշեիք հետևել Զնագնդուն իր հողմադացի ցնորական ծրագրով, Զնագնդուն, որը, ինչպես հիմա գիտենք, ոճրագործից ոչնչով չեր տարրելովս...»

– Նա քաջ կովում էր Գոմի ճակաամարտում, – ասաց ինչ-որ մեկը:

– Քաջությունը բավական չէ, – ասաց Զուանը: – Նվիրվածությունն ու հնագանդությունը շատ ավելի կարևոր են: Ինչ վերաբերում է Գոմի ճակատամարտին, ապա հավատացած եմ, կգա ժամանակը, երբ մենք կիասկանանք, որ նրա դերն այդ ճակատամարտում խիստ չափազանցված էր: Կարգապահություն, ընկերներ, երկաթյա կարգապահություն: Ահա այսօրվա մեր նշանաբանը: Մի սխալ քայլ, և մեր թշնամիները չեն հապաղի առիթից օգտվել: Ինչ խոսք, ընկերներ, որ դուք չեք ուզում Զոնզի վերադարձը:

Եվ վերատին այդ փաստարկն անառարկելի էր: Ոչ ոք, իհարկե, Զոնզի վերադարձը չեր ուզում՝ եթե

կիրակնօրյա քննարկումները կարող էին դրան նպաստել, ուրեմն քննարկումները պետք է դադարեցվեին։ Դմբուզը, որն արդեն ժամանակ էր ունեցել ամեն ինչ կշռադատելու, ի մի բերեց ընդհանուր տրամադրությունը, ասելով՝ «Եթե ընկեր Նապոլեոնն այդպես է ասում, ուրեմն ճիշտը դա է»։ Այնուհետև նա որդեգրեց հետևյալ ասույթը՝ «Նապոլեոնը միշտ ճիշտ է», միացնելով այն իր անձնական նշանաբանին՝ «Ես ավելի եռանդուն կաշխատեմ»։

Եղանակն արդեն փոխվում էր՝ հասել էր գարնանային հերկի ժամանակը։ Ինկուբատորը, որտեղ Զնագնդին ստեղծում էր հողմադացի իր նախագիծը, կողավել էր՝ ենթադրվում էր, որ նախագիծը ջնջված է։ Ամեն կիրակի առավոտյան ժամը տասին անասունները հավաքվում էին մեծ ամբարում հրահանգներ ստանալու։ Ծեր Գնդապետի գանգը պարտեզից հողահան էր արվել և այժմ տեղակայված էր դրոշի տակ, կոճղի վրա։ Դրոշի բարձրացումից հետո, նախքան ամբար մտնելը, անասունները պարտավոր էին շարք կազմած պատշաճ հարգանքով անցնել գանգի կողքով։ Նրանք այլևս բոլորը միասին չէին նատում, ինչպես առաջներում։ Նապոլեոնը, Զուանը և Մինհմուս անունով մի խոզ, որը բանաստեղծություններ ու երգեր կազմելու ակնառու ձիրք

Էր դրսւորել, նատում էին հարթակի առջևում, ինը շների միջև, մինչ մյուս խոզերը տեղավորվում էին նրանց հետևում: Մնացած անասունները նատում էին ամբարում, դեմքով դեպի հարթակը: Նապոլեոնը զինվորական ոճով շարադրում էր շաբաթվա առաջադրանքը, և, մեկ անգամ «Անգլիայի գազանները» երգելով, բոլոր անասունները ցրվում էին:

Չնազնդու վտարման երրորդ կիրակի օրը անասունները որոշ զարմանքով Նապոլեոնից տեղեկացան, որ հողմաղացն այնուամենայնիվ կառուցվելու է: Նա ոչ մի բացատրություն չտվեց՝ պարզապես անասուններին զգուշացնելով, որ հավելյալ այդ նախաձեռնությունը ծանր աշխատանք է պահանջելու, և կարող է անգամ անհրաժեշտություն ծագել օրաբաժինները կրծատելու: Ինչևէ, նախագծերն արդեն պատրաստ էին՝ դրանով վերջին երեք շաբաթվա ընթացքում գրաղվել էր խոզերի հատուկ մի հանձնաժողով: Հողմաղացի և օժանդակ կառույցների շինարարությունը նախատեսված էր ավարտել երկու տարում:

Երեկոյան Զոանը մյուս անասուններին ներքին կարգով բացատրեց, որ իրականում Նապոլեոնը հողմաղացի ծրագրին երբեք դեմ չի եղել: Ընդհակառակը, այդ գաղափարը սկզբում առաջ է քաշել հենց

նա, և ինկուբատորի հատակին Զնագնդու գծած նախագիծը պարզապես գողացված էր Նապոլեոնի թղթերից: Փաստորեն, հողմաղացը հենց Նապոլեոնի գյուտն է: Ապա ինչո՞ւ էր նա, հարցրեց մեկը, հողմաղացին այդքան կրքոտ առարկում: Դա, խորհրդավոր տեսքով բացատրեց Զոանը, Նապոլեոնի խորամանկությունն էր: Նա ձևացրել էր հողմաղացին դեմ լինել, պարզապես ազատվելու համար Զնագնդուց, որը վտանգավոր տարր էր՝ վնասակար ազդեցությունների կրող: Այժմ, երբ Զնագնդին այլս չի խանգարում, ծրագիրը կարելի է իրականացնել առանց նրա միջամտության: Դա, ասաց Զոանը, կոչվում է մարտավարություն: Նա մի քանի անգամ կրկնեց՝ «Մարտավարություն, ընկերներ, մարտավարություն», դեսուդեն անելով և ուրախ քրքիջով շարժելով պոչը: Անասունները վստահ չէին, թե հասկացել են այդ բառի իմաստը, սակայնի Զոանի խոսքն այնքան համոզիչ էր, իսկ կողքին պատահաբար հայտնված երեք շներն այնքան սպառնալից էին գումում, որ բացատրությունն առանց ավելորդ հարցերի ընդունվեց:

## ԳԼՈՒԽ 6

Այդ ամբողջ տարին անասուններն աշխատում էին ստրուկի պես: Բայց նրանք երջանիկ էին, ջանք ու եռանդ չէին խնայում, քանի որ գիտեին, որ այդ աշխատանքի պտուղներն իրենց և իրենց նմանների սերունդների համար են և ոչ թե՝ անբան ավազակների՝ մարդկային ոհմակի:

Ամբողջ գարունն ու ամառը նրանք աշխատեցին շաբաթական վաթսուն ժամ, իսկ օգոստոսին Նապոլեոնը հայտարարեց, որ կիրակի օրերը մինչև կեսօր նույնպես աշխատանքային կլինեն: Այդ օրերին աշխատանքը խստիվ կամավոր էր, սակայն բացակայողների օրաբաժինը կիսով չափ կկրճատվեր: Դրանով հանդերձ անհրաժեշտ եղավ որոշ ծրագրեր թողնել անավարտ: Բերքահավաքը նախորդից պակաս հաջող դուրս եկավ, իսկ վաղ ամռանը պտղարմատների համար նախատեսված երկու դաշտը չցանվեցին, որովհետև ժամանակին չէին

հերկվել: Կարելի էր կանխատեսել, որ ձմեռը ծանր է անցնելու:

Հողմաղացի շինարարությունն անսպասելի դժվարությունների հանգեց: Ֆերմայում կրաքարի լավ հանք կար, իսկ պահեատներից մեկում՝ բավական քանակությամբ ցեմենտ ու ավազ, այնպես որ՝ շինանյութի պակաս չէր զգացվում: Սակայն սկզբում անասունները չէին կարողանում լուծել քարերը հարմար կտորների կիսելու հարցը: Թվում էր, թե դա հնարավոր է միայն քլոնգների ու բրիչների օգնությամբ, իսկ անասունները դա անել չէին կարող, քանի որ ընդունակ չէին կանգնել հետևի ոտքերի վրա: Մի քանի շաբաթվա ապարդյուն փորձերից հետո միայն ինչ-որ մեկը երկնեց ճիշտ գաղափարը, մասնավորապես՝ օգտագործել ձգողության ուժը: Քարհանքով մեկ հսկա ապառաժներ էին ցրված, որոնք որպես այդպիսին ոչ մի քանի պիտանի չէին: Դրանց շուրջը պարաններ զցելով, բոլոր անասունները՝ կովերը, ձիերը, ոչխարները, ամեն ոք, ով կարող էր պարան բռնել, – վճռական պահերին միանում էին անգամ խոզերը, – կրիայի արագությամբ ապառաժները քաշում էին քարհանքի եզրն ու ցած հրում՝ մանր կտորների փշրելով: Բեկորները տեղափոխելն արդեն համեմատաբար հեշտ էր: Ճիերը քարը տեղափոխում էին

սայերով, իսկ ոչսարները քարշ էին տալիս առանձին բեկորներ: Մի հին սայլակի լծվելով՝ իրենց լուման էին ներդնում նույնիսկ Մյուրիելն ու Բենիամինը: Ամառվա վերջին, երբ արդեն բավականաշափ քար էր կուտակվել, խոզերի վերահսկողությամբ սկսվեց շինարարությունը:

Աշխատանքը դանդաղ ու ծանր էր ընթանում: Հաճախ մի ամբողջ օրվա ուժասպառ ջանքեր էին պահանջվում ընդամենը մեկ ապառաժ վեր հանելու համար, իսկ ցած գցելուց այն երբեմն չէր փշրվում: Առանց Դմբուզի ոչ մի քան գլուխ չէր գա, նրա ուժը գրեթե հավասար էր մնացած անասունների գումարային զորությանը: Երբ ապառաժը ցած էր սողում, իսկ անասունները սկսում էին հուսահատ ճչալ լանջն ի վար սահելով, ամեն անգամ միայն Դմբուզն էր, որ, պարանին ուժ տալով, կասեցնում էր սողը: Ամենքը լցվում էին հիացմունքով, տեսնելով, թե ինչպես նա, կողերը քրտնաթաթախ, սմբակները հողին մխրճելով, հևալով, քայլ առ քայլ ընթանում էր վեր: Երեքնուկը նրան բազմիցս զգուշացրել էր, որ խուսափի ուժերի գերլարումից, բայց Դմբուզը նրան ականջ չէր դնում: Նրա համար իր երկու կարգախոսները՝ «Ես ավելի եռանդուն կաշխատեմ» և «Նապոլեոնը միշտ ճիշտ է», բավարար պատասխան էին թվում

բոլոր հարցերին: Նա անգամ պայմանավորվել էր, որ աքրորդ կես ժամի փոխարեն իրեն արթնացնի մնացածներից քառասունինգ րոպե շուտ: Իսկ իր ազատ պահերին, որոնք վերջերս այնքան էլ շատ չէին, նա մենակ գնում էր քարհանք, բեկորներ հավաքում և առանց օգնության քարշ տպիս շինհրապարակ:

Չնայած աշխատանքի ծանրությանը՝ անասուններն այդ ամառն այնքան էլ վատ չանցկացրեցին: Եթե նրանց ստացած կերը Զոնզի օրերից շատ չէր, համենայն դեպս, պակաս էլ չէր: Սեփական ջանքերով կերակրվելու առավելությունը, առանց հինգ անքան մարդկանց ապրուստ ապահովելու անհրաժեշտության, այնքան զգալի էր, որ այն վարկարեկելու համար չափից շատ ձախողություններ կպահանջվեին: Բացի այդ շատ բաներում անասունների գործելակերպը մարդկայինից ավելի արդյունավետ էր ու խնայողական: Օրինակ, քաղիանելու տիպի աշխատանքները կատարվում էին մարդու համար անհասանելի մանրախնդրությամբ: Դեռ ավելին, քանի որ ոչ մի անասուն այլևս չէր գողանում, վերացել էր արոտները դաշտերից անջատելու անհրաժեշտությունը, որից խնայվում էր ցանկապատերի ու դարպասների նորոգման աշխատանքը: Չնայած այդ ամենին, աշնան գալուստի հետ սկսեցին նկատվել մի շարք

չնախատեսված պակասություններ: Առաջացավ պարաֆինայուղի, մեխուրի, պարանների, շների բլիթների և պայտերի պակասորդ, որը հնարավոր չէր բավարարել ֆերմայի միջոցներով: Ավելի ուշ պահանջվելու էին նաև սերմեր ու արհեստական պարարտանյութ, չհաշված բազմապիսի գործիքները և, վերջապես՝ հողմաղացի համար մեքենաներ: Ոչ ոք պատկերացում չուներ, թե ինչպես է այդ ամենը ճարվելու:

Հերթական կիրակի առավոտյան, երբ անասունները հավաքվել էին հրահանգներ ստանալու, Նապոլեոնն ազդարարեց նոր քաղաքականության սկիզբը: Այսուհետև Անասնաֆերման առևտուր էր անելու հարկան ֆերմաների հետ. անշուշտ, ոչ թե շահադիտական նկատառումներով, այլ պարզապես հրատապ անհրաժեշտության որոշ նյութեր ձեռք բերելու համար: Հողմաղացի կարիքները պետք է գերիշխեն մնացած ամեն ինչին, ասաց նա: Դա նրան ստիպում է վաճառքի հանել խոտի մեկ դեղ և ցորենի բերքի մի մասը, իսկ ավելի ուշ, եթե դրամի կարիք առաջանա, այն կծածկվի ձվերի վաճառքով, որոնք Վիլինգդոնում միշտ պահանջարկ ունեն: Հավերը, ասաց Նապոլեոնը, պիտի ողջունեն այդ զոհողությունը որպես իրենց հատուկ ներդրում հողմաղացի շինարարության գործին:

Անաստաներին այս անգամ էլ ինչ-որ անորոշ անհանգստություն համակեց: Երբեք գործ չըռնել մարդկանց հետ, երբեք առևտուր չանել, փողի հետ չշփվել՝ արդյոք Զոնզին վոնդելուն հաջորդած ցնծագին Միտինգում նման որոշումներ չեն ընդունվել: Բոլոր անաստաները հիշում էին, որ ընդունվել են, համենայն դեպս, նրանց թվում էր, թե հիշում էին: Չորս երիտասարդ գոճիները, որոնք բողոքել էին Նապոլեոնի կողմից միտինգների վերացման դեմ, փորձեցին երկշուտ առարկել, բայց շների սարսուազդու գոմոցը նրանց լոեցրեց: Ապա, ինչպես միշտ, ոչխարները սկսեցին՝ «Չորս ոտք լավ, երկու ոտք՝ վատ», և փոքրիկ թյուրիմացությունը հարթվեց: Վերջապես Նապոլեոնը բարձրացրեց իր տոտիկը՝ լուսավոր պահանջելով, և հայտնեց, որ արդեն տեսել է բոլոր անհրաժեշտ պատրաստությունները: Անաստաներից և ոչ մեկը կարիք չի ունենա շփվել մարդկանց հետ, որն, անկասկած, խիստ անցանկալի է: Նապոլեոնն ամբողջ ծանրությունը վերցնում է իր ուսերին: Ոմն միստր Վիմփը՝ Վիլինգդոնում բնակվող մի փաստաբան, համաձայնվել էր միջնորդ ծառայել Անաստաֆերմայի և արտաքին աշխարհի միջև, և ամեն երկուշաբթի առավոտյան կայցելի ֆերմա՝ հանձնարարություններ ստանալու: Նապոլեոնն իր ելույթն

ավարտեց սովորական կոչով՝ «Կեցցե Անասնաֆերման», և, «Անգլիայի գազանները» երգելուց հետո, անասունները ցրվեցին:

Ավելի ուշ Զուանը ֆերմայով մեկ պտույտ գործեց՝ փարատելով անասունների կասկածները: Նա հավաստիացրեց, որ առևտրի և դրամի դեմ որոշում երբեք չի ընդունվել կամ անգամ առաջարկվել: Այն երևակայության արդյունք է, որի հետքերը, թերևս, հասնում են Զնագնդու տարածած հերյուրանքներին: Անասուններից ոմանք դեռևս երկմտում էին, բայց Զուանը նրանց կտրուկ հարցրեց՝ «Դուք վստա՞հ եք, ընկերներ, որ այդ ամենը երազում չեք տեսել: Որտե՞ղ է հիշատակվում նման որոշումը: Որտե՞ղ է այն արձանագրված»: Եվ քանի որ միանգամայն ակնհայտ էր, որ նման բան ոչ մի տեղ արձանագրված չէ, անասունները ստիպված էին ընդունել, որ սխալվել են:

Ամեն երկուշաբթի միատր Վիմփըրն ըստ պայմանավորվածության այցելում էր ֆերմա: Նա խարդախ տեսքով ու այտմորուառվ փոքրիկ մի մարդ էր, ցածրորակ փաստաբան, սակայն բավականաշահ ճարպիկ՝ մնացածներից շուտ հասկանալու համար, որ Անասնաֆերման միջնորդի կարիք կունենա, և որ գործը եկամտաբեր է: Անասունները որոշակի երկյուղով էին հետևում նրա անցուղարձին և նրանից

հնարավորինս խուսափում էին: Բայց և այնպես, Նապոլեոնի տեսքը, որը չորեքթարթ իրահանգներ էր տալիս երկու ոտքի վրա կանգնած Վիմփորին, հպարտությամբ էր լցում նրանց սրտերը և մասամբ հաշտեցնում նոր կարգի հետ: Նրանց հարաբերությունները մարդկային ցեղի հետ այժմ փոքր-ինչ այլ էին, քան նախկինում: Հիմա, երբ Անասնաֆերման բարգավաճում էր, մարդիկ նրան պակաս չէին ատում՝ իրականում ատում էին ավելին: Ամեն մարդ անսասան հավատում էր, որ ֆերման վաղ թե ուշ կսանկանա, իսկ հողմաղացի ծրագիրը կձախողվի: Նրանք հավաքվում էին գինետներում ու աղյուսակների միջոցով փորձում իրար ապացուցել, որ հողմաղացն ուզած-չուզած պիտի փլվի, իսկ եթե անգամ չփլվի, ապա երբեք չի գործելու: Բայց և այնպես, հակառակ իրենց կամքին, նրանք որոշակի հարգանք էին տածում սեփական գործերն արդյունավետ կերպով վարելու անսատունների հատկության հանդեպ: Դրա դրսւորումներից մեկն այն էր, որ նրանք սկսել էին Անասնաֆերման կոչել իր իսկական անունով, փոխանակ ձևացնելու, թե այն «Մենըր» ֆերմա է կոչվում: Նրանք նաև դադարել էին օգնել Զոնզին, որը հրաժարվել էր ֆերման վերագրավելու իր հովսերից և տեղափոխվել էր ուրիշ երկրամասում ապրելու:

Վիմփըրին չհաշված, Անասնաֆերման արտաքին աշխարհի հետ դեռ կապեր չեր պահպանում, սակայն համառ լուրեր էին շրջում, որ Նապոլեոնն ուր որ է գործնական համաձայնություն է կնքելու Ֆոքավուդի միստր Փիլքինգդոնի կամ Փինչֆիլդի միստր Ֆրեդ-րիքի հետ, սակայն՝ ոչ, նշվում էր, երկուսի հետ միաժամանակ:

Մոտավորապես հենց այդ ժամանակ էր, որ խոզերը տեղափոխվեցին բնակելի տունը և հաստատվեցին այնտեղ: Անասուններին վերստին թվաց, որ ժամանակին դրա դեմ ընդունված է եղել բանաձև, սակայն Զուանը կրկին կարողացավ նրանց համոզել, որ դա այդպես չէ: Բացարձակապես անհրաժեշտ է, ասաց նա, որ խոզերը, որոնք ֆերմայի ուղեղն են, աշխատելու հարմարավետ պայմաններ ունենան: Բացի այդ, Առաջնորդին (վերջերս նա սկսել էր Նապոլեոնին անդրադառնալ «Առաջնորդ» տիտղոսով) ավելի վայել է ապրել տանը, քան գոմում: Չնայած դրան, այն լուրը, թե խոզերը ոչ միայն ուստում են խոհանոցում և հանգստանում հյուրասենյակում, այլ նաև քնում անկողիններում, որոշ անասունների մոտ անհանգստություն առաջացրեց: Դմբուզը սովորականի պես դրան պատասխանեց՝ «Նապոլեոնը միշտ ճիշտ է», սակայն Երեքնուկը, որը կարծես թե

անկողինների դեմ որոշակի օրենք էր հիշում, գնաց ամբարի մոտ և փորձեց վերծանել պատին գրանցված Յոթ Պատվիրանները: Զկարողանալով կարդալ առանձին տառերից ավելին՝ նա կանչեց Մյուրիին:

– Մյուրիել, – ասաց նա, – կարդա ինձ համար Չորրորդ պատվիրանը: Այստեղ ոչինչ չի՝ գրված անկողնում երբեք չքնելու մասին:

Մյուրիելը որոշ դժվարությամբ հանգերով կարդաց Պատվիրանը:

– Այստեղ գրված է՝ «Անասունը երբեք չի քնի անկողնում սավանով», – վերջապես հայտնեց նա:

Զարմանալի է, սակայն երեքնուկը Չորրորդ պատվիրանում սավանների հիշատակություն չէր մտաբերում, բայց քանի որ դա գրված էր պատին, ուրեմն այդպես էլ կար: Զոանը, որը մի երկու-երեք շան ուղեկցությամբ պատահաբար անցնում էր կողքով, հարցը լուսաբանեց ճիշտ անկյան տակ:

– Ուրեմն դուք, ընկերներ, – ասաց նա, – արդեն լսե՞լ եք, որ մենք, խոզերս, անկողնի մեջ ենք քնում: Իսկ ի՞նչ կա որ: Դուք, իհարկե, չէի՞ք կարծում, թե երբեմ օրենք է եղել անկողինների դեմ: Անկողին պարզապես նշանակում է քնելու տեղ: Խոտի խուրձը գոմում, փաստորեն, նույնպես անկողին է: Օրենքը սավանով անկողնի դեմ է, որը մարդու հնարանը է: Մենք

իանել ենք տան անկողինների սավանները և քնում ենք վերմակների միջև: Դետք է ասել, որ դրանք շատ հարմարավետ անկողիններ են: Սակայն ոչ ավել, քան մեզ հարկավոր է, ընկերներ, հաշվի առնելով մեզնից պահանջվող մտավոր աշխատանքը: Դուք ի՞ն չե՞ք ուզում մեզնից խել մեր հանգիստը, ընկերներ: Դուք չեք հանդուրժի, որ մենք հոգնածության պատճառով թերանանք մեր պարտականություններում: Ձեզանից ոչ մեկն, իհարկե, չի ցանկանում Զոնզի վերադարձը, այդպես չէ:

Անասուններն իսկովն հավաստեցին նրա իրավացիությունը, և անկողիններում քնելու հարցին ոչ ոք այլս չանդրադարձավ: Իսկ երբ որոշ ժամանակ անց հայտարարվեց, որ այսուհետև խոզերն առավտյան արթնանալու են մնացածներից մեկ ժամ ուշ, այդ հարցով նույնպես ոչ մի գանգատ չեղավ:

Աշնանն անասունները հոգնած էին, բայց երջանիկ: Դժվարին տարուց, խոտի և հացահատիկի մի մասը վաճառելուց հետո անասնակերի ծմուն պաշարն այնքան էլ առատ չէր, բայց հողմաղացը հատուցում էր այդ ամենը: Այն համարյա կիսով չափ կառուցված էր: Բերքահավաքից հետո եղանակը դեռ որոշ ժամանակ բարենպաստ էր, և անասուններն աշխատում էին ավելի եռանդուն, քան երբեմ,

արդարացված համարելով ամբողջ օրը քար կրելը, եթե դրանով հողմաղացի պատերը գելթ մի քիչ պիտի բարձրանային: Դմբուզը լուսի լույսի տակ մեկ-երկու ժամ աշխատում էր անգամ գիշերները: Ազատ պահերին անասունները ճեմում էին կիսավարտ հողմաղացի շուրջը, զմայվելով պատերի ուղղաձիգությամբ ու ամրությամբ և հիանալով, որ ընդունակ են եղել այդքան տպավորիչ մի կառույց ստեղծել: Միայն ծեր Բենիամինն էր հրաժարվում հողմաղացով խանդավառել, չնայած, ինչպես միշտ, ոչինչ չէր ասում, բացի իր առեղծվածային դիտողությունից, թե էշերը երկար են ապրում:

Նոյեմբերին սկսվեցին հարավ-արևմտյան կատաղի քամիները: Շինարարությունն ընդհատվեց, որովհետև ցեմենտ շաղախելու համար օդը չափից ավելի խոնավ էր: Վերջապես մի գիշեր քամին այնքան սաստկացավ, որ ֆերմայի կառույցները սկսեցին դղրդալ, իսկ ամբարի տանիքից մի քանի կղմինդր պոկվեց: Հավերն արթնացան սարսափից կչկչալով՝ նրանք երազում հրացանի հեռավոր կրակոց էին լսել: Առավոտյան գոմից դուրս գալով՝ անասունները հայտնաբերեցին, որ դրոշի կայմն ընկած է, իսկ բոստանի ծայրի ծփին բողկի պես արմատախիլ է արված: Հազիվ էին նրանք հասցրել դա նկատել, երբ բոլորի կոկորդից հուսահատության ճիշ

դուրս թռավ։ Նրանց առջև սոսկալի մի տեսարան էր։ Հողմաղացն ավերված էր։

Մի ընդհանուր մղումով նրանք նետվեցին դեպի բլուրը։ Նապոլեոնը, որը հազվադեպ էր շտապում, վագոս էր բոլորի առջևից։ Այս, նրանց տքնածան աշխատանքի արդյունքը հավասարեցված էր հողին, այդքան դժվարություններով կտրած ու կրած քարերը թափված էին շուրջըլորը։ Չկարողանալով խոսել՝ բոլորը վշտահար նայում էին ցաքուցրիվ քարերին։ Նապոլեոնը լուս հետ ու առաջ էր անում՝ երբեմն հոտոտելով գետինը։ Նրա պոչը տնկվել և կտրուկ տարութերվում էր, որը լարված մտավոր գործոննեություն էր վկայում։ Հանկարծ նա կանգ առավ, ասես որոշում կայացնելով։

– Ընկերներ, – ասաց նա անվրդով, – գիտե՞ք, թե ով է սրա պատասխանատուն։ Ով է այն թշնամին, որը գիշերով եկել ու փլել է մեր հողմաղացը։ ԶՆԱԳՆԴԻՆ-Հանկարծ բացականչեց նա ամպագողով մի ձայնով։ Զնագնդին է արել այս ամենը։ Քինախնդրությունից դրդված, ցանկանալով լուծել իր անփառունակ արտաքսման վրեժը, այդ դավաճանը գիշերով սպրդել է ներս և ավերել է մոտ մեկ տարվա մեր աշխատանքի արդյունքը։ Հենց այստեղ, ընկերներ, ես մահվան եմ դապատարտում Զնագնդուն։ Երկրորդ կարգի «Հերոս Անասուն» և կես բուշել խնձոր կատանա նա,

ով իրագործի դատավճիողը: Մի ամբողջ բուշել խնձոր նրան, ով դավաճանին կենդանի բռնի:

Անասուններն անսահման ցնցված էին, իմանալով, որ անգամ Զնագնդու պես մեկն ընդունակ էր այդ աստիճանի չարագործության: Լավեցին վրդովմունքի բացականչություններ, ամեն մեկը սկսեց Զնագնդուն բռնելու ձևեր հորինել, եթե վերջինս փորձեր վերադառնալ: Բյրակից ոչ հեռու համարյա իսկույն խոզի ոտնահետքեր հայտնաբերվեցին: Դրանք կարծես թե տանում էին ցանկապատի միջի անցքի ուղղությամբ: Հետքերը հոտոտելով՝ Նապոլեոնը հայտարարեց, որ դրանք Զնագնդունն են: Նրա կարծիքով՝ Զնագնդին ամենայն հավանականությամբ եկել էր Ֆոքսվուդ ֆերմայի կողմից:

– Ընկերներ, այլս ոչ մի րոպե չենք կորցնում, – ասաց Նապոլեոնը, հետքերն ուսումնասիրելուց հետո: – Անելիք դեռ շատ կա: Հենց այս առավոտից սկսում ենք հողմաղացի վերականգնումը և կշարունակենք ամբողջ ձմեռ, անկախ եղանակից: Մենք ցույց կտանք այդ ողորմելի դավաճանին, որ մեզ այդքան էլ հեշտ չէ կասեցնել: Լավ հիշեք, ընկերներ, ոչ ոք չի կարող խափանել մեր ծրագրերը՝ դրանք անշեղորեն կիրագործվեն մինչև վերջ: Առաջ, ընկերներ: Կեցցե հողմաղացը: Կեցցե Անասնաֆերման:

## ԳԼՈՒԽ 7

Զմեռը շատ դժվարին էր: Փոթորկու եղանակը փոխարինվեց անձրևներով ու ջյունով, իսկ ապա՝ սառնամանիքով, որը տևեց մինչև փետրվարի կեսերը: Անասուններն ուժերի ներածին չափով շարունակում էին հողմաղացի վերականգնումը, լավ գիտակցելով, որ արտաքին աշխարհը հետևում է իրենց, և որ նախանձ մարդիկ կցնծան ու հաղթանակ կտոնեն, եթե հողմաղացը չկառուցվի ժամանակին:

Մարդիկ, ի հեճուկս նրանց, ձևացնում էին, թե չեն հավատում, որ հողմաղացն ավերել է Զնագնդին՝ նրանք պնդում էին, որ հողմաղացը փլվել է պատերի բարակության հետևանքով: Անասունները, սակայն, գիտեին, որ դա այդպես չէ: Այնուամենայնիվ, այս անգամ որոշվեց երկու թիզի փոխարեն պատերը շարել երեք ոտք հաստությամբ, իսկ դա նշանակում էր, որ հարկավոր է անհամեմատ մեծ քանակությամբ քար

հավաքել: Երկար ժամանակ քարիանքը ծածկված էր ձյունով, և ոչինչ անել հնարավոր չէր: Որոշ առաջընթաց նկատվեց դրան հաջորդած չոր սառնամանիքին, բայց դա դաժան աշխատանք էր, և անասունները դժվարությամբ էին վերականգնում իրենց առաջվա խանդավառությունը: Նրանք անընդհատ մրսում էին և սովորաբար նաև քաղցած էին: Թևաթափ չէին լինում միայն Դմբուզն ու Երեքնուկը: Զոանը հիանալի ճառեր էր ասում նվիրման բերկրանքի և աշխատանքի արժանապատկության մասին, բայց մյուս անասուններն ավելի շատ ներշնչվում էին Դմբուզի ուժից և նրա մշտական բացականչությունից՝ «Ես ավելի եռանդուն կաշխատեմ»:

Հունվարին անասնակերը պակասեց: Հացահատիկի օրաբաժինը կտրուկ կրճատվեց և հայտարարվեց, որ փոխարենը սահմանվում է կարտոֆիլի լրացուցիչ նորմա: Սակայն պարզվեց, որ կարտոֆիլի բերքի մեծ մասը ցրտահարված է, քանի որ կույտերը բավականաչափ հաստ շերտով չէին ծածկվել: Կարտոֆիլները փափկել էին ու դալկացել, մեծ մասն ուտելու պիտանի չէր: Անասուններն օրերով ոչինչ չէին ուտում դարմանից ու ճակնդեղից բացի: Սովամահությունը դարձավ իրական հնարավորություն:

Այդ փաստն անհրաժեշտ էր արտաքին աշխարհից թաքցնել: Հողմաղացի փլուզումից քաջալերվելով՝ մարդիկ սկսել էին նորանոր ստեր հորինել Անասնաֆերմայի մասին: Նորից պնդում էին, թե անասունները սատկում են սովից ու համաճարակներից, որ նրանք անվերջ գզվուտվում են և զբաղվում կանիբալիզմով ու մանկասպանությամբ: Նապոլեոնը լավատեղյակ էր այն բացասական հետևանքներին, որոնց կարող էին հասցնել անասնակերի պակասորդին վերաբերող իրական տվյալները, և նա որոշեց Վիմփըրին օգտագործել հակառակ տպավորությունը ստեղծելու համար: Այսուհետև անասունները Վիմփըրի շաբաթական այցելությունների ժամանակ նրա հետ բոլորովին չեին շփվում: Միևնույն ժամանակ հատուկ ընտրված մի քանիսին, մեծ մասսմբ ոչխարներին, ցուցունք էր տրված նրա ներկայությամբ իմիջիայլոց նկատել, որ օրաբաժիններն ավելացել են: Բացի այդ Նապոլեոնը իրամայել էր համարյա դատարկ շտեմարանները բերներերան ավագ լցնել, իսկ վրայից ծածկել հացահատիկի ու անասնակերի մնացորդներով: Մի հարմար պատրվակով Վիմփըրին անց էին կացրել ամբարի միջով՝ հնարավորություն ստեղծելով տեսնել շտեմարանները: Այդպես խարվելով նա շարունակում էր

աշխարհին պատմել, որ Անասնաֆերմայում սննդի պակաս չի զգացվում:

Բայց և այնպես, հունվարի վերջին պարզ դարձավ, որ ինչ-որ տեղից անհրաժեշտ է լրացնոցի հացահատիկ ճարել: Այդ օրերին Նապոլեոնը հազվադեպ էր հրապարակ դուրս գալիս՝ ժամանակի մեծ մասն անցկացնելով բնակելի տանը, որի ամեն մի դուրս պահպանում էր կատաղի տեսքով մի շուն: Դուրս գալու դեպքում նրան միշտ հանդիսավոր կերպով ուղեկցում էին վեց շուն՝ չորս կողմից շրջապատելով և գոմուպով, եթե մեկը փորձեր չափից ավելի մոտենալ: Հաճախ նա անգամ չէր հայտնվում կիրակի առավոտներին՝ իր հրամաններն արձակելով ուրիշ խոզերի, սովորաբար Զոանի միջոցով:

Մի կիրակի Զոանը հայտարարեց, որ հավերը, որոնք ուր որ է պիտի ածեին, պարտավոր են ծվերը հանձնել: Վիմփըրի միջոցով Նապոլեոնը շաբաթական չորս հարյուր ձու մատակարարելու պայմանագիր էր կնքել: Դրանից ստացված գումարով հացահատիկ ու անասնակեր էր գնվելու մինչև ամառ, երբ պայմանները կթեթևանան: Դա լսելուն պես հավերը սուլկալի աղաղակ գցեցին: Նրանց զգուշացրել էին նման զոհողության հավանականության մասին, բայց հավերը չէին հավատացել, որ դա հնարավոր է:

Նրանք արդեն պատրաստվում էին գարնանային թուխս նատել և ընդվզեցին, պնդելով, որ ձվերի բունագրավումը սպանություն է: Զոնզի վտարման օրից առաջին անգամ ֆերմայում ապստամբության պես մի բան տեղի ունեցավ: Երեք երիտասարդ և վառեկների առաջնորդությամբ հավերը վճռական մի փորձ ձեռնարկեցին խափանել Նապոլեոնի նախաձեռնությունը: Նրանք թառեցին տանիքի հեծաններին և սկսեցին ածել այնտեղ՝ ձվերն ընկնում էին հատակին ու փշրվում: Նապոլեոնի անգութ պատախանը հետևեց անհապաղ: Նա հրամայեց կտրել հավերի օրաբաժինը և մահապատիժ սահմանեց ցանկացած անասունի համար, որը կփորձի նրանց թեկուզ մեկ հատիկ տալ: Ծները հետևում էին այդ հրահանգների իրագործմանը: Հինգ օր դիմանալուց հետո հավերը հանձնվեցին և վերադարձան իրենց թառերը: Ինը հավ այդ ընթացքում սատկեց: Նրանց թաղեցին բուտանում՝ լուր տարածելով, թե մահվան պատճառը կոկցիդիոզն էր: Վիմփըրն այդ մասին ոչինչ չիմացավ, և ձվերը ժամանակին հանձնվեցին նպարավաճառին, որն այդուհետև գալիս էր ամեն շաբաթ: Այդ ամբողջ ընթացքում Զնագնդուն ոչ ոք չէր տեսել: Ասում էին, թե նա թաքնվում է հարևան ֆերմաներից մեկում՝ Ֆոքսվուդում կամ Փինչֆիլդում: Նապոլեոնը

դրանց տերերի հետ նախկինից փոքր-ինչ ավելի լավ հարաբերություններ ուներ: Ֆերմայի բակում տասը տարուց ի վեր գերանների մի կույտ էր դարսված, որ գոյացել էր ժամանակին հաճարենու անտառութը մաքրելուց: Փայտը լավ չորացած էր, և Վիմփը-ը Նապոլեոնին խորհուրդ էր տվել կույտը վաճառել՝ միստր Փիլքինգտոնը և միստր Ֆրեդրիքը երկուսն էլ ցանկանում էին այն գնել: Նապոլեոնը չէր կարողանում որոշել, թե նրանցից ում ընտրի: Նկատել էին, որ երբ նա հակվում էր Ֆրեդրիքի կողմը, հայտարարվում էր, որ Զնագնդին թաքնվում է Ֆոքսվուդում, իսկ երբ նախապատվությունը տրվում էր Փիլքինգտոնին, Զնագնդին հայտնվում էր Փինչֆիլդում:

Վաղ գարնանն անսպասելիորեն տագնապալի մի բան հայտնաբերվեց: Զնագնդին գիշերները գաղտագողի թափանցում էր ֆերմա: Անասուններն այն աստիճան հուզված էին, որ չէին կարողանում գոմում հանգիստ քնել: Ասում էին, որ նա մթության մեջ ամեն գիշեր սողոսկում է ֆերմա և ամեն տեսակի չարիք գործում: Նա գողանում էր ցորենը, շուռ էր տալիս կաթով դույլերը, կոտրում ձվերը, տրորում էր ցանքը, կրծոտում պտղատու ծառերը: Ամեն մի ձախորդություն իսկույն ևելք վերագրվում էր Զնագնդուն: Եթե լրսամուտ էր կոտրվում կամ խցանվում էր ջրատարը,

մեկնումեկն անպայման կասեր, որ դա Զնագնդին է գիշերով եկել ու արել: Երբ շտեմարանների բանալին կորավ, ամբողջ ֆերման վստահ էր, որ Զնագնդին այն զցել է ջրհորը: Նրանք շարունակում էին դրան հավատալ, անգամ այն ժամանակ, երբ բանալին գտնվեց այսուրի պարկի տակ: Կովերը միաձայն հայտարարեցին, որ Զնագնդին սպրդում է գոմ և քսի մեջ թաքրուն կթում իրենց: Առնետները, որոնք այդ ձմեռ բավական նեղություն էին պատճառել, հայտարարվեցին Զնագնդու դաշնակիցներ:

Նապոլեոնն ազդարարեց Զնագնդու գործունեության համակողմանի հետաքննություն: Ծների ուղեկցությամբ նա մանրամասն զննեց ֆերմայի բոլոր շինությունները, մինչ մնացած անասունները հետևում էին պատշաճ հեռավորության վրա: Մի քանի քայլը մեկ Նապոլեոնը կանգ էր առնում ու հոտոտում ամեն անկյուն՝ ամբարում, գոմում, հավաքնում, բուսանում, համարյա ամեն տեղ գտնելով Զնագնդու հետքերը: Դունչը սեղմելով գետնին՝ նա մի քանի անգամ խոր շունչ էր քաշում և սուկալի ձայնով բացականչում՝ «Զնագնդին: Նա այստեղ էր: Ես հստակ զգում եմ նրա հոտը»: «Զնագնդի» խոսքի վրա բոլոր շները սարսուազդու գոմոցներ էին արձակում՝ ժանիքները ցցելով: Անասունները սաստիկ վախեցած էին:

Նրանց թվում էր, թե Զնագնդին մարմնավորում է անտեսանելի մի սպառնալիք, որը համակել է ամբողջ շրջապատը և հղի է ամեն տեսակի փորձանքով։ Երեկոյան Զուանը բոլորին կանչեց և տագնապած տեսքով ասաց, որ լուրջ նորություն ունի հայտնելու։

— Ընկերներ,— բացականչեց նա՝ ջղային դես ու դեն անելով,— քիչ առաջ հայտնաբերվել է սոսկալի մի փաստ։ Զնագնդին ծախվել է Փինֆիլդի Ֆրեդրիքին, որը դավեր է նյութում մեր դեմ ֆերման զավթելու նպատակով։ Պատրաստվող գրոհի ժամանակ Զնագնդին ծառայելու է որպես նրա ուղեվար։ Սակայն ամենավատը դեռ դա չէ։ Մենք բոլորս կարծում էինք, թե Զնագնդու ըմբոստացման պատճառը նրա հավակնոտ և ունայն նկարագիրն է։ Պարզվեց, ընկերներ, որ մենք մոլորության մեջ էինք։ Գիտե՞ք, թե ինչն է իսկական պատճառը։ Զնագնդին սկզբից ի վեր եղել է Զոնզի դաշնակիցը։ Այդ ամբողջ ընթացքում նա Զոնզի գաղտնի գործակալն էր։ Դա ապացուցվում է նրա թողած փաստաթղթերով որոնք մենք քիչ առաջ հայտնաբերեցինք։ Հստ իս՝ դա շատ բան է բացատրում, ընկերներ։ Չէ՞ որ ինքներս ականատես եղանք, թե ինչպես նա, բարեբախտաբար անհաջող, փորձ արեց մեզ պարտության մատնել և ոչչացնել Գոմի ճակատամարտում։

Անասունները մնացել էին ապշած: Նման նենգությունը բազմապատիկ ավելի սոսկալի էր, քան հողմաղացի ավերումը: Որոշ ժամանակ նրանք անգամ չէին կարողանում այն լիովին ընկալել: Բոլորը հիշում էին կամ կարծում էին, որ հիշում են, թե ինչպես է Զնագնդին նրանց առաջնորդել Գոմի ճակատամարտում, ինչպես է քաջալերել և գրոհի կոչել, ինչպես մարտում մի պահ անգամ չի վարանել նույնիսկ Զոնզի կրակոցից Վիրավորվելուց հետո: Առաջին պահերին փոքր-ինչ դժվար էր հասկանալ, թե ինչպես է այդ ամենը կապվում Զոնզի կողմնակից լինելու հետ: Նույնիսկ Դմբուզը, որը հազվադեպ էր հարցեր տալիս, զարմացած էր: Ուժերը տակը ծալելով՝ նա պառկեց, փակեց աչքերն ու մեծագույն դժվարությամբ կարողացավ ձևակերպել իր միտքը:

– Ես դրան չեմ հավատում, – ասաց նա, – Զնագնդին քաջ կովում էր Գոմի ճակատամարտում: Ես ինք եմ դա տեսել: Չէ՞ որ մենք նրան իսկովն ևեթ առաջին կարգի «Հերոս Անասուն» շնորհեցինք:

– Ընկերներ, դա մեր սխալն էր: Քանի որ հիմա ստույգ հայտնի է, – այդպես է գրված մեր հայտնաբերած գաղտնի փաստաթղթերում, – որ իրականում նա փորձում էր մեզ ծուղակը գցել ու կործանել:

– Բայց չէ՝ որ նա վիրավորվեց, – ասաց Դմբուղը: Բոլորս տեսանք, թե ինչպես էր նրա վերքերից արյուն կաթում:

– Դա նախնական պայմանավորվածության մաս էր կազմում, – գոռաց Զուանը: Զոնզի կոտորակը նրան ընդամենը քերծեց: Ես ձեզ ցույց կտայի իր վկայությունը, եթե դուք կարդալ կարողանայիք: Հստ այդ դավադրության՝ վճռական պահին Զնագնդին պիտի փախուստի նշան տար և ուզմի դաշտը թողներ թշնամուն: Քիչ էր մնում, որ դա նրան հաջողվեր, ես անզամ կասեի, ընկերներ, որ նա անպայման հաջողության կիասներ, եթե չլիներ մեր հերոսական Առաջնորդը՝ ընկեր Նապոլեոնը: Հիշո՞ւմ եք, թե ինչպես ճիշտ այն պահին, երբ Զոնզը իր մարդկանց հետ մտավ բակ, Զնագնդին հանկարծ շուր եկավ ու փախավ, և կենդանիներից շատերը հետևեցին նրան: Ինչպե՞ս կարող եք նաև չիիշել, որ նոյն այդ պահին, երբ թվում էր, թե ամեն ինչ կորել է, և արդեն խոճապ էր սկսվում, ընկեր Նապոլեոնը, «Կորչի մարդկությունը» ճիշով, առաջ ցատկեց և ատամները միարձեց Զոնզի ոտքի մեջ: Այդքանը հո հիշում եք, չէ՝ ընկերներ, – բացականցեց Զուանը դեսուդեն ցատկելով:

Հիմա, երբ Զուանն ամեն ինչ պատկերավոր նկարագրեց, անասուններին թվաց, որ նրանք իսկապես

դա հիշում են: Ամեն դեպքում նրանք հիշեցին, որ ճակատամարտի վճռական պահին Զնագնդին փախուստի է դիմել: Սակայն Դմբուզը դեռևս թեթևակի անհանգստացած էր:

– Ես չեմ հավատում, որ Զնագնդին դավաճան էր հենց սկզբից, – վերջապես ասաց նա:- Հետագայի նրա արարքներն՝ ուրիշ բան: Բայց Գոմի ճակատամարտում նա իսկական ընկեր էր:

– Մեր Առաջնորդ ընկեր Նապոլեոնը, – դանդաղ ու հատ-հատ ազդարարեց Զոանը, – վճռականապես հայտարարել է, վճռականապես, ընկերներ, որ Զնագնդին սկզբից ի վեր եղել է Զոնզի գործակալը, այդ, անգամ Ապստամբության գաղափարը ծագելուց շատ ավելի առաջ:

– Այ, դա ուրիշ բան, – ասաց Դմբուզը:- Եթե ընկեր Նապոլեոնն այդպես է ասում, ուրեմն ճիշտը դա է:

– Ահա ճիշտ մոտեցումը, ընկերներ, – բացականչեց Զոանը, միևնույն ժամանակ իր փոքրիկ պապուն աչքերով ծայր աստիճան անդուր մի հայացք նետելով Դմբուզի կողմը: Նա շրջվեց, որ գնա, և ազեցիկ ձայնով ավելացրեց:- Զգուշացնում եմ բոլոր կենդանիներին՝ աչքներդ լայն բաց պահեք: Մենք հիմքեր ունենք կասկածելու, որ հենց այս պահին Զնագնդու ծպտված գործակալներ կան նաև մեր մեջ:

Չորս օր անց կեսօրից հետո Նապոլեոնը հրամայեց անասուններին հավաքել բակում: Երբ բոլորը եկան, Նապոլեոնը, իր երկու շքանշանը կապած (վերջերս նա իրեն առաջին և երկրորդ կարգի «Հերոս Անասուն» էր շնորհել) տնից դուրս եկավ ինը ամենի շների ուղեկցությամբ, որոնց սահմոկեցուցիչ գոմոցներից անասունների մեջքով դող էր անցում: Բոլորն անխոս կծկվեցին իրենց տեղերում՝ կարծես կանխազգալով, որ սարսափելի մի բան է պատահելու:

Նապոլեոնը խոժող հայացքով աչջի էր անցկացնում ներկաներին: Հանկարծ նա զիլ մի խոինչ արձակեց: Նոյն պահին շները նետվեցին առաջ և, ականջներից բռնելով, սարսափից ու ցավից վնասացող չորս խոզերի քարշ տվեցին Նապոլեոնի ոտքերի տակ: Խոզերի ականջները արնել էին, շները, արյուն ճաշակելով, էլ ավելի գազագեցին: Նրանցից ոմանք, ի զարմանս բոլորի, հարձակվեցին Դմբուզի վրա: Տեսնելով դա՝ Դմբուզն օդի մեջ սմբակով գետնին գամեց շներից մեկին: Շունը կաղկանձեց, գթություն աղերսելով, իսկ մնացածները փախան՝ պոչերը սեղմած ոտքերի արանքում: Դմբուզը նայեց Նապոլեոնին, որ իմանա՝ շանը ջախջախի՝, թե՛ բաց թողնի: Այլայված Նապոլեոնը կտրուկ հրամայեց շանն ազատ արձակել, և ճմրթված ու կաղկանձող շունը ծլկեց:

Իրարանցումը խաղաղվեց: Չորս դողիողացող խոզերը մեղավոր տեսքով սպասում էին: Նապոլեոնը նրանց պատվիրեց խոստովանել իրենց հանցանքը: Դրանք հենց այն խոգերն էին, որոնք բողոքել էին կիրակնօրյա միտինգների վերացման դեմ: Առանց թելադրանքի նրանք խոստովանեցին, որ գաղտնի կապ են պահպանել Զնագնդու հետ՝ սկսած վերջինիս արտաքսումից, օժանդակել են նրան հողմաղացի կործանման գործում և դաշինք էին կսքել նրա հետ Անասնաֆերման միասոր Ֆրեդրիքին հանձնելու նպատակով: Նրանք նաև ավելացրին, որ Զնագնդին ներքին կարգով ընդունել է, որ երկար տարիների ընթացքում Զոնգի գործակալն է եղել: Խոստովանությունից հետո շները ճարպկորեն պատուեցին նրանց կոկորդները, և Նապոլեոնը սարսուազդու ձայնով ուզեց տեղեկանալ, թե արդյոք ուրիշ անասուններ խոստովանելիք չունեն:

Զվերի ապատամբության անհաջող փորձի պարագլուխ երեք հավերն առաջ եկան և խոստովանեցին, որ Զնագնդին նրանց երազում իրահիել է Նապոլեոնի կարգադրություններին չենթարկվել: Սրանք նույնպես մորթվեցին: Ապա մի սագ խոստովանեց, որ անցյալ տարվա բերքահավաքին թաքցրել ու գիշերով կերել է գարու վեց հատիկ: Մի ոչխար խոստովանեց, որ Զնագնդու դրդմամբ միզել է

խմելու ջրավազանի մեջ, ուրիշ երկուսն ընդունեցին, որ սպանել են Նապոլեոնին հատկապես նվիրված մի ծեր խոյի՝ վերջինիս խարույկի շուրջը վազեցնելով։ Բոլորին տեղնուտեղը մորթեցին։ Խոստովանությունների և մահապատիժների պատմությունը շարունակվեց, մինչև որ Նապոլեոնի առջև դիակների մի կույտ գոյացավ, և օդը լցվեց արյան ծանր շնչով, որն անձանոթ էր Զոնզի վտարման օրից ի վեր։

Երբ ամեն ինչ ավարտվեց, ընկճված ու ցնցված անասունները, քացի խոզերից ու շներից, առանց խոսքի թողեցին-հեռացան։ Նրանք չգիտեին, թե որն է ավելի սոսկալի՝ Զնագնդու հետ դաշնակցած անասունների դավաճանությունը, թե՝ այն դաժան հատուցումը, որին իրենք ականատես եղան։ Հին օրերին նրանք հաճախ ներկա էին գտնվել ոչ պակաս արյունահեղ տեսարանների, սակայն բոլորին թվում էր, որ այժմ ամեն ինչ շատ ավելի վատ է, քանի որ տեղի է ունեցել հենց իրենց մեջ։ Զոնզի փախուստից մինչև օրս ոչ մի կենդանի ուրիշ կենդանու չէր սպանել։ Անգամ առնետներին վնաս չէր հասցվել։ Բոլորը դիմեցին դեպի կիսավարտ հողմաղացի բլրակը և, կույզ գալով, պառկեցին ու իրար սեղմվեցին, ասես տաքանալու համար՝ Երեքնուկը, Մյուրիելը, Բենիամինը, կովերը, ոչխարները, հավերն ու սագերը,

փաստորեն՝ բոլորը, բացի կատվից, որն անհետացել էր ճիշտ Նապոլեոնի կանչած ժողովից առաջ: Որոշ ժամանակ ոչ ոք չէր խոսում: Միայն Դմբուզն էր մնացել ոտքի վրա: Երկար սև պոչը խփելով կողերին, նա դես ու դես էր անում, երբեմն զարմանքից թեթևակի խրինջալով: Վերջապես նա ասաց:

– Ես ոչինչ չեմ հասկանում: Երբեք չէի հավատա, որ մեր ֆերմայում կարող են նման բաներ պատահել: Երևի թերությունը հենց մեր մեջ է: Միակ ելքն, ըստ իս, ավելի եռանդուն աշխատանքի մեջ է: Այսուհետև ես առավոտյան մեկ ժամով շուտ կարթնանամ:

Դա ասելով՝ նա դիմեց դեպի քարհանքը և մինչև քուն մտնելը երկու քեռ քար հավաքեց ու քարշ տվեց հողմաղացի մոտ:

Անասոններն անձայն կուչ եկան Երեքնուկի շուրջը: Բլրակից լայն տեսարան էր բացվում շուրջբոլորը: Անասնաֆերմայի մեծ մասը երևում էր՝ ճանապարհին հասնող երկար արոտը, խոտինձի արտը, անտառուտը, ջրավազանը, ցորենի կանաչ ծիլերով դաշտերը, շինությունների կարմիր կտորները ծինելովզներից գալարվող ծխով: Արևի հորիզոնական ճառագայթները ուսկեզօծել էին խոտն ու թփուտների եզրերը: Դեռ երբեք ֆերման, – նրանք մի տեսակ զարմանքով հիշեցին, որ դա հենց իրենց ֆերման է՝ ծայրից ծայր

անասունների սեփականությունը, – այդքան բաղձալի վայր չէր թվացել: Բլրակից ցած նայելով՝ Երեքնուկի աչքերն արցունքով լցվեցին: Եթե նա ի վիճակի լիներ ձևակերպել իր մտքերը, ապա կասեր, որ նրանք բոլոր վին այլ նպատակներ ունեին, երբ տարիներ առաջ սկսեցին պայքարել մարդու բռնակալության դեմ: Սարսափի ու կոտորածի տեսարաններ չեին, որ ակնկալել էին նրանք այն գիշերը, երբ ծեր Գնդապետը նրանց Ապստամբության կոչ արեց: Երեքնուկն այն ժամանակ ապագան պատկերացնում էր որպես սովից ու մտրակից ազատ անասունների մի հասարակարգ, ուր բոլորը հավասար էին, ամեն մեկն աշխատում էր իր ուժերի ներածին չափով, իսկ ուժեղները պաշտպանում էին թռվերին, ինչպես ինքն էր պաշտպանել բարիկներին Գնդապետի ճառի գիշերը: Փոխարենը, – և նա զգիտեր, թե ինչո՞ւ, – եկել էր մի ժամանակ, երբ շուրջը ոչ ոք չէր հանդգնում արտահայտել իր կարծիքը, ամենուր կատաղած շներ էին վիստում, իսկ ընկերները, սուկալի ոճիրներ խոստովանելով, աչքիդ առջև հողոտվում էին: Երեքնուկը չէր մտածում ապատամբության կամ անհնազանդության մասին: Նա գիտեր, որ այդ ամենով հանդերձ, իրենց վիճակը շատ ավելի լավ է, քան Զոնզի օրոք, և որ ամեն ինչից առաջ անհրաժեշտ է կանխել մարդկանց վերադարձը: Ինչ էլ

լիներ, նա շարունակելու է հավատարիմ մնալ, քրտնացան աշխատել և կատարել իրամանները, Նապոլեոնի առաջնորդության ներքո: Բայց և այնպես նաև մնացած բոլոր անասունները դրա համար չեն, որ պայքարել էին ու աշխատել: Հանուն դրա չէր, որ նրանք կառուցել էին հողմաղացն ու կուրծք տվել Զոնզի գնդակներին: Ահա թե ինչ էր մտածում Երեքնուկը, չկարողանալով դրան համապատասխան խոսքեր գտնել:

Վերջապես, փորձելով ինչ-որ չափով արտահայտել այն, ինչն անկարող էին իր իմացած խոսքերը, նա սկսեց երգել «Անգլիայի գազանները»: Նրան միացան շուրջը նատած անասունները, երեք անգամ անընդմեջ երգելով այդ երգը՝ մեղմ, դանդաղ ու վշտահար՝ այնպես, ինչպես մինչ այդ երբեք չէին երգել:

Հազիվ էին նրանք ավարտել երրորդ անգամը, երբ Զուանը, երկու շների ուղեկցությամբ, կարևոր ասելիք ունեցողի տեսքով մոտեցավ նրանց: Նա տեղեկացրեց, որ Նապոլեոնի հատուկ իրովարտակով «Անգլիայի գազանները» հայտարարվում է չեղյալ: Այսուհետև այդ երգն արգելված է:

Անասունները շանթահար էին:

- Ինչո՞ւ,- գոռաց Մյուրիելը:
- Դրա կարիքն, ընկերներ, այլս չկա,- սառը պատասխանեց Զուանը:- «Անգլիայի գազանները»

Ապատամբության երգն էր: Սակայն Ապատամբությունն այժմ արդեն ավարտված է: Դավաճանների մահապատժով այսօր այն հասավ իր վերջակետին: Եվ արտաքին, և ներքին թշնամին պարտված է: «Անգլիայի գազաններ»-ում մենք արտահայտում էինք գալիք կատարյալ հասարակարգի մեր բաղձանքը: Սակայն, քանի որ այդ հասարակարգն արդեն հաստատված է, պարզ է դառնում, որ նշված երգն այլևս իմաստ չունի: Չնայած իրենց երկյուղածությանը՝ անասուններից ոմանք թերևս բողոքեին, բայց այդ պահին ոչխարները սկսեցին իրենց սովորական մկնոցը. «Չորս ոտք լավ, երկու ոտք՝ վատ», որը շարունակվեց մի քանի րոպե՝ վերջ դնելով ցանկացած վիճաբանության: Այդուհետև «Անգլիայի գազաններն» էլ ոչ ոք չսեց: Դրա փոխարեն բանաստեղծ Մինիմուսը գրեց մի որիշ երգ, որը սկսվում էր հետևյալ տողերով.

*Երբեք, օ՛ ֆերմա անասունների,  
Դու իմ պարճառով վնաս չե՞ս կրի...*

Այս երգը կատարվում էր ամեն կիրակի, առավոտյան դրոշը բարձրացնելուց հետո: Բայց անասուններին չգիտես ինչու թվում էր, որ ոչ բառերը, և ոչ էլ մեղեղին «Անգլիայի գազաններին» չին հասնի:

## ԳԼՈՒԽ 8

Մի քանի օր անց, երբ մահապատիժների պատճառած սարսափը մարեց, անասուններից ոմանք հիշեցին, համենայն դեպս, նրանց թվաց, թե հիշեցին, որ Վեցերորդ պատվիրանն ազդարարում է՝ «Անասունը երբեք ուրիշ անասունի չի սպանի»: Ու չնայած խոզերի կամ շների ներկայությամբ ոչ ոք հարկ չհամարեց նշել այդ փաստը, անասունները զգում էին, որ կատարված սպանությունները դրա հետ չեն համատեղվում: Երեքնուկը Բենիամինին խնդրեց իր համար կարդալ Վեցերորդ պատվիրանը, իսկ երբ Բենիամինն ըստ իր սովորության ասաց, որ նման գործերի չի խառնվում, նա խնդրեց դա անել Մյուրիելին: Մյուրիելը կարդաց. «Անասունը երբեք ուրիշ անասունի չի սպանի առանց պատճառի»: Զգիտես ինչո՞ւ վերջին երկու բառը դուրս էին ընկել անասունների հիշողությունից: Սակայն այժմ նրանք համոզվեցին, որ

Պատվիրանը չի խախտված՝ պարզ էր, որ Զնագնդու հետ դաշնակցած դավաճաններին սպանելու համար ծանրակշիռ պատճառներ կային:

Այդ ամբողջ տարին անասուններն աշխատեցին ավելի եռանդուն, քան նախորդին: Հողմաղացի վերականգնումը նախկինից հաստ պատերով և նշանակված ժամկետին, չհաշված ֆերմայի առօրյա աշխատանքները, սաստիկ ծանր գործ էր: Լինում էին պահեր, երբ անասուններին թվում էր, որ իրենք ավելի երկար են աշխատում և ուտում են ոչ ավելին, քան Զոնզի ժամանակներում: Ամեն կիրակի առավոտ Զուանը, տոտիկով թղթի երկար մի թերթ սեղմած, բարձրաձայն թվեր էր կարդում, որոնք ապացուցում էին, թե անասնակերի ամեն տեսակի արտադրությունն աճել է 200, 300 կամ 500 տոկոսով: Անասունները նրան չհավատալու պատճառ չունեին, մանավանդ որ ոչ ոք հստակ չէր հիշում, թե ինչպիսին էր եղել վիճակն Ապստամբությունից առաջ: Զնայած դրան, լինում էին օրեր, երբ անասունները կնախընդրեին ավելի քիչ թվեր և ավելի շատ կեր ստանալ:

Բոլոր հրամաններն այժմ արձակվում էին Զուանի կամ մյուս խոզերից մեկի միջոցով: Նապուլեոնը երևում էր ամիսը մեկ-երկու անգամ: Շների շքախմբից բացի, նրան ուղեկցում էր նաև մի սև

աքաղաղ, որը, առջևից քայլելով, շեփորահարի պես բարձր «ծուղրուղու» էր կանչում Նապոլեոնի ամեն խոսելուց առաջ: Ասում էին, որ անգամ տան մեջ Նապոլեոնը մնացածներից զատ առանձին հարկաբաժին է գրադեցնում: Նա ճաշում էր մենակ, երկու սպասավոր շների ներկայությամբ և ուստում էր միայն Արքայական Դերբի սպասքից, որը գտնվում էր հյուրասենյակի ապակեպատ պահարանում: Ազդարարվել էր նաև, որ հրացանն ամեն տարի պարզվելու է Նապոլեոնի ծննդյան օրը, մյուս երկու հոբելյաններից բացի:

Նապոլեոնին այլևս երբեք պարզապես «Նապոլեոն» չէին կոչում: Պաշտոնական ոճում նրան անդրադառնում էին որպես «Մեր Առաջնորդ ընկեր Նապոլեոն»-ի, իսկ խոզերը նրա համար բազմապիսի կոչականներ էին հորինում, ինչպես, օրինակ՝ Անասունների Հայր, Մարդկության Սարսափ, Ոչխարների Պահապան, Բադիկների Բարեկամ և այլն: Զունն արցունքախեղդ էր լինում իր ճառերում՝ վկայակոչելով Նապոլեոնի իմաստությունը, անսահման բարությունը ու այն խոր սերը, որը նա տածում է բոլոր անասունների և մանավանդ այն թշվառների հանդեպ, որոնք դեռ տգիտության ու ստրկացման մեջ են մյուս ֆերմաններում: Սովորություն էր

դարձել Նապոլեոնին փառք տալ ամեն նվաճման ու բախսի բերման համար: Հաճախ կարելի էր լսել, թե ինչպես հավերից մեկը մյուսին ասում է. «Ընրիհիվ մեր Առաջնորդ ընկեր Նապոլեոնի ղեկավարության, ես այսօր իինգ ծու ածեցի», կամ ինչպես երկու կով ջրավազանի մոտ բացականչում էին. «Փառք ընկեր Նապոլեոնին, ինչ համեղ է ջուրը»: Ֆերմայում տիրող ընդհանուր տրամադրությունը լավ էր արտահայտում «Ընկեր Նապոլեոն» բանաստեղծությունը, որը գրել էր Մինհմուսը.

Ով զրկվածների միակ հենարան,  
Ով երջանկության առար շապրուխան,  
Բոցավառվում է հոգիս ոնց կերոն,  
Երբ ես նայում եմ, – օ լավի արքա, –  
Քո ղեկավարող աչքին հայրական.  
Արևի պես ջերմ ու հավերժական,  
Ընկեր Նապոլեոն:

Ով առարաձեռն բաշխող վերին  
Նրա, ինչ թանկ է քո զավակներին՝  
Թափալվելու հարդ ու լավի թափոն.  
Ամեն փոքր ու մեծ թոշոն ու զազան  
Երջանիկ է իր որջում սեղական  
Հոգագոր աչքի լուս քո հայրական,  
Ընկեր Նապոլեոն:

Եթե իմ կինը մի խոճկոր ծներ,-  
 Թեկուզ գրպնակի չափ է նա լիներ-  
 Որպես օրինակ, իդեալ, էպապոն  
 Քեզ պիսի ընպրեր, ղեկավար ճարմար,  
 Քեզ իր առաջին սուրբ երդումը տար  
 Եվ ճղճար քո անոնն արդար՝  
 Ըսկեր Նապոլեոն:

Նապոլեոնն այդ բանաստեղծությանը հավանություն էր տվել և պատվիրել էր հավերժացնել մեծ ամբարի պատին՝ Յոթ Պատվիրանների դիմաց: Կողքին Նապոլեոնի կիսադեմն էր, որը սպիտակ ներկով նկարել էր Զուանը:

Ֆերմայի բակում դիզված փայտանյութը դեռևս չէր վաճառվել, և Նապոլեոնը, Վիմֆըրի միջնորդությամբ, բարդ բանակցություններ էր վարում Ֆրեդրիքի ու Փիլքինգտոնի հետ: Ֆրեդրիքը փայտը գնելու ավելի մեծ ցանկություն ուներ, բայց հարմար գին չէր առաջարկում:

Միննոյն ժամանակ նորոգվել էին այն լուրերը, թե Ֆրեդրիքը, որը պայթում է հողմաղացի հանդեպ նախանձից, Անասնաֆերման գրոհելու և հողմաղացը ոչնչացնելու դավադրություն է նյութում: Հայտնի էր նաև, որ Զնագնդին շարունակում է թաքնվել Փինչֆիլի ֆերմայում: Ամառվա կեսին անասունները

խիստ անհանգատացան՝ լսելով երեք հավերի խոստովանության մասին։ Զնագնդու հրահրությամբ նրանք դավադրություն էին ծրագրել Նապոլեոնին սպանելու նպատակով։ Նրանց անմիջապես մահապատժի ենթարկեցին, իսկ Նապոլեոնի ապահովության համար նախաձեռնվեցին նոր միջոցներ։ Գիշերով նրա անկողինը սկսեցին հսկել չորս շուն, իսկ Կարմրուկ անունով մի խոճկորի հանձնարարվեց նրանից առաջ համտես անել բոլոր կերակուրները, որ հանկարծ դրանք թունավորված չլինեն։

Միևնույն ժամանակ հայտնի դարձավ, որ Նապոլեոնը պայմանավորվել է փայտը վաճառել Փիլքինգտոնին, վճոված էր նաև որոշ ապրանքների կանոնավոր փոխանակություն հաստատել Անասնաֆերմայի և Ֆոքսվուդի միջև։ Նապոլեոնի և Փիլքինգտոնի հարաբերություններն արդեն գրեթե բարեկամական էին, չնայած իրազործվում էին բացառապես Վիմփըրի միջոցով։ Անասունները Փիլքինգտոնին, որպես մարդու, չէին վստահում, սակայն նախընտրում էին նրան Ֆրեդրիքից, որից վախենում և որին ասում էին։ Ամառվա վերջերին, երբ հողմաղացի շինարարությունն արդեն ավարտին էր մոտենում, էլ ավելի սաստկացան ֆերմային սպառնացող նենգ հարձակման մասին լուրերը։ Ասում էին, որ Ֆրեդրիքը գալու է

հրացաններով զինված քսան մարդկանցով, և որ նա արդեն կաշառել է իշխանություններին ու ոստիկանությանը, որպեսզի անպատճիծ բռնագրավի Անասնաֆերմայի փաստաթղթերը: Դեռ ավելին, Փինչֆիլդից սարսուազդու պատմություններ էին հասնում այն կեղեքումների մասին, որոնց Ֆրեդրիքը ենթարկում էր իր անասուններին: Նա մտրակել-սպանել էր մի ծեր ձիու, սովամահ էր անում կովերին, շներից մեկին նետել էր հնոցը, իսկ երեկոյան զվարճանում էր խթաններին ածելի կապած աքլորներ կովեցնելով: Անասունների արյունը կատաղությունից եռում էր իրենց եղբայրների մասին նման պատմություններ լսելիս, և ժամանակ առ ժամանակ նրանք բողոքածայն պահանջում էին իրենց թույլ տալ հարձակվել Փինչֆիլդի վրա, վոնդել մարդկանց ու ազատազրել իրենց եղբայրներին: Սակայն Զոանը նրանց ամեն անգամ հորդորում էր հապճեպ քայլերի չդիմել և վստահել ընկեր Նապոլեոնի ռազմավարությանը:

Չնայած դրան, հակաֆրեդրիքյան տրամադրությունները շարունակում էին բորբոքվել: Մի կիրակի Նապոլեոնն առավոտյան անձամբ եկավ ամբար և բացատրեց, որ երբեք մտադրություն չի ունեցել փայտանյութը Ֆրեդրիքին վաճառելու, ասելով, որ իր արժանապատվությունից ցածր է համարում նման

սրիկաների հետ գործ բռնելը: Ամենուր Ապստամբություն քարոզող աղավնիներին արգելվեց ոտք դնել Ֆոքսվուդ, իսկ նրանց «Մահ մարդկությանը» կոչը փոխարինվեց մեկ ուրիշով՝ «Մահ Ֆրեդրիքին»: Ուշ ամունը բացահայտվեց Զնագնդու բանսարկություններից ևս մեկը: Ցորենի արտը մոլախոտերով լի էր՝ պարզվեց, որ իր գիշերային այցերից մեկի ընթացքում Զնագնդին մոլախոտի սերմեր է խառնել սերմացու ցորենին: Դավադրությանը մասնակից մի սագ խոստովանել էր Զուանին և ինքնասպան եղել՝ թունավոր հատապտուդ կուլ տալով: Անասունները նաև իմացան, որ Զնագնդին երբեք, ինչպես իրենք էին մինչ այդ կարծել, առաջին կարգի «Հերոս Անասուն» չի ստացել: Դա մի առասպել էր, որը Գոմի ճակատամարտից հետո տարածել էր ինքը՝ Զնագնդին: Նա ոչ միայն չէր պարզեցնատրվել, այլև հանդիմանություն էր ստացել ճակատամարտում թուլամորթություն դրսնորելու համար: Անասուններից ոմանք այս անգամ էլ քիչ էր մնում զարմանային, բայց Զուանը նրանց շոտափույթ համոզեց, որ իրենց հիշողությունը կաղում է:

Աշնանը, սուկալի ջանքերի գնով, քանի որ պետք էր ապահովել նաև բերքահավաքը, ավարտվեց հողմաղացի շինարարությունը: Մնում էր տեղադրել

մեքենաները, որոնց համար Վիմփըրն արդեն բանակցություններ էր վարում: Ամեն դժվարության հակառակ, չնայած փորձառության պակասին, պրիմիտիվ գործիքներին՝ բախտի քմահաճույքներին և ի հեճուկս Ձնագնդու դավաճանությանը, աշխատանքներն ավարտվեցին ճիշտ նշանակված օրը: Ուժասպառ, բայց հպարտ, անասուններն անդադար պտտվում էին իրենց գլուխգործոցի շուրջը, որն այժմ նրանց ավելի գեղեցիկ էր թվում, քան երբ կառուցվել էր առաջին անգամ: Բացի այդ, պատերն այժմ նախկինից կրկնակի հաստ էին՝ այս անգամ նրանց էլ ոչինչ չէր փլի: Իսկ երբ անասունները մտածում էին, թե ինչ ծանր աշխատանք են իրենք թափել, ինչպիսի հիասթափություններ են հաղթահարել և ինչքան կփոխվի իրենց կյանքը, երբ հողմաղացի թները պտտվեն ու աշխատի դինամոն, նրանք, հոգնածությունը թոթափելով, սկսում էին թչկոտել կառուցի շուրջն ու ցնծագին ճիչեր արձակել: Նապոլեոնը, շների և աքլորի ուղեկցությամբ, եկավ հողմաղացը զննելու և անձամբ շնորհավորեց անասուններին իրենց նվաճման առթիվ, հայտարարելով, որ կառուցը կկոչվի Նապոլեոնի Հողմաղաց:

Երկու օր անց անասուններին կանչեցին ամբար հատուկ ժողովի: Նրանք զարմանքից շանթահար

եղան՝ լսելով Նապոլեոնի հայտարարությունը, թե փայտանյութը վաճառվել է Ֆրեդրիքին: Վաղը Ֆրեդրիքի ուղարկած սայլերով այն սկսելու էին տանել: Փիլքինգտոնի հետ իր թվացյալ բարեկամության ամբողջ ընթացքում Նապոլեոնն իրականում գաղտնի համաձայնության մեջ է եղել Ֆրեդրիքի հետ: Ֆոքսվուդի հետ բոլոր կապերը խզվեցին, Փիլքինգտոնին վիրավորական ուղերձներ հղվեցին: Աղավնիներին հանձնարարվեց չմտնել Փինչֆիլդ և «Մահ Ֆրեդրիքին» կոչը փոխարինել «Մահ Փիլքինգտոնին» կոչով: Բացի այդ, Նապոլեոնը բոլորին հավաստիացրեց, որ Անասնաֆերմայի վրա պատրաստվող հարձակման լուրերը միանգամայն սխալ են, իսկ անասունների հանդեպ Ֆրեդրիքի դաժանության մասին պատմությունները՝ խիստ չափազանցված: Այդ ամենն ըստ երևոյթին Զնագնդու և նրա գործակալների տարածած բամբասանքներն էին: Պարզվեց նաև, որ Զնագնդին, ի վերջո, Փինչֆիլդում չի թաքնվում և ընդհանրապես երբևէ այնտեղ չի եղել՝ նա ապրում է (և, ասում են՝ բավական շքեղ) Ֆոքսվուդում և իրականում վաղուց ի վեր հանդիսանում է Փիլքինգտոնի վարձկանը:

Խոզերը հիացած էին Նապոլեոնի խորամանկությամբ: Փիլքինգտոնի բարեկամ ձևանալով՝

Նապոլեոնը Ֆրեդրիքին ստիպել էր տասներկու ֆունտով բարձրացնել առաջարկած գինը: Սակայն Նապոլեոնի գերազանցությունը երևում էր նաև այն բանում, ասաց Զուանը, որ նա ոչ ոքի չի վստահում՝ անգամ Ֆրեդրիքին: Ֆրեդրիքը փորձել էր փայտանյութի դիմաց չեկ դուրս գրել, որը, ասում են, վճարելու խոստումով թղթի մի կտոր է: Բայց Նապոլեոնը հիմար չէ: Նա պահանջել է իսկական հինգանոցներ, որոնք պետք է վճարվեին ապրանքը տանելուց առաջ: Ֆրեդրիքն արդեն վճարել է, և այդ գումարը ճիշտ և ճիշտ բավական է հողմաղացի սարքավորումը ձեռք բերելու համար:

Փայտանյութը սկսեցին սայլերով շուտափույթ տանել: Երբ վերջին սայլը գնաց, մի նոր հատուկ ժողով հրավիրվեց Ֆրեդրիքի մուծած դրամը ցուցադրելու համար: Երկու շքանշանը կրծքին, երանյալ ժպիտով, Նապոլեոնը փովել էր հարթակի վրայի հարդին, դրամը գեղեցիկ դարսած իր կողքին, խոհանոցից բերված ճենապակյա պնակի վրա: Անասունները դանդաղ անցնում էին նրա կողքով՝ հերթով զննելով դրամը: Դմբուզն անգամ թղթադրամները հոտոտեց, և նրա շնչից առանձին թերթիկները շարժվեցին ու խշխացին:

Երեք օր անց սոսկալի իրարանցում սկսվեց: Սկրիժնած Վիմփը ներս սուրաց ֆերմա, հեծանիվը

գցեց բակում և նետվեց ուղիղ տուն: Հաջորդ պահին Նապոլեոնի հարկաբաժնից կատաղի մոլոց լսվեց: Լուրջ իրդեհի պես տարածվեց ֆերմայով մեկ՝ թղթադրամները կեղծ էին: Ֆրեդրիքը փայտը ձրի է տարել:

Նապոլեոնն անմիջապես անասուններին ժողովեց և ահարկու ձայնով Ֆրեդրիքին դատապարտեց մահապատճի: Բոնելու դեպքում վերջինիս հարկավոր էր կենդանի խաշել: Միևնույն ժամանակ նա զգուշացրեց, որ այդ դավաճանությունից հետո պետք է ակնկալել ամենավատը, և որ Ֆրեդրիքն ու իր մարդիկ ամեն վայրկյան կարող են իրագործել վաղուց սպասվող հարձակումը: Ֆերմայի մատուցներում դետեր նշանակվեցին: Բացի այդ, Ֆոքսվորդ հաշտվողական նամակով ուղարկվեցին չորս աղավնի:

Գրոհը սկսվեց հաջորդ առավոտյան: Նախաճաշին վագելով եկան պահակայիններն ու հաղորդեցին, որ Ֆրեդրիքն իր հետևորդներով արդեն ներս է անցել հնգահեծան դարպասից: Անասուններն արիաբար նետվեցին նրանց ընդառաջ, բայց այս անգամ Գոմի ճակատամարտի պես հեշտ հաղթանակ չտարան: Տասնինգ մարդիկ իրար մեջ վեց-յոթ հրացան ունեին և խկույն կրակ բացեցին: Անասունները չդիմացան սոսկալի պայթյուններին ու կոտորակին և, չնայած Նապոլեոնի ու Դմբուզի կոչերին,

քիչ անց նահանջեցին: Ոմանք արդեն վիրավորված էին: Բոլորը թաքնվեցին շինություններում և սկսեցին ծակուծուկերից զգուշորեն դուրս նայել: Ամբողջ արտավայրը, հողմաղացի հետ միասին, թշնամու ձեռքում էր: Մի պահ անգամ Նապոլեոնն էր թվում մոլորված: Նա լուս հետ ու առաջ էր անում՝ ջղային ցնցելով պոչը: Ֆոքսվուդի կողմը թախծոտ հայացքներ էին ուղղվում: Փիլքինգոտոնի ու իր մարդկանց օգնությամբ դեռ կարելի կլիներ ինչ-որ բան անել:

Բայց այդ պահին նախորդ օրն ուղարկված աղավնիները վերադարձան՝ Փիլքինգոտոնից մի թուղթ բերելով: Թղթի վրա մատիտով գրված էր. «Տեղն է ձեզ»:

Ֆրեդրիքն իր մարդկանցով կանգ էր առել հողմաղացի մոտ: Ահաքեկված մրմունցով, անասունները նրանցից երկուսի ձեռքին լինգ ու մի ծանր մուլճ տեսան: Նրանք պատրաստվում էին հողմաղացը փլել:

— Անհնարին է,— բացականչեց Նապոլեոնը:— Մեր կառուցած պատերը դրա համար չափից ավելի հաստ են: Նրանք այդ պատերը մի շաբաթում էլ չեն փլի: Արիացեք, ընկերներ:

Սակայն Բենիամինն ուշադիր հետևում էր մարդկանց գործողություններին: Մուրճով ու լինգով երկուսը անցք էին փորում հողմաղացի հիմքում: Դանդաղ, համարյա զարմանքով, Բենիամինը դնչով արեց:

– Ես այդպես էլ կարծում էի, – ասաց նա: –Տեսնում եք, թե նրանք ինչ են անում: Հիմա այդ անցքի մեջ պայթուցիկ փոշի կլցնեն:

Անասուններն ահաբեկված սպասում էին: Ոչ ոք այլս չէր հանդգնի ապաստանից դուրս գալ: Քիչ անց մարդիկ վագրով ցրվեցին չորս կողմը: Ապա լսվեց խլացուցիչ մի դղրդյուն: Աղավնինները նետվեցին վեր, բոլոր անասունները, բացի Նապոլեոնից, փովեցին գետնին ու թաքցրեցին գլուխները: Երբ նրանք ոտքի ելան, հողմաղացի տեղում կախված էր սև ծխի հսկա մի ամպ: Զեփյուռը դանդաղ ցրեց այդ ամպը՝ հողմաղաց չկար:

Այդ տեսարանից անասունների արիությունը վերադարձավ: Քիչ առաջ ապրած նրանց վախն ու վիհատությունը խորտակվեցին այն ցաման մեջ, որը ծնեց այդ պիղծ ու անարգ գործողությունը: Վրեժի հուժկու աղաղակով, առանց հրամանի սպասելու, նրանք միահամուռ դուրս նետվեցին ուղիղ թշնամու վրա: Այս անգամ նրանք էլ չէին երկյուղում կարկուտի պես թափվող անգութ կոտորակից: Ճակատամարտը կատաղի էր ու դաժան: Մարդիկ անընդհատ կրակում էին, իսկ երբ անասունները մոտեցան, սկսեցին փայտերով ու ծանր կոշիկներով հարվածել: Սպանվեցին մի կով, երեք ոչխար և երկու սագ, համարյա բոլորը

Վիրավոր էին: Նոյնիսկ Նապոլեոնի մոտ, որը մարտական գործողությունները դեկավարում էր թիկունքից, գնդակը թոցրել էր պոչի ծայրը: Բայց մարդիկ նոյնպես էժան չէին պրօել: Դմբուզն իր սմբակներով կոտրել էր երեքի գլուխը, մեկին պողահարել էր կովը, իսկ մի ուրիշի շալվարը գգգգել էին Զանգակն ու Ձեսին: Իսկ երբ Նապոլեոնի թիկնապահ ինը շները, որոնց նա հանձնարարել էր թփերի հետևով շրջանցում կատարել, կատաղի հաշոցով կողքից հարձակվեցին մարդկանց վրա, վերջիններս խոճապի մատնվեցին: Նրանք հասկացան, որ իրենց շրջապատման վտանգ է սպառնում: Ֆրեդրիքն իր մարդկանց գոռաց, որ պետք է փախչել, քանի դեռ ուշ չէ: Հաջորդ պահին մորթապաշտ թշնամին արդեն վազում էր, որ կյանքը փրկի: Անասոնները մարդկանց հետապնդեցին մինչև դաշտի ծայրը, ցանկապատից դուրս սպրոելուց առաջ մի քանի վերջին քացի վերցնելով նրանց:

Անասոնները հաղթեցին, սակայն ուժասպան էին ու արյունվա: Նրանք դանդաղ քարշ եկան ֆերմայի կողմը: Խոտին փոված զոհված ընկերների տեսարանը շատերի աչքերին արցունք բերեց: Վշտահար լուրջամբ նրանք մի պահ կանգ առան նաև հողմադացի տեղում: Այո, հողմադացը չկար՝ նրանց աշխատանքից չնչին հետք անգամ չէր մնացել: Մասամբ

ոչչացվել էր նաև հիմքը: Չկային նույնիսկ նախորդ անգամվա պես վերականգնման համար պիտանի քարեր: Պայթյունի ուժը դրանք ցրել էր հարյուրավոր մետրերով: Թշվում էր, թե հողմաղացը երբեք չի եղել:

Ֆերմայի մոտ Զոռանը, որն անբացատրելի պատճառներով կովի ժամանակ չկար, ցատկուտելով մոտեցավ նրանց՝ գոհունակությամբ ժպտալով ու պոչը շարժելով: Շինությունների հետևից անասունները հրացանի հանդիսավոր կրակոց լսեցին:

– Ի՞նչո՞ւ է կրակում հրացանը: – հարցրեց Դմբուզը:  
– Մեր հաղթանակը նշելու համար, – բացականչեց Զոռանը:

– Ի՞նչ հաղթանակ, – ասաց Դմբուզը: Նրա ծնկներից արյուն էր կաթում, նա կորցրել էր մի պայտն ու ճեղքել սմբակը, հետևի ոտքի մեջ կոտորակ էր մխրճված:

– Ի՞նչպե՞ս թե ինչ հաղթանակ, ընկեր: Չէ՞ որ մենք վոնդեցինք թշնամուն Անասնաֆերմայի սրբազն հողից:

– Բայց նրանք ոչչացրին հողմաղացը: Մեր երկու տարվա աշխատանքը:

– Հետո՞ ինչ: Մենք կկառուցենք նորը: Մենք վեց հողմաղաց կկառուցենք, եթե ցանկանանք: Դուք չեք գնահատում, ընկերներ, մեր մեծ հաղթանակի

կարևորությունը: Թշնամին զավթել էր այս նոյն հոդը, որին մենք իհմա կանգնած ենք: Իսկ այժմ, շնորհիվ ընկեր Նապոլեոնի առաջնորդության, մենք հետ ենք գրավել մեր հողի վերջին թիզը:

- Այսինքն՝ հետ ստացանք այն, ինչ ունեինք, - ասաց Դմբուզը:

- Հենց դրանում է մեր հաղթանակը, - ասաց Զուանը:

Նրանք քարշ եկան բակ: Դմբուզի ոտքի կոտորակը ցավ էր պատճառում: Նա պատկերացրեց հողմաղացը իհմքից վերականգնելու ծանր աշխատանքը և մտովի արդեն հավաքագրեց իր ուժերը: Բայց և առաջին անգամ հիշեց, որ արդեն տասնմեկ տարեկան է, և իր հուժկու մկաններն այլևս այն չեն, ինչ առաջներում:

Սակայն, երբ անասունները տեսան ծածանվող կանաչ դրոշը և լսեցին հրացանի թնդյունը՝ ամբողջ յոթ կրակոց, իսկ ապա ունկնդրեցին Նապոլեոնի ճառը, որում նշվում էր իրենց արիությունը, նրանց ի վերջո իսկապես թվաց, որ իրենք մեծ հաղթանակ են տարել: Ճակատամարտում զոհված անասուններին պատվով թաղեցին: Դմբուզն ու Երեքնուկը քաշում էին դիակառք ծառայող սայլը, մինչ Նապոլեոնն ինքը գլխավորում էր թափորը: Ամբողջ երկու օր նվիրվեց հանդիսություններին: Երգերից, ճառերից և

իրացանի նոր կրակոցներից հետո ամեն անասուն ստացավ մեկական խնձոր, թոշուններին հատկացվեց երկուական բուռ հատիկ, իսկ շներին՝ երեքական բլիթ: Հայտարարվեց, որ ճակատամարտը կկոչվի Հողմաղացի ճակատամարտ, և որ Նապոլեոնը սահմանում է մի նոր պարզ։ «Կանաչ Դրոշի» շքանշան, որը շնորհվում է իրեն: Համատարած ցնծության մեջ թղթադրամների չարաքաստիկ հարցը մոռացվեց:

Դրանից մի քանի օր անց խոզերը մառանում մի արկդ վիսկի գտան, որը տունը բնակեցնելիս աչքաթող էին արել: Այդ գիշեր տան պատուհաններից բարձր երգեցողություն լսվեց, որում, ի զարմանս բոլորի, առկա էին նաև «Անգլիայի գազանների» ելաչները: Ինն անց կեսի կողմերը պարզ երևաց, թե ինչպես Նապոլեոնը, Զոնգի հին թասակը գլխին, հետնամուտքից դուրս եկավ, վարգով վազ տվեց բակով մեկ և նորից մտավ տուն: Սակայն առավտյան տանը կատարյալ լուսավորություն էր տիրում: Խոզերից ծպտուն չէր գալիս: Ժամը իննին մոտ, դանդաղ ու տրտում քայլելով, հայտնվեց Զոնը: Նրա աչքերը խամրած էին, պոչը՝ կախված, և ընդհանրապես, նա լուրջ իիվանդի տեսք ուներ: Նա անասուններին ժողովեց և ասաց, որ սուկալի բոլթ ունի հայտնելու ընկեր Նապոլեոնը մեռնում է:

Անասելի ողբ ու կոծ սկսվեց: Տան մուտքի առջև ծղոտ փոեցին, անասունները սկսեցին քայլել կճակների ծայրերին: Բոլորը լացակումած իրար հարց էին տալիս, թե ինչ պիտի անեն, եթե զրկվեն իրենց Առաջնորդից: Լուր տարածվեց, թե Զնագնդուն վերջիվերջո հաջողվել է թունավորել Նապոլեոնի սնունդը: Ժամը տասնմեկին Զոանը դուրս եկավ նոր հայտարարություն անելու: Իր վերջին կամքով Նապոլեոնը հրովարտակ է արձակում՝ ոգելից խմիչքների գործածությունը պատժվում է մահով:

Բայց և այնպես, երեկոյան կողմ Նապոլեոնի վիճակը կարծես թե լավացավ, իսկ հաջորդ առավոտյան Զոանը հաղորդեց, որ նա շուտով միանգամայն կապաքինվի: Նույն օրվա երեկոյան Նապոլեոնն անցավ աշխատանքի, իսկ հաջորդ օրը հայտնի դարձավ, որ նա Վիմփորին պատվիրել է Վիլինգդոնից ձեռնարկներ բերել խմորման ու թորման մասին: Մի շաբաթ անց Նապոլեոնը հրամայեց հերկել պարտեզի հետևի փոքրիկ հողամասը, որը ժամանակին նախատեսվել էր որպես տարիքն առած անասունների հանգատավայր: Հայտարարվեց, որ այդ արոտը հյուծված է և նոր ցանքի կարիք է զգում, պակայն շուտով ակնհայտ դարձավ, որ Նապոլեոնը մոտադիր է այնտեղ գարի ցանել:

Համարյա նույն ժամանակ տեղի ունեցավ արտասովոր մի դեպք, որը ոչ ոք ի վիճակի չեղավ հասկանալ: Մի գիշեր ժամը տասներկուակ կողմերը անասուններին արթնացրեց բակից լսված բարձր աղմուկը: Լուսնի լույսի ներքո, ամբարի այն պատի տակ, որին գրված էին Յոթ Պատվիրանները, գետնին էր ընկած կոտրված մի սանդուղք: Ժամանակավորապես շշմած Զուանը փուլած էր դրա կողքին, իսկ շուրջն ընկած էին մի լապտեր, վրձին ու սպիտակ ներկի շուր տրված մի դույլ: Ծներն իսկովն ևեթ օղակ կազմեցին Զուանի շուրջն ու վերջինիս ուղեկցեցին տուն, իենց որ նա կարողացավ շարժվել: Անասուններից ոչ մեկը չըմբռնեց, թե դա ինչ էր նշանակում, բացի Բենիամինից, որը հասկացող տեսքով շարժեց դունչը, բայց ոչինչ չասաց:

Մի քանի օր անց Մյուրիելը, սեփական նախաձեռնությամբ վերընթերցելով Յոթ Պատվիրանները, նկատեց, որ անասունները ևս մի Պատվիրան սխալ են հիշել: Նրանք կարծել էին, թե Հինգերորդ պատվիրանը եղել է. «Անասունը երբեք ոգելից խմիչք չի գործածի», սակայն երկու բառ մոռացել էին: Իրականում Հինգերորդ պատվիրանն ասում էր. «Անասունը երբեք ոգելից խմիչք չի գործածի չափից առավել»:

## ԳԼՈՒԽ 9

Դմբուզի ճեղքված սմբակը երկար ժամանակ չէր ապաքինվում: Հաղթանակի հանդիսությունների հաջորդ օրն ևել անասունները սկսեցին վերականգնել հողմաղացը: Դմբուզը հրաժարվեց գել մեկ օրվա հանգիստ վերցնել և իր համար պատվի խնդիր դարձրեց ցավը թաքցնել: Սակայն երեկոները նա Երեքնուկին խոստվանում էր, որ սմբակն իրեն շատ է նեղում: Երեքնուկը սմբակին իր ծամած դեղաբույսերով թրջոցներ էր դնում և, Բենիամինի հետ միասին, համոզում էր նրան պակաս եռանդուն աշխատել: «Զիու թոքերը հավերժ չեն», – ասում էր նա: Բայց Դմբուզը չէր լսում: Նա պատասխանում էր, որ իր կյանքում միայն մեկ խկական նպատակ է մնացել՝ տեսնել հողմաղացի կառուցումը թոշակի անցնելուց առաջ:

Սկզբում, երբ Անասնաֆերմայի օրենքներն առաջին անգամ էին ձևակերպվում, ձիերի և խոզերի

թոշակի տարիքը որոշվել էր տասներկու, կովերինը՝ տասնչորս, շներինը՝ ինը, ոչխարներինը՝ յոթ, իսկ հավերինն ու սագերինը՝ իինգ տարեկան։ Թոշակները նոյնպես մեծահոգաբար էին հաստատվել։ Ոչ մի կենդանի դեռևս թոշակի չէր անցել, բայց վերջերս այդ նյութը սկսել էին գնալով ավելի հաճախ շոշափել։ Այժմ, երբ այգու հետևի հողամասը գարի էր ցանված, լորեր էին շրջում, որ որպես զառամյալ անասունների հանգստավայր առանձնացվելու է մեծ արոտի մի անկյունը։ Ասում էին, որ ձիերի թոշակը լինելու է օրական իինգ ֆունտ հացահատիկ, իսկ ծմունք՝ տասնիինգ ֆունտ հարդ, ինչպես նաև մեկական գազար կամ անգամ խնձոր տոն օրերին։ Դմբուզի տասներկու տարին լրանալու էր հաջորդ ամռան կեսին։

Իսկ մինչ այդ կյանքը շատ դժվարին էր։ Զմեռը նոյնքան ցրտաշունչ էր, ինչքան նախորդը, իսկ անասնակերն անգամ ավելի պակաս էր։ Վերատին կրծատվեցին բոլորի օրաբաժինները՝ չհաշված շներինն ու խոզերինը։ Օրաբաժինների չափից ավելի խիստ հավասարեցումը, ինչպես բացատրեց Զոանը, հակասում է Անասնիզմի սկզբունքներին։ Ամեն դեպքում նրա համար բոլորովին դժվար չէր մնացած անասուններին համոզել, որ իրականում, ինչ էլ որ թվա, նրանք կերի պակաս չեն զգում։ Առայժմ,

իհարկե, անհրաժեշտ էր օրաբաժինները ժամանակավորապես շտկել (Զուանը միշտ ասում էր «շտկել» և ոչ թե՝ «կրճատել»), սակայն Զոնզի ժամանակների համեմատ առաջընթացն անվիճելի էր: Զիլ ձայնով շուտասելուկի պես կարդալով թվերը՝ Զուանը հանգամանորեն ապացուցում էր, որ նրանք ավելի շատ վարսակ, խոտ ու շաղգամ ունեն, քան Զոնզի ժամանակ, որ նրանք այժմ ավելի քիչ են աշխատում, որ նրանց խմած ջուրն ավելի բարձրորակ է, կյանքի տևողությունն ավելի երկար, որ մատղաշների մահացությունը պակասել է, իսկ գումերի ծղոտն՝ ավելացել, և, վերջապես, որ դժիլներն այժմ ավելի քիչ են անհանգստացնում: Անասունները հավատում էին նրա ամեն մի բառին: Եթե ճիշտն ասենք, նրանց հիշողությունից արդեն ջնջվել էին Զոնզն ու իր մարմնավորած ամեն ինչը: Նրանք գիտեին, որ ներկայիս կյանքը դաժան է ու անպաճույժ, որ իրենք հաճախ մրսում ու մեծ մասամբ քաղցած են, և որ արթուն ժամանակ սովորաբար միշտ աշխատում են: Սակայն կասկած չկար, որ նախկինում ամեն ինչ ավելի վատ է եղել: Նրանք ուրախ էին հավատալ այդ մտքին: Բացի այդ, նախկինում նրանք ստրուկ էին, իսկ այժմ՝ ազատ, և դա էր հիմնական առավելությունը: Զուանը չէր մոռանում ամեն անգամ շեշտել այդ փաստը:

Կերակրելու բերաններն ավելացել էին: Աշնանը չորս մերուն ցնկնել էին համարյա միաժամանակ բոլորը միասին բերելով երեսունմեկ գոճի: Գոճիները խայտաբղետ էին, բայց քանի որ Նապոլեոնը ֆերմայի միակ կինման էր, հայրությունը հնարավոր էր գուշակել: Այդ տարվա մեջ, ավելի ուշ, աղյուս ու տախտակներ գնելուց հետո, հայտարարվեց, որ տան հետևի այգում դասասենյակ է կառուցվելու: Իսկ մինչ այդ խոճկորների դաստիարակությամբ տան խոհանոցում կզբաղվեր անձամբ Նապոլեոնը: Խոճկորները վազվզում էին պարտեզում և խուսափում էին մյուս անասունների մատղաշների հետ խաղալուց: Համարյա նույն ժամանակ օրենք դարձավ, որ կածանի վրա խոզի հանդիպելով՝ մնացած անասունները պարտավոր էին ճանապարհը զիջել: Բացի այդ, խոզերին արտոնված էր կիրակի օրերին պոչին կանաչ ժապավեն կապել:

Տարին բավական հաջող անցավ, սակայն ֆերման շարունակում էր դրամի կարիք զգալ: Դասասենյակի համար պետք էր աղյուս, ավագ ու կիր ձեռք բերել, անհրաժեշտ էր նաև կրկին միջոցներ կուտակել հողմաղացի սարքավորումների համար: Բացի այդ, տան համար լամպի յուղ և մոմեր էին պետք, իսկ Նապոլեոնի սեղանի համար՝ շաքար (նա մնացած խոզերին դա արգելել էր, պատճառաբանելով, որ

շաբարը գիրացնում է), չիաշված սովորական պետքերը, ինչպես, օրինակ՝ գործիքներ, մեխեր, պարաններ, ածուխ, երկաթ և շների բլիթներ: Խոտի մի դեղ և կատոֆիլի բերքի մի մասը վաճառվեցին, իսկ ձվեր մատակարարելու պարտավորությունը բարձրացվեց շաբաթական վեց հարյուրի, այնպես որ՝ այդ տարի հավերը հազիվ կարողացան պահպանել իրենց քանակը: Դեկտեմբերին կրճատված օրաբաժինները փետրվարին կրճատվեցին նորից, և յուղը խնայելու համար գոմերում արգելվեց լուս վառել: Սակայն խոզերն իրենց կարծես թե վատ չէին զգում և փասորեն անգամ գիրանում էին: Փետրվարի վերջին օրերից մեկի կեսին մի ջերմ, ախտրժելի ու գրգռիչ բույր, որպիսին անասունները մինչ այդ երբեք չէին զգացել, տարածվեց բակով մեկ խոհանոցի հետևի այն փոքրիկ գարեջրանոցից, որը Զոնզի օրոք չէր գործածվել: Ինչ-որ մեկն ասաց, որ այդպիսի հոտ գալիս է գարի եփելուց: Քաղցած անասուններն անհամբեր հոտուում էին օդը, կարծելով, թե ընթրիքին տաք լափ են ուտելու: Սակայն ոչ մի լափ չեղավ, իսկ հաջորդ կիրակի հայտարարվեց, որ այդուհետև գարու ամբողջ բերքը վերապահվելու է խոզերի համար: Այգու հետևի արտն արդեն ամբողջովին գարի էր ցանված: Շուտով նաև հայտնի դարձավ, որ ամեն խոզ օրական

ստանում է մեկ փինթ գարեջուր: Նապոլեոնին հասնում էր կես գալոն, որը նրան մատուցվում էր Արքայական Դեղրի սպասքի ապուրամանով:

Բայց և այսպես, բոլոր զրկանքները մասամբ հատուցվում էին նրանով, որ այդ օրերի կյանքում ավելի շատ արժանապատվություն կար: Երգերը, ճառերն ու երթերը նախկինից ավելի շատ էին: Նապոլեոնի հրամանով ամեն շաբաթ անց էին կացվում այսպես կոչված Ինքնարուխ Ցուցեր, որոնց նպատակն էր փառաբանել Անասնաֆերմայի պայքարն ու նվաճումները: Նշված ժամին բոլոր անասունները թողնում էին աշխատանքն ու շարքերով համարայլ դոփում ֆերմայի շուրջը: Առջևից ընթանում էին խոզերը, ապա՝ ձիերը, կովերը, ոչխարներն ու թոշունները: Շները քայլում էին կողքերից, իսկ ամենքի առջևում գնում էր Նապոլեոնի սև աքլորը: Դմբուզն ու Երեքնուկը միշտ երկու կողմից պահում էին կանաչ դրոշը, որի վրա, սմբակից ու պողից բացի, կար նաև նշանաբան՝ «Կեցցե ընկեր Նապոլեոնը»: Երթից հետո արտասանվում էին Նապոլեոնին նվիրված բանաստեղծություններ, որին հետևում էր Զոանի ճառը անասնակերի արտադրության ընթացիկ հաջողությունների մասին: Վերջում ամեն անգամ պարպում էին հրացանը: Ինքնարուխ Ցուցերի ամենանվիրյալ մասնակիցները ոչխարներն էին, և

եթե որևէ մեկը տրտնջար (ինչպես ոմանք անում էին խոզերի ու շների բացակայությամբ), թե իզուր ժամանակ է վատնվում ցրտին կանգնելով, ոչխարներն իսկովն նրան լրեցնում էին իրենց զարհուրելի մկլոցով՝ «Չորս ոտք լավ, երկու ոտք՝ վատ»: Սակայն, ընդհանուր առմամբ, անասուններն այդ ցոյցերը վայելում էին: Նրանք շոյվում էին՝ վերհիշելով, որ, վերջիվերջ, իրենք էին իրենց իսկական տերերը, և որ իրենց աշխատանքն ուղղված է սեփական բարօրությանը: Եվ այդպես՝ երգերի, երթերի, Զոանի թվերի, հրացանի կրակոցների, աքլորականչի և ծածանվող դրոշի օգնությամբ, նրանք մոռանում էին, որ իրենց ստամոքսը դատարկ է, համենայն դեպս՝ ժամանակի մեծ մասը:

Ապրիլին Անասնաֆերման հոչակվեց Հանրապետություն և Պրեզիդենտ ընտրելու անհրաժեշտություն առաջացավ: Կար միայն մի թեկնածու՝ Նապոլեոնը, որն ընտրվեց միաձայն: Նույն օրը հայտարարվեց, որ Երևան են եկել նոր փաստաթղթեր, որոնք թարմ մանրամասներ են բացահայտում Զնագնդու և Զոնզի դավադրությունից: Պարզվում էր, որ Զնագնդին ոչ թե, ինչպես անասուններն էին կարծել, պարզապես փորձել է ուազմական հնարքների միջոցով տանով տալ Գոմի ճակատամարտը, այլ բացեիբաց կովել է Զոնզի կողմից: Փաստորեն, իենց նա է եղել մարդկանց

հրամանատարը՝ մարտի նետվելով «Կեցցե մարդկությունը» կոչը շուրջերին: Զնագնդու մեջքի վերքերը, որոնց տեսքն անասուններից ումանք դեռ հիշում էին, իրականում Նապոլեոնի ատամներից էին:

Ամուսն կեսին, տարիների բացակայությունից հետո, ֆերմայում հանկարծ նորից հայտնվեց Մովսես ազուավը: Նա բոլորովին չէր փոխվել, նորից ոչ մի աշխատանք չէր անում և առաջվա պես շարունակում էր նոյն ոգով պատմություններ անել Շաքարաքլոր Լեռան մասին: Նա թառում էր մի որևէ կոճղի, թևերը թափահարում և, եթե լսող կար, ժամերով խոսում: «Վերսում, ընկերներ, – հանդիսավոր ասում էր նա՝ մեծ կտուցը վեր տնկելով, – իենց ձեր տեսած այն մոլթ ամպի հետևում գտնվում է երջանիկ մի երկիր՝ Շաքարաքլոր Լեռը, որտեղ մենք՝ թշվառ կենդանիներս, հավիտյան կազատվենք մեր չաշչարանքներից»: Նա նոյնիսկ պնդում էր, որ իր բարձր թոհջքներից մենքի ժամանակ եղել է այնտեղ և տեսել է երեքնուկի մշտադալար արոտներն ու թփերի վրա աճող շաքարն ու կարկանդակները: Անասուններից շատերը հավատում էին նրան, մտածելով, որ եթե իրենց կյանքն այժմ սովոր է ու տքնածան, ապա արդար չ' արդյոք, որ մի տեղ պիտի լինի նաև ավելի լավ մի աշխարհ: Խոզերի վերաբերմունքը Մովսեսի հանդեա դժվար

Էր հասկանալ: Նրանք արհամարհանքով ժխտում էին Շաքարաքլոր Լեռան գոյությունը, միևնույն ժամանակ թողնելով, որ Մովսեսը մնա ֆերմայում, չաշխատի և նույնիսկ գարեջրի օրաբաժին ստանա:

Սմբակը բուժելով՝ Դմբուզը սկսեց նախկինից ավելի եռանդուն աշխատել: Այդ տարի բոլոր անաստոններն էին աշխատում ստրուկի պես: Ֆերմայի առօրյա գործերից և հողմաղացի վերականգնումից բացի, ավելացել էր խոճկորների դպրոցի կառուցումը, որի պարապմունքները սկսվելու էին մարտին: Կիսաքաղց վիճակում երկար աշխատելը երբեմն անտանելի էր, բայց Դմբուզը երբեք չէր տրտնջում: Նրա արարքներն ու խոսքերը ոչ մի առիթ չէին տալիս կարծելու, թե նախկին ուժը լրել է նրան: Թեթևակի փոխվել էր միայն նրա արտաքինը՝ մաշկի փայլը խամրել էր, իսկ ազդրերը՝ սմբել: Մյուսներն ասում էին՝ «Գարնան խոտի հետ Դմբուզը կարգի կգա»: Սակայն գարունը եկավ, իսկ Դմբուզը չկազդուրվեց: Երբեմն, երբ նրա մկանները լարվում էին մի մեծ քարաքեկորի քաշից, թվում էր, թե միայն շարունակելու կամքն է նրան ոտքի վրա պահում: Այդ պահերին նրա շուրջերը կազմում էին «Ես ավելի եռանդուն կաշխատեմ» խոսքերը՝ արտասանելու համար ձայն չէր մնացել: Երեքնուկն ու Բենիամինը կրկին նրան գգուշացրեցին, որ հետևի իր

առողջությանը, բայց Դմբուզը դրան ուշադրություն չէր դարձնում: Մոտենում էր նրա տասներկուերրորդ տարեդարձը: Նրան հուզող միակ խնդիրը թոշակի անցնելուց առաջ բավականաչափ քար կուտակելն էր:

Ամառային ուշ մի երեկո հանկարծակի լուր տարածվեց, թե Դմբուզին ինչ-որ բան է պատահել: Նա մենակ գնացել էր հողմաղացի համար հերթական անգամ քար կրելու: Պարզվեց, որ լուրը ստույգ է: Մի քանի րոպեից երկու աղավնի բերեցին մանրամասնությունները: «Դմբուզը վայր է ընկել: Կողքի վրա պառկած՝ չի կարողանում վեր կենալ»:

Անասունների կեսից ավելին նետվեցին բլրակի կողմը: Սայի կողափայտերի միջև վիզը ձգած ընկած էր Դմբուզը՝ անկարող անգամ բարձրացնել գլուխը: Նրա աչքերը մշուշված էին, կողերը՝ քրտնաթաթախ: Բերանից արյան բարալիկ շիթ էր ծորում: Երեքնուկը ծունկի իջավ նրա կողքին:

– Դմբուզ, – կանչեց նա, – ո՞նց ես:

– Թոքերս են, – նվազ ձայնով ասաց Դմբուզը: Բան չկա: Հուսով եմ, կկարողանաք առանց ինձ ավարտել հողմաղացը: Արդեն բավականաչափ քար է կուտակվել: Ամեն դեպքում ինձ ընդամենը մի ամիս էր մնացել: Շիշտն ասած, ես սպասում էի թոշակի անցնելուս: Թերևս, քանի որ Բենիամինն էլ

ծերանալու վրա է, նրան թույլ տան թոշակի անցնել ինձ հետ միաժամանակ, որ միասին լինենք:

– Պետք է անհապաղ օգնություն կանչել – ասաց Երեքնուկը: – Շուտ, մեկնումեկդ վազեք ու իմաց տվեք Զուանին:

Մնացած բոլոր անաստոններն իսկովն հետ վազեցին Զուանին լուրջ հաղորդելու: Մնացին միայն Երեքնուկն ու Բենիամինը, որը լուր պառկեց Դմբուզի կողքին՝ իր երկար պոչով ճանճերին քշելով: Քառորդ ժամից հայտնվեց Զուանը՝ կարեկցանքով ու հոգատարությամբ լի: Նա ասաց, որ ընկեր Նապոլեոնը խորապես վշտացավ, իմանալով, որ ֆերմայի ամենից նվիրված աշխատավորներից մեկին նման դժբախտություն է պատահել, և արդեն կարգադրություններ է անում Դմբուզին Վիլինգդոնում հիվանդանոց տեղավորելու համար: Նա լսելով՝ անաստոնները փոքր-ինչ սրտնեղցին: Մոլիից ու Զնագնդուց բացի, ուրիշ ոչ մի անաստոն երբեք ֆերման չէր լքել, և նրանց դուր չեկավ հիվանդ ընկերոջը մարդկանց ձեռքը հանձնելու միտքը: Սակայն Զուանը հեշտությամբ նրանց համոզեց, որ Վիլինգդոնի անասնաբույժը Դմբուզին շատ ավելի լավ կինամի, քան ինսարավոր է ֆերմայի պայմաններում: Մոտ կես ժամ անց Դմբուզը փոքր-ինչ խելքի եկավ և, մեծ դժվարությամբ ուտքի կանգնելով, քարշ

եկավ իր գոմը, ուր Երեքնուկն ու Բենիամինը նրա համար ծղոտե փափուկ անկողին էին պատրաստել:

Հաջորդ երկու օրը Դմբուզը մնաց գոմում: Խոգերը նրա համար լողասենյակի դեղադարակում գտնված վարդագույն դեղով մի մեծ շիշ էին ուղարկել, և Երեքնուկը օրական երկու անգամ ճաշից հետո տալիս էր նրան այդ դեղը: Երեկոները Երեքնուկը պառկում էր Դմբուզի կողքին ու նրա հետ զրուցում, իսկ Բենիամինը քշում էր ճանճերին: Դմբուզը նրանց խոստովանեց, որ չի ափսոսում կատարվածի համար: Լավ ապաքինվելու դեպքում նա կապրի ևս մի Երեք տարի և հաճույքով կանխաճաշակում է այն խաղաղ օրերը, որ անց է կացնելու մեծ արոտից առանձնացված հողամասում: Նա առաջին անգամ հնարավորություն և ժամանակ կատանա զբաղվելու իր մտքի կատարելագործմամբ: Նա մտադիր է իր կյանքի մնացորդը նվիրել այբուբենի մնացած քսաներկու տառերը սովորելուն:

Ինչևէ, Բենիամինն ու Երեքնուկը կարող էին նրան ընկերակցել միայն աշխատանքային ժամերից հետո, իսկ երբ ֆուրգոնը եկավ նրան տանելու, դեռ կեսօր էր: Անաստոնները, խոզերից մեկի դեկավարությամբ, զբաղված էին շաղգամի արտը քաղիանելով, երբ հանկարծ ապշահար տեսան, թե ինչպես Բենիամինը,

բարձր գոռալով, վազում է իրենց կողմը: Նրանք առաջին անգամ էին Բենիամինին հուզված տեսնում, և ընդհանրապես, նրան դեռ ոչ ոք երբեմն վազելիս չէր տեսել: «Արագ, արագ....» - գոռում էր նա,- վազեք: Դմբուզին տանում են»: Առանց խոզի կարգադրությանը սպասելու, անասուններն, աշխատանքը թողած, նետվեցին շենքերի կողմը: Իսկապես, բակում կանգնած էր երկու ձի լճած մի մեծ փակ ֆուրգոն, որի կողքերին ինչ-որ բան էր գրված: Վարորդի տեղում խարդախ տեսքով թասակավոր մի մարդ էր նատած: Դմբուզի տեղը գոմում դատարկ էր: Անասունները խմբվեցին ֆուրգոնի շուրջը: «Ցտեսություն, Դմբուզ,- բացականչեցին բոլորը միասին,- ցտեսություն»:

- Հիմարնե՞ր: Հիմարնե՞ր,- գոռաց Բենիամինը՝ ցատկուտելով նրանց շուրջն ու փոքրիկ ամբակներով դոփելով գետինը:- Հիմարներ: Մի՛թե չեք տեսնում, թե ֆուրգոնին ինչ է գրված:

Անասունները լոեցին, և Մյուրիելը սկսեց տառտառ վերծանել գրությունը: Բայց Բենիամինը նրան մի կողմ իրեց և մեղյալ լուրջյան մեջ կարողաց:

- «Աֆրեղ Սիմոնդ - Ձի Քերթող և Սոսինձ Եփող, Վիլինգդոն: Կաշվի և աղացած ոսկորների առևտուր: Շան բների վաճառք»: Մի՛թե չեք հասկանում, թե դա ինչ է նշանակում: Դմբուզին տանում են մորթելու:

Անասունները սարսափահար ճիչ արձակեցին: Նույն պահին ֆուրգոնավարը ձիերին մտրակեց, և ֆուրգոնը բակից արագ դուրս եկավ: Անասունները, բարձր ճշալով, նետվեցին դրա հետևից: Երեքնուկն ամենքից առաջ ընկավ: Ֆուրգոնի ընթացքն արագացավ: Երեքնուկը փորձեց անցնել վարգի, բայց չկարողացավ: «Դմբուզ, գոռում էր նա, – Դմբուզ, Դմբուզ, Դմբուզ»: Հենց այդ ժամանակ, ասես լսելով դրսի աղաղակը, ֆուրգոնի հետևի փոքրիկ պատուհանում հայտնվեց Դմբուզի սպիտակ գծով մոռութը:

– Դմբուզ, – սոսկալի ձայնով գոռաց Երեքնուկը: – Դմբուզ, դուրս արի: Շուտ դուրս արի: Նրանք քեզ տանում են մորթելու:

Բոլոր անասունները միացան այդ կանչին՝ «Դուրս արի, Դմբուզ, դուրս արի»: Բաց ֆուրգոնն արդեն թափ էր առել և աստիճանաբար հեռանում էր: Պարզ չէր՝ արդյոք Դմբուզը հասկացել է Երեքնուկի գոռոցը: Սակայն հաջորդ պահին նրա մոռութը պատուհանից հեռացավ, և ֆուրգոնի ներսից սմբակների սոսկալի դոփյուն լսվեց: Դմբուզը փորձում էր դուրս արձնել: Ժամանակին նրա սմբակների մի երկու հարված կհերիքեր ֆուրգոնը ջախջախելու համար: Բայց, ավաղ, ուժը լրել էր նրան. շուտով դոփյունը թուլացավ և մարեց: Վհատված անասունները սկսեցին կոչ անել ֆուրգոնը քաշող ձիերին:

«Ընկերներ, ընկերներ,- գոռում էին նրանք,- ձեր եղբորը մի տարեք մորթելու»: Բայց տիսմար գրաստները, առանց կատարված հասկանալու, միայն խլշտացրին ականջներն ու ավելի արագ վազեցին: Դմբուզի մոռվան այլս պատուհանի մեջ չերևաց: Ինչ-որ մեկը գլխի ընկավ, որ հարկավոր է առաջ վազել ու փակել հնգահեծան դարպասը, բայց արդեն ուշ էր: Ֆուրգոնն անցավ դարպասի միջով դեպի ճանապարհը և շուտով անհայտացավ: Դմբուզին այլս ոչ ոք չտեսավ:

Երեք օր անց հայտարարվեց, որ Դմբուզը վախճանվել է Վիլինգդոնի հիվանդանոցում, չնայած ձիուն վայել լավագույն խնամքը ստանալուն: Տիսուր լուրը հայտնեց Զոանը, ասելով, որ անձամբ ներկա է եղել Դմբուզի վերջին ժամերին:

- Դա իմ երրևէ ապրած ամենահոգիչ տեսարանն էր,- ասաց Զոանը՝ տոտիկով արցունքը սրբելով:- Ես նրա մահճի մոտ էի մինչև վերջին պահը: Մեռնելուց առաջ, արդեն համարյա խոսելու անկարող, նա ականջիս շշնչաց, թե զղում է միայն նրա համար, որ վախճանվելու է նախքան հողմաղացի ավարտը: «Առաջ, ընկերներ, շշնչաց նա,- առաջ հանուն Ապստամբության: Կեցցե՛ Անասնաֆերման; Կեցցե՛ ընկեր Նապոլեոնը: Նապոլեոնը միշտ ճիշտ է»: Ահա նրա վերջին խոսքերը, ընկերներ:

Այստեղ Զոանի կեցվածքն անսպասելիորեն փոխվեց: Նա մի պահ լոեց՝ շարունակելուց առաջ կասկածանքով լի հայացքներ նետելով շուրջը:

Իր ականջներին հասել է, ասաց նա, որ Դմբուզի մեկնման պահին անասունների մեջ հիմար ու անհիմն բամբասանք է շրջել: Ոմանք նկատել են, որ նրան տանող ֆուրգոնի կողքին գրված է եղել «Զի քերթող», և հանգել են այն շոտափույթ եզրակացությանը, թե Դմբուզին տանում են մորթելու: Համարյա անհավատալի է, ասաց Զոանը, որ կարելի էր այդպիսի հիմար բան մտածել: Մի՛թե, վրդովված բացականչեց նա՝ դեսուդեն անելով և պոչը շարժելով, մի՛թե նրանք իրենց Պաշտելի Առաջնորդ ընկեր Նապոլեոնից նման բան էին սպասում: Այնինչ բացատրությունն ավելի քան պարզ է՝ անասնաբույժն այդ ֆուրգոնը վերջերս է գնել քերթողից և դեռ չի հասցրել ջնջել հին գրությունը: Հենց դա էլ հանդիսացել է թյուրիմացության պատճառը:

Դա լսելով՝ անասունների սրտից մի ծանր քարընկավ: Իսկ երբ Զոանը պատկերավոր նկարագրեց Դմբուզի ստացած իրաշալի խնամքը և այն թանկարժեք դեղերը, որոնց համար առանց մտածելու վճարել էր ընկեր Նապոլեոնը, նրանց վերջին կասկածներն անգամ չքացան, և Դմբուզի մահվան պատճառած

վիշտը մասամբ փարատվեց այն մտքից, որ իրենց ընկերն առևվազն երջանիկ է մեռել: Հաջորդ կիրակի առավոտ Նապոլեոնն անձամբ ներկայացավ ժողովի և մի կարճ ճառ արտասանեց Դմբուզի պատվին: Ցավոք, ասաց նա, իրենց հանգուցյալ ընկերոջ դիակը ֆերմա տեղափոխել հնարավոր չէ, սակայն ինքը հանձնարարել է պարտեզի դափնիներից մի մեծ պաակ հյուսել և ուղարկել նրա գերեզմանին: Բացի այդ, խոզերը նախատեսում են մի քանի օրից Դմբուզի հիշատակին նվիրված բանկետ կազմակերպել: Նապոլեոնն ավարտեց իր ճառը՝ հիշեցնելով Դմբուզի սիրելի «Ես ավելի եռանդուն կաշխատեմ» և «Ընկեր Նապոլեոնը միշտ ճիշտ է» ասույթները, որոնք, ասաց նա, լավ կանի որդեգրի ամեն մի անասուն:

Բանկետի նշանակված օրը Վիլինգդոնից ժամանեց նպարավաճառի ֆուրգոնը՝ տան առաջ մի մեծ արկդ բեռնաթափելով: Այդ գիշեր տնից բարձր երգեցողություն էր լսվում, ապա՝ կատաղի վեճի պես մի քան, որը ժամը տասնմեկի կողմերն ավարտվեց փշրվող ապակու սոսկալի աղմուկով: Հաջորդ օրը մինչև կեսօր տնից ոչ մի ծպտուն չեկավ, և լուր տարածվեց, թե խոզերն ինչ-որ տեղից փող են ճարել մի նոր արկդ վիսկի գնելու համար:

## ԳԼՈՒԽ 10

Անցան տարիներ: Փոխվում էին տարվա եղանակները, անցնում-գնում էին անասունների կարճատև կյանքերը: Եկավ մի ժամանակ, երբ էլ ոչ ոք չէր հիշում նախապատամբական օրերը, բացի Երեքնուկից, Բենիամինից, Մովսես ազուավից և մի քանի խոզերից: Մյուրիելը մեռել էր, չկային Զանգակը, Զեսին և Փինչըրը: Մեռել էր նաև Զոնզը՝ ուրիշ մի երկրամասի գինեմոլների հանգրվանում: Դմբուզին հիշում էին միայն նրան անձամբ ճանաչած քչերը: Երեքնուկը պառավ ու պարարտ մի ձի էր՝ փայտացած հողերով ու թրջվելու հակված աչքերով: Երկու տարի առաջ լրացել էր նրա թոշակի տարիքը, սակայն դեռ ոչ մի անասուն իրականում թոշակի չէր անցել: Արոտի մի մասը զառամյալանասունների համար առանձնացնելու մասին վաղուց արդեն ոչ ոք չէր խոսում: Նապոլեոնն այժմ մեկսկես ցենտներանոց հասուն մի

կինճ էր: Զուանն այնքան էր գիրացել, որ ծալքերի միջից հազիվ էր կարողանում տեսնել: Միայն Բենիամինը համարյա չէր փոխվել՝ թերևս մոռութն էր փոքր-ինչ մթնել և մեկ էլ խառնվածքը. Դմբուզի մահից հետո նախկինից խոժող ու լուակյաց էր դարձել:

Ֆերմայի գլխաքանակը մեծապես աճել էր, բայց ոչ այնքան, ինչքան նախատեսվել էր վաղ տարիներին: Ծնվել էին շատ անասուններ, որոնց համար Ապստամբությունը սոսկ ուրիշներից լած աղոտ մի հուշ էր: Բացի այդ, ձեռք էին բերվել նաև նորերը, որոնք նախքան ֆերմա գալն ընդհանրապես երբեք նման բան չէին լել: Երեքնուկից բացի, ֆերմայում այժմ երեք ուրիշ ձի կար: Նրանք հրաշալի անասուններ էին, եռանդուն աշխատողներ և լավ ընկերներ, բայց՝ բացառիկ բութ: Նրանցից ոչ մեկն այբուբենի Բ տառից այն կողմ չսովորեց: Նրանք ընդունում էին Ապստամբության և Անասնիզմի սկզբունքների մասին իրենց լած ամեն ինչը, մանավանդ, երբ պատմողը Երեքնուկն էր, որի հանդեպ նրանք համարյա որդիական հարգանք էին դրսւորել, սակայն կասկած չկար, որ նրանք այդ ամենից ոչինչ չէին հասկանում:

Ֆերման այժմ ավելի բարգավաճ էր և ավելի լավ կազմակերպված: Նրան անգամ կցվել էր երկու նոր դաշտ, որոնք ձեռք էին բերվել միստր Փիլքինզտոնից:

Վերջապես բարեհաջող ավարտվել էր հողմաղացի շինարարությունը, և ֆերման այժմ կալսիչ ու հարդի սեփական էլեատոր ուներ, չհաշված բազում այլ նոր շինությունները։ Վիմփըն իր համար երկանիվ կառք էր գնել։ Այդուհանդերձ, հողմաղացն այդպես էլ չգործածվեց էլեկտրականություն ստանալու համար՝ նրանում ալյուր էին աղում, որը շոշափելի եկամուտ էր տալիս։ Անասունները տքնածան աշխատում էին երկրորդ հողմաղացի շինարարության վրա. ասում էին, թե դինամոնները տեղադրվելու են այնտեղ։ Այն ամենն, ինչ անասուններին սովորեցրել էր երազել Զնագնդին՝ էլեկտրական լուսավորությամբ տաք ու սառը ջրով գոմեր և եռօրյա աշխատանքային շաբաթ, այլև չէր հիշատակվում։ Նապոլեոնը դատապարտել էր այդ գաղափարները որպես Անասնիզմի ոգուն հակասող։ Իսկական երջանկությունը, ասում էր նա, անդադար աշխատանքի և ժուժկալ կյանքի մեջ է։

Մի տեսակ այնպես էր ստացվել, որ ֆերման կարծես հարստացել էր՝ առանց անասունների կյանքի բարելավման, չհաշված, իհարկե, խոզերին ու շներին։ Թերևս դրա պատճառը մասամբ նաև այն էր, որ խոզերն ու շները շատ ու շատ էին։ Չի կարելի ասել, որ վերջիններս յուրովի չէին աշխատում։ Ֆերմայում, ինչպես երբեք, չէր հոգնում բացատրել Զոանը, վարչական

և կազմակերպչական բնույթի անծայրածիր աշխատանք կար անելու: Այդ աշխատանքի մեծ մասի էությունը հասկանալու համար անասունները չափից ավելի թանձրամիտ էին: Օրինակ՝ Զոանը նրանց բացատրում էր, որ խոզերն ամեն օր ստիպված են տաժանակիր աշխատանք կատարել ինչ-որ խորհրդավոր «հաշվետվությունների», ու «հանձնարարականների», «հաշվեկշիռների» ու «քաղվածքների» հետ: Մեծ-մեծ թղթեր ոտքից գլուխ ծածկվում էին մանր ձեռագրով, իսկ լրացվելուց հետո նետվում էին արխիվը: Զոանն ասում էր, որ ֆերմայի բարեկեցության համար դա մեծագույն կարևորություն է ներկայացնում: Դրանով հանդերձ ոչ շները, և ոչ էլ խոզերն իրենց աշխատանքով անասնակեր չեն արտադրում, չնայած միշտ հիանալի ախորժակ ունեին:

Ինչ վերաբերում է մնացածներին, ապա նրանց կյանքը, ինչքան որ իրենք էին հասկանում, միշտ էլ նույնն էր եղել: Նրանք հիմնականում քաղցած էին, քնում էին ծղոտի վրա, խմում էին ջրափոսից, աշխատում էին դաշտում, ծմունը հանգիստ չունեին ցրտից, իսկ ամուսն՝ ճանճերից: Երբեմն առավել տարեցները քրքրում էին իրենց աղոտ հիշողությունը, փորձելով որոշել, թե արդյոք Ապատամբության օրերին, երբ Զոնզը նոր էր վտարվել, կյանքն ավելի

լա՞վ էր, թե՛ վատ: Զկար ոչինչ, որի հետ կարելի լիներ ներկան համեմատել, միակ չափանիշը Զուանի թվերն էին, որոնք անշեղորեն հավաստում էին, թե ամեն ինչ գնալով ավելի ու ավելի լավ է դառնում: Անասունների համար այդ հարցը մնում էր անլուծելի, ամեն դեպքում նրանք այժմ նման բաների մասին մտածելու ժամանակ էլ չունեին: Ծեր Բենիամինը պնդում էր, որ պարզ հիշում է իր կյանքի բոլոր մանրամասները, ասելով, որ ոչինչ երբեք ավելի վատ կամ ավելի լավ լինել չէր կարող, ըստ նրա՝ քաղցը, զրկանքներն ու հիաթափությունը կյանքի անսասան օրենքներն էին:

Բայց և այնպես, անասունները երբեք չէին դադարում հույս փայփայելուց: Դեռ ավելին, նրանք երբեք, մի ակնթարթ անգամ չէին կորցնում Անասնաֆերմայի անդամների իրենց արտոնության պարձանքը: Նրանք շարունակում էին մնալ ամբողջ երկրի, – ամբողջ Անգլիայի, – միակ ֆերման, որը պատկանում էր անասուններին: Նրանցից ոչ մեկը, անգամ մատղաշները, անգամ հեռավոր տեղերից բերված նորեկները, չէին դադարում հիանալ այդ փաստով: Իսկ երբ նրանք լսում էին հրացանի կրակոցը և տեսնում ծածանվող կանաչ դրոշը, նրանց հոգիներն անսահման հպարտությամբ էին լցվում, և խոսակցությունն

անպայման դառնում էր այն հերոսական օրերին, երբ վոնդվեց Զոնզը, գրվում էին Յոթ Պատվիրանները և պանծալի ճակատամարտներում ջախջախվում էին զավթարար մարդիկ: Անցյալի երազանքներից ոչ ոք չէր հրաժարվել: Բոլորը հավատում էին Գնդապետի կանխատեսած Անասունների հանրապետությանը, որում Անգլիայի հողին չպիտի ոտք դներ մարդը: Այդ օրը դեռ գալու էր, թեկուզ ոչ շուտ, գուցե անգամ ոչ իրենց կյանքի ընթացքում, բայց անպայման գալու էր: Թերևս տեղ-տեղ նույնիսկ կամացուկ լսվում էր «Անգլիայի գազանների» մեղեդին, համենայն դեպս՝ ֆերմայի բոլոր անասուններն այն գիտեին, չնայած ոչ ոք չէր համարձակվում բարձրաձայն երգել: Եթե անգամ կյանքը չարքաշ էր և ոչ բոլոր իղձերն էին իրականացել, նրանք գիտեին, որ տարբերվում են մնացած անասուններից: Եթե նրանք քաղցած էին, ապա պատճառը բռնակալ մարդկանց կերակրելու կարիքը չէր, եթե նրանք հյուծվում էին աշխատանքից, ապա գոնե իրենց համար էին աշխատում: Ոչ ոք նրանց մոտ երկու ոտքի վրա չէր քայլում: Ոչ ոք ուրիշին «տեր» չէր կոչում: Բոլոր անասունները հավասար էին:

Մի օր ամռան սկզբին Զոանը ոչսարներին հրամայեց հետևել իրեն և տարավ ֆերմայի հեռավոր

ծայրի մի տափարակը, որը ծածկված էր ծփիների մատղաշ ծառերով: Ոչխարներն ամբողջ օրը մնացին այնտեղ՝ արածելով Զոանի հսկողության ներքո: Երեկոյան նա վերադարձավ ֆերմա, բայց, քանի որ եղանակը տաք էր, ոչխարներին հետ չբերեց: Ոչխարներն այնտեղ մնացին մի ամբողջ շաբաթ, որի ընթացքում նրանց ոչ ոք չէր տեսնում: Օրվա մեծ մասը Զոանն անց էր կացնում նրանց հետ: Նա ասաց, որ ոչխարներին սովորեցնում է մի նոր երգ, որի համար առանձնացում է պահանջվում:

Ոչխարների վերադարձից շատ չանցած, երբ գեղեցիկ մի երեկո անասունները հետ էին գալիս դաշտային աշխատանքներից, ֆերմայի բակից ձիու սարսափահար մի խրխինց լսվեց: Ընկրկելով՝ անասունները մեխալեցին իրենց տեղերում: Խրխինջը կրկնվեց: Ճանաչելով երեքնուկի ձայնը, բոլորը վարգով նետվեցին բակը և տեսան... Երեքնուկի տեսածը:

Մի խոզ քայլում էր հետևի ոտքերի վրա:

Այո, հենց Զոանը: Մի քիչ անշնորհք, ասես դեռ անսովոր իր զգալի քաշը պահելուն, սակայն կատարյալ հավասարակշուությամբ, նա կտրում-անցնում էր բակը: Հաջորդ պահին տան դոնից դուրս եկավ խոզերի երկար մի շարան՝ բոլորը հետևի ոտքերի վրա: Ոմանք մյուսներից ավելի լավ էին

քայլում, իսկ մի երկուսը թեթևակի երերում էին, ասես ձեռնափայտի կարիք զգալով, բայց բոլորը հաջողությամբ անցան ամբողջ բակով մեկ: Վերջապես, շների զարհուրելի հաչոցի ու սև աքաղաղի զիլ կանչի ներքո, տնից դուրս եկավ փառավորապես ուղղաձիգ Նապոլեոնը: Նա ամբարտավան հայացքներ էր գցում չորս կողմը, շուրջը թռչկոտում էին շները:

Նրա տոտիկում մտրակ էր սեղմված:

Մեռյալ լուսություն տիրեց: Ապշահար ու ահաբեկված, անասուններն իրար սեղմված դիտում էին խոզերի դանդաղ երթը բակով մեկ: Աշխարհն ասես շուր էր եկել: Ապա, առաջին ցնցումը հանդարտվելուն պես, եկավ մի պահ, երբ, հակառակ ամեն ինչի, հակառակ շների վախի, հակառակ երբեք չտրտնջալու, ինչ էլ որ լինի՝ երբեք չբողոքելու տարիններով մշակված սովորույթի, անասուններն ուր որ է կընդվզեին: Սակայն հենց այդ պահին, ասես ազդանշանով, ոչխարները սկսեցին բարձր մայել:

– Չորս ոտք լավ, երկու ոտք ավելի լավ: Չորս ոտք լավ, երկու ոտք՝ ավելի լավ: Չորս ոտք՝ լավ, երկու ոտք՝ ավելի լավ:

Այսպես շարունակվեց իինգ րոպե անընդմեջ: Երբ ոչխարները լոեցին, բողոքելու հնարավորություն

արդեն անցել էր, քանի որ խոզերը շարքով մտել էին տուն:

Ինչ-որ մեկը հպվեց Բենիամինի ուսին: Նա շուտ եկավ: Երեքնուկն էր: Նրա ծեր աչքերն ավելի մշուշված էին, քան երբեմ: Առանց որևէ բան ասելու, նա կամացուկ քաշեց Բենիամինի բաշից ու տարավ նրան ամբարի այն պատի տակ, որին գրված էին Յոթ Պատվիրանները: Մի պահ նրանք լուր նայում էին սպիտակ տառերով սև պատին:

– Ես արդեն լավ չեմ տեսնում, – վերջապես ասաց Երեքնուկը: – Նույնիսկ ջահել օրերին ես, միևնույն է, չէի կարողանա կարդալ: Բայց ինձ թվում է, որ գրությունը փոխվել է: Ասա ինձ, Բենիամին, Յոթ Պատվիրանները նո՞յնն են, թե՞ չեն:

Կյանքում առաջին անգամ Բենիամինը խախտեց իր օրենքը և բարձրաձայն կարդաց պատի գրությունը: Այստեղ ոչինչ չկար, միակ Պատվիրանից բացի.

**ԲՈԼՈՐ ԱՆԱՍՈՒՆՆԵՐԸ ՀԱՎԱՍԱՐ ԵՆ,  
ՍԱԿԱՅՆ ՈՐՈՇ ԱՆԱՍՈՒՆՆԵՐ  
ԱՎԵԼԻ ՀԱՎԱՍԱՐ ԵՆ, ՔԱՆ ՄՅՈՒՆՆԵՐԸ**

Դրանից հետո արդեն զարմանալի չթվաց, որ հաջորդ օրն աշխատանքները վերահսկող բոլոր խոզերը

մտրակներ ունեին: Զարմանալի չթվաց, որ խոզերը ռադիոընդունիչ են գնել, հեռախոս են անցկացնում և բաժանորդագրվել են «Զոն Բոլ», «Դեսից դեսից» և «Դեյլի միրը» թերթերը: Զարմանալի չթվաց, որ Նապոլեոնը պարտեզում զբոսնում է ծխամորճը քերնին, և որ խոզերը պահարանից հանել ու հագնում են միստր Զոնզի շորերը: Նապոլեոնը սև բաճկոն, որսորդական անդրավարտիք ու կաշվե ոտնակալներ էր հագնում, իսկ իր սիրելի մերունը՝ միսիս Զոնզի կիրակնօրյա մետաքսե զգեստը:

Մեկ շաբաթ անց ֆերմա ժամանեցին մի քանի երկանիվ կառքեր: Հարևան ֆերմերների պատվիրակությունը իրավիրված էր ստուգայի: Ամբողջ ֆերման ուսումնասիրելով՝ նրանք իրենց հիացմունքը հայտնեցին տեսածով և մանավանդ՝ հողմաղացով: Անասուններն այդ ժամանակ զբաղված էին շաղամի արտը քաղիանելով: Նրանք ջանասիրաբար աշխատում էին՝ խուսափելով հողից կտրել մոռութները, չիմանալով՝ խոզերից ավելի վախենալ, թե՛ մարդկանցից:

Այդ երեկո տնից բարձր ծիծաղ ու երգեցողություն լսվեց: Խառը ձայները հանկարծ շարժեցին անսատունների հետաքրքրասիրությունը: Ի՞նչ էր այնտեղ կատարվում այժմ, երբ անասուններն ու մարդիկ

առաջին անգամ հանդիպում էին որպես հավասար-ներ: Միասնական մղումով նրանք սկսեցին հնարա-վորին չափ անձայն սողոսկել տան հետևի այգին:

Դոնակի մոտ նրանք կանգ առան, վախենա-լով անցնել, բայց Երեքնուկը նրանց առաջնորդեց ներս: Կճակների ծայրերին նրանք մոտեցան տա-նը, և այն անասունները, ում հասակը բավարարում էր, ներս նայեցին հյուրասենյակի պատուհանից: Եր-կար սեղանի շուրջ նստած էին հինգ-վեց ֆերմերներ և նույնքան բարձրաստիճան խոզեր: Նապոլեոնը գրավում էր սեղանի գլխի պատվավոր տեղը: Խո-զերն իրենց աթոռներին նստած էին միանգամայն անրոնազրոս: Բոլորն ակներևաբար մի պահ ընդհա-տել էին թղթախաղը կենաց ասելու համար: Մի մեծ սափոր փոխանցվում էր մեկից մյուսին՝ թարմացնե-լով գավաթների պարունակությունը: Պատուհանից նայող ապշահար անասուններին ոչ ոք չէր նկատել:

Ֆոքսվուդի միստր Փիլքինգտոնը ոտքի կանգնեց գավաթը ձեռքին: Քիչ անց, ասաց նա, ինքը ներկա-ներին խնդրելու է կենաց խմել: Սակայն նախքան այդ ինքն իր պարտքն է համարում մի քանի խոսք ասել:

Ինքը, ինչպես և, անկասկած, բոլոր ներկաները, մեծագույն գոհունակությամբ է ընդունում այն փաս-տը, որ կասկածամտության և թյուրիմացությունների

շրջանն ի վերջո ավարտված է: Եղել է ժամանակ, իհարկե, ներկաները չեն հարել նման հայացքների, բայց եղել է ժամանակ, երբ Անասնաֆերմայի մեծապատիվ տերերը հարևան մարդկանց մոտ, ինքը չէր ասի թշնամական, համենայն դեպս՝ որոշ չափով անբարյացակամ վերաբերմունք էին հարուցում: Եղել են դժբախտ միջադեպեր, հաճախ տարածայնություններ են ծագել: Խոզերին պատկանող ֆերմայի գոյությունը համարվել է աննորմալ և շրջապատի համար գաղափարապես վտանգավոր: Շատ ֆերմերներ, առանց նյութի մեջ խորանալու, համարել են, որ նման ֆերմայում տիրելու է թողտվության ու անկարգապահության ոգին: Նրանց անհանգստացրել է սեփական անաստների և անգամ աշխատավորների վրա դրա թողած հնարավոր ազդեցությունը: Սակայն այժմ բոլոր նման կասկածները ցրված են: Այսօր, ընկերների հետ այցելելով Անասնաֆերմա և սեփական աշքերով ուսումնասիրելով դրա ամեն մի թիզը, ինքը տեսավ ոչ միայն ամենաժամանակակից մեթոդների կիրառություն, այլև այնպիսի մի կարգապահություն, որը կարող է օրինակ ծառայել բոլոր մնացած ֆերմերների համար:

Ինքը չի մեղանչի ճշմարտության դեմ, եթե ասի, որ Անասնաֆերմայի ստորին անաստներն ավելի

շատ են աշխատում և ավելի քիչ կեր են ստանում, քան երկրի ցանկացած այլ անասուն: Հիրավի, ինքը, իր ընկերների հետ միասին, այսօրվա տեսածից շատ բան մտադիր է անմիջապես ներմուծել իրենց ֆերմաներում: Ինքը ուզում է ավարտել կրկին անգամ շեշտելով, որ Անասնաֆերմայի և իր հարևանների միջև հաստատված բարեկամական զգացումները միանգամայն օրինաչափ են: Մարդկանց և խոզերի միջև շահերի որևէ ընդհարում երբեք չի եղել և չպիտի լինի: Նրանց դժվարություններն ու պայքարն ընդհանուր են: Չէ՞ որ աշխատուժի հետ կապված պրոբլեմներն ամենուր միննույն են: Այստեղ պարզ դարձավ, որ միստր Փիլքինգտոնը մտադրվում է խնամքով պատրաստված մի սրամտություն անել, բայց իրճվանքից մի պահ չէր կարողանում այն արտաքիներել: Մի քանի անգամ փղձկալով, որից նրա բազմաթիվ կզակները շառագունեցին, նա վերջիվերջո կարողացավ ասել. «Եթե դուք ստիպված եք զապել ձեր ստորին անասուններին, մենք էլ մեր ստորին դասակարգերն ունենք»: Այդ սրամտությունից սեղանը պողոված ծիծաղով, իսկ միստր Փիլքինգտոնը նորից խոզերին շնորհավորեց ֆերմայի ցածր օրաբաժինների, երկար աշխատաժամերի և ընդհանուր երեսառածության բացակայության համար:

Վերջապես, ասաց նա, Ժամանակն է ոտքի կանգնել և լցնել գավաթները: «Պարոնայք, – եզրափակեց միստր Փիլքինգտոնը, – պարոնայք, ես առաջարկում եմ խմել Անասնաֆերմայի բարգավաճման կենացը»:

Սենյակը լցվեց խանդավառ բացականչություններով ու դոփյունով: Նապոլեոնն այն աստիճան շոյված էր, որ, տեղից ելնելով, սեղանը շրջանցեց՝ իր գավաթը Փիլքինգտոնի հետ չխկացնելու համար: Երբ իրարանցումն ավարտվեց, Նապոլեոնը, որը մնացել էր կանգնած, տեղեկացրեց, որ ինքն էլ մի քանի խոսք ունի ասելու: Ինչպես Նապոլեոնի բոլոր ճառերը, այս մեկն էլ կարճ էր ու տեղին: Նա նույնպես ասաց, որ ուրախ է տեսնել փոխադարձ կասկածամտության դարաշրջանի ավարտը: Երկար ժամանակ տարածված էր այն տեսակետը, – նա հիմք ուներ կարծելու, որ դա չարակամ թշնամիների բանսարկության հետևանքն է, – թե իր և իր գործնկերների աշխարհայացքը քայքայիչ և անգամ հեղափոխական տարրեր է պարունակում: Նրանց վերագրում էին հարևան ֆերմաների անասուններին ապստամբության հրահելու նկատառումներ: Դրանից մեծ սուս դժվար է հորինել: Նրանց միակ ցանկությունն ինչպես այժմ, այնպես և անցյալում, հարևանների հետ խաղաղ և գործնական

հարաբերությունների պահպանումն է: Այս ֆերման, որը պատիվ ունի ղեկավարելու ինքը, կոռպերատիվ հաստատություն է: Դա ապացուցող իրավական փաստաթղթերը, որոնք գտնվում են իր մոտ, բոլոր խոզերի միասնական սեփականությունն են:

Հավատալով, որ նախկին կասկածամտությունը իշաղթահարված է ֆերմայում, այդուհանդերձ, մի շարք միջոցառումներ են ձեռնարկվել, որոնք պիտի ծառայեն վստահության հետագա ամրապնդմանը: Անասունների միջև մինչ այդ տարածված էր իրար դիմելու «ընկեր» իհմար ձևը: Այսուհետև այն հայտարարվում է ապօրինի: Կար նաև տարօրինակ մի սովորույթ, որի ծագումն անհայտ է, ամեն կիրակի շարքով անցնել այգում գամկած մի ծեր խոզի գանգի կողքով: Դա նույնպես պիտի դադարեցվի: Այցելուները նկատած կլինեն այգում ծածանվող կանաչ դրոշը: Նրանց ուշադրությունը իրավիրվում է այն փաստին, որ նախկինում դրոշի վրա տեղ գտած սպիտակ կճղակն ու պոզն այլս չկան: Այսուհետև դրոշը լինելու է պարզապես կանաչ: Նապոլեոնն ավելացրեց, որ ընդամենը մի ճշտում է ուզում մտցնել միստր Փիլքինգտոնի սքանչելի հարևանական ճաղի մեջ: Միստր Փիլքինգտոնն իր խոսքում բազմիցս անդրադարձավ «Անասնաֆերմային»: Նա, իհարկե, չէր կարող իմանալ,

քանի որ Նապոլեոնն առաջին անգամ է դա ազդարուում, որ «Անասնաֆերմա» անունը վերացվում է: Այսուհետև այն կոչվելու է «Մենըր» ֆերմա, որն, ըստ նրա, ֆերմայի իսկական և ստույգ անվանումն է:

- Պարոնայք,- եզրափակեց Նապոլեոնը,- ես առաջարկում եմ նոյն կենացը, սակայն փոքր-ինչ ձևափոխված: Բերնեբերան լցրեք ձեր գավաթները: Խմենք «Մենըր» ֆերմայի բարգավաճման կենացը:

Հետևեցին նոյն սրտաբուխ բացականչությունները, և գավաթները պարպեցին: Մինչ դրսի անասունները դիտում էին, նրանց թվաց, որ ներսում տարօրինակ մի բան է կատարվում: Ի՞նչ էր պատահել խոզերի դեմքերին: Ծեր Երեքնուկի մշուշու աչքերը դառնում էին մեկից մյուսին: Ոմանք հինգ կզակ ունեին, ոմանք՝ չորս, ոմանք՝ երեք: Սակայն ինչ-որ բան կարծես երերար ու հալչեր: Ծափահարությունից հետո վերսկսվեց ընդհատված թղթախաղը, և անասունները լուս ու մունջ հեռացան:

Հազիվ էին նրանք մի քան քայլ հեռացել, երբ հանկարծ կտրուկ կանգ առան: Տնից սոսկալի աղաղակ էր գալիս: Ետ նետվելով՝ անասունները նորից հպվեցին պատուհանին: Ներսում կատաղի վեճ էր բռնկվել: Բոլորը գոռում էին, գազազած ինչ-որ բան հերքում, խիում սեղանին ու կասկածու հայացքներ

փոխանակում: Պատճառը կարծես թե այն էր, որ Նապոլեոնն ու միստր Փիլքինգտոնը միաժամանակ ազդավի մեկնոց էին դրել:

Լսվում էր տասներկու գազազած ու միանման ձայն, և արդեն պարզ էր, թե ինչ է կատարվել խողերի դեմքերի հետ: Դրսի անասունները նայում էին մեկ խողին, մեկ՝ մարդուն, ապա նորից խողին ու նորից՝ մարդուն, սակայն անկարող էին արդեն մեկին մյուսից տարբերել:

ԶՈՐԶ ՕՐՈՒԵԼ  
**ԱՆԱՍՆԱՖԵՐՄԱ**  
վիպակ

GEORGE ORWELL  
**ANIMAL FARM**  
novel

Անգլերենից թարգմանեց Արտաշես Էմինը

Խմբագիր՝	Արքմենիկ Նիկողոսյան
Տեխն. խմբագիր՝	Արարատ Թովմանյան
Սրբագրիչ՝	Աննա Մարգարյան
Էջադրող՝	Արմինե Պապանյան
Կազմը՝	«Անտարես» մեդիա հոլդինգի

թարգմանութենական համար՝ 5-1915-ՀՆՁ Եղբայրություն



«ԱՆՏԱՐԵՍ» հրատարակչառուն  
Երևան 0009, Մաշտոցի 50ա/1  
Հեռ.՝ +(374) 58 10 59, 56 15 26  
Հեռ./ֆաքս՝ +(374) 58 76 69  
antares@antares.am  
www.antares.am